

LOS HECHOS DE LOS APOSTOLES

Espíritu Turã nda tu, ¡Jesús

¹⁻² Ambesa que ndeje nyii, Teófilo. Arembiirandu ja que Jesús chiao rese. Eresco mose íbii. Jesús que mbia mbaaquiatsu quiatsu ereco mose íbii ra. Dios que equerao bei jiri ibate cote ra. Ñquĩ ngue asenei senei ndeje nyii ra. Oso nonde ibate que ucheẽ nenei nenei sacua irabo ra. Uchiirabo que embaaquiatsu quiatsu ra. Siqui que Espíritu Turã ndese mbia mbaaquiatsu quiatsu ra. Eaquiatsu que esecha oso ibate cote ra.

³ Manonde que eru si nyecua ñquĩ je ra. Oso nonde ibate. Ngueco que eteacuquia cuquia si ee ra. Cuarenta días que eriqui nyecua nyecua bei uchi mbaaquiatsu je ra. Dios rese que eriqui embiirandu randu ra. Dios rei ererecua tuchi. Ae riĩ eriqui embiirandu randu.

⁴ Jesús oso nonde ibate que eriqui ñee ñee uchimbaaquiatsu je ra. —¡Jẽsochĩ nda sucha tubiriã si jẽ! ¡Jẽsochĩ nda Jerusalén si jẽ! ¡Paba cheẽ nguire jengu Espíritu Turã ndaarõ aa jẽ! “Espíritu Turã tamondo jẽje”, ¡ que Paba jẽje ra. Aque riĩ ngue acheẽ jẽje nyii resẽ, ¡ que Jesús ee ra.

⁵ —I je que Juan bautizar ¡ mbia je ra. Namu jiri ra Espíritu Turã ndu. Ae ra ¡que jeñiangui re. Eĩ nda Espíritu Turã bautizar ¡ jẽje. I je eã cote. Espíritu Turã nda ¡que chõ jeñiangui re cote, ¡ que Jesús uchimbaaquiatsu je ra.

Jesús oso ibate

⁶ Emo mose que Jesús chimbaaquiatu ñee ee ra. Jesús oso nonde ibate. —¿Manose ra urererecua ishonda erembutiã ure si re? Israel jenda rei ure. ¿Namo nda ure mo eremii urererecuarã nde? i que mbia Jesús je ra.

⁷ Jesús que ñee ee ra. —Manose chõ ndae. Paba mii eicua. Mbia eicuayã. Jẽ nguia jẽicuayãte nguia no. Manosete chõ ndae.

⁸ ¡Co rese chõ jendua jẽ! Espiritu Turã nda tu jẽje cote. Ae ra jembuquirãcuã. Ae ra jembucheẽ ñee serii. Jẽ nda jẽingo serenei nenei tuchi cote. Serenei nenei Jerusalén jenda je. Judea jenda je abe no. Samaria jenda je abe no. Mbia mangue chooñoa jenda ja je abe no. Ũquija je jẽingo serenei nenei, i que Jesús ra.

⁹ Ñeende que Jesús si ibate cote ra. Uchimbaaquiatu resa rae que esi erecha ra. Ibeishĩ ngue embuchecuayã cote ra.

¹⁰ Echimbaaquiatu que soboiba bei u mae ibei rese ra. Ibei rese mae mose que mbia nyeremo ngaẽ erea ra. Ibate si. Huee que echi ra. Eiraoshĩ tuchi que ngaẽ ejii ra.

¹¹ Ibatenda que ñee ee ra. —Galilea jenda, ¿mbaerã jengu beite mae ibei rese a re? Jesús oso quia ibate nae, ae si ra tube no. Jemae ngue u eso rese nae, eĩ si ra u íbii no, i que ibatenda ee ra.

Dios que Matías irabo ra

¹² Jesús chimbaaquiatu que nyoĩ nyebi hue recha ra. Monte de los Olivos recha. Nyoĩ que sucha tubiriã Jerusalén cote ra. Aichi jiri. Monte de los Olivos rei Jerusalén ndurubi.

13 Ngasẽ ngue Jerusalén nda. Nyoĩ que uchuchúaa cote ra. ã ja que ra. Pedro. Juan. Jacobo. Andrés. Felipe. Tomás. Bartolomé. Mateo. Alfeo riirĩ. Jacobo, i ee. Simón el Cananista. Judas. Jacobo riirĩ ndei Judas.

14 Ñquĩ ja que ñmunua mbei bei quia ñee ñee Dios je ra. Ari abe no. Acuanĩ abe no. María abe no. Jesús si rei María. Jesús nongue abe no. Ñquĩ ja que ñmunua mbei bei quia ñee ñee Dios je ra.

15 Emo jiri mose que Jesús icuasa ñmunua ja ra. Ciento veinte que ra. Pedro que uã ñee ee ra.

16 —Seandu rã se, Seresenda. ¡Sã embesa ji ñee ñooño eã ño jẽ! Cose que Espíritu Turã ñee Judas riĩ nda. David que embesa Espíritu Turã ñee nguire ra. Judas riĩ. Judas rei Jesús reacuquiasa mbia icuã je. Jesús rerao nonde iquia.

17 Jesús que Judas irabo rei nyii ra. Nandere-sendacuã. Nyebe rei Judas nanderesenda nyii.

18 Judas que mbae isiquia isi icuã nda. Mbae isiquia je que ibi mo isi ra. Hue ereco mose que mano nda. Ibate si eru ngoĩ mano. Uãquĩ nguiti que eru ngoĩ ra. Erie que oo ra. Echique mburiri.

19 Jerusalén jenda que jirandu ja erese ra. Acéldama, i que hue ibi je cote ra. Mbia ruqui rua, i chõ nguiã hue je. Ecoisa ibi je.

20 ¶ ñi embesa ji Salmos nde:

Sã echuchua oreã mbei.

Sã mbia mo ndiquiã mbei equi re.

Sã eriquicharomba riqui Dios cheẽ nenei nenei cote,

i que embesa ji Judas riĩ nda.

²¹ Emo nandeirabo Judas riquicharõ. Mbia chi bei quia nanderese nae. Jesús nandembaaquiatu quiatu bei mose.

²² Juan mbia mbiirandu randu mosenda bei. Dios Jesús querao chee quia ibate. Ae siqui beite quia nanderese nae, ãquĩ mo nandeirabo nanderesendacuã. Jesús quera rese mbia mbiirandu randu sacuã, Judas riquicharõ, i que Pedro ñee ee ra.

²³ Mbia nyeremo ngue etea cote ra. José Justo, i emo je. Barsabás, i abe ee no. Matías, i enongue je.

²⁴ Jesús chimbaaquiatu que ñee Dios je cote ra. — Urererecua, aba chiã ereicuate quia co. ã nyeremo ndiqui ã. ¿Aba ndechiirabo re? ¿Aba ereirabo urembirõ sacuã nde?

²⁵ ¿Aba eretea ndechimbaaquiatubirã nde? ¿Aba eretea Judas riquicharõ nde? Ae huĩ quia ndecheẽ si. Ae oso quiachã ndesi cote. ¿Aba eretea eriquicharõ nde? i que Dios je ra.

²⁶ Sita que embaba mbaba o ye cote ra. —¿Aba Dios chiirabo re? i ñene. Eĩ ngue Matías irabo ra. Dios que Matías mingo Jesús chimbaaquiatu rese cote ra. Mbia once mbirõ. Docerã. Doce que Jesús chimbaaquiatu cote ra.

2

Espíritu Turã tu Jesús icuasa je

¹ Fiesta de Pentecostés mose que Jesús icuasa chi ja ñumunua nda. Hue mii ngue echi ja ñumunua nda.

² Ibei rieu que embuate ra. Ama ndieu raanguia. Tuchua mbieu tuchi Jesús icuasa je.

³ Tata rendi raanguia que tu nguichi eãquĩ ndes e ra. Jesús icuasa ãquĩ ja rese.

⁴ Espíritu Turã ngue ique tuchi hue jenda chiangui re ra. Ique ja que Jesús icuasa chiangui re ra. Mbia que echeẽ ata mo saã saã cote ra. Echeẽ uchianuã ngue esaã saã nda. Espíritu Turã nguia rei embucheẽ echeemo. Mbia cheẽ mbuae jaaja que cote ra.

⁵ Aque mose que judíos tubiriã nyi Jerusalén nda. Ishonda tubiriã nyi huee. Mangue chooñoa jenda ja chõ chi nguia huee. Uquĩ ndei Dios cheẽ mumbasa reã judíos ataque rã si.

⁶ Ibei rieu andu mose que uquĩ ngaẽ uchã nda. Nyuruira tuchi eandu. Jesús resenda mbia cheẽ mbuae saã saã ja chõchĩ nguia u. Espíritu Turã ño ngue embucheẽ nguia. Mbiamo ñee icuasa reã ndaque. Mbia que ucheẽ ñandu ñandu ja u ra. Jesús icuasa ñee mose. Nyebe que mbia chi nguia nyuruira eandu.

⁷ Mbia nyuruira ja eandu. —¿Mañi equia mbi-amo ñee icua ja re? Galilea jenda achõ ño ndaque ã, i tuchi que mbia u nyuruira eandu ra.

⁸⁻¹¹ —¿Mañi equia nande ja cheẽ naa naa ã nde? Nandechẽ Jesús icuasa saã jaaja chõchĩ nguia ã. Partia jenda cheẽ esaã saã ñochĩ nguia ã. Media jenda cheẽ abe no. Elam jenda cheẽ abe no. Mesopotami a jenda cheẽ abe no. Judea jenda cheẽ abe no. Capadocia jenda cheẽ abe no. Ponto jenda cheẽ abe no. Asia jenda cheẽ abe no. Frigia jenda cheẽ abe no. Panfilia jenda cheẽ abe no. Egipto jenda cheẽ abe no. Libia jenda cheẽ abe no. (Cirene ndobei.) Roma jenda cheẽ abe no.

(Roma jenda mo ndei judíos. Roma jenda ataque rei judíos eã.) Creta jenda cheẽ abe no. Arabia jenda cheẽ abe no. Jesús icuasa ũquí ñee saã saã ja chõchĩ nguiã ã. Nandechẽ esaã saã ja chõchĩ nguiã ã. Jesús icuasa riquichĩ nandechẽ naa naa tuchi Dios chiao turã nenei nenei ã, i ja que mbia ucheẽ andu jaaja mose.

¹² I jate que mbia u nyuruira eandu ra. Ndua ndua tuchi que u eandu ra. —Mañi equia ñee ã nde, i nyue. Jesús icuasa mbia cheẽ mbuae naa naa mose.

¹³ Emo emo ngue ñee icuã icuã Jesús icuasa je ra. —Quiacua chõ eriqui nguiã ã, i raque Jesús icuasa riĩ.

Pedro ñee mbia je

¹⁴ Pedro que uã ñee mbia je cote ra. Nguesenda once rese que echĩ uã ñee mbia je ra. Tasẽ jiri ñee ee. —i Seandu ja u jẽ! Tacheẽ jẽje, Jerusalén jenda. Judea jenda abe no.

¹⁵ ¿Quiacua reĩ Jesús icuasa riqui jẽje re? Quiacua eã ño ñene. Tenda que nyuĩ ramote resẽ. Mbia quiacuasa eã ño huee tenda resẽ.

¹⁶ ã ñi ngue Joel embesa mbesa cose ra. Dios cheẽ mbuchecua que embesa ã ñi nda. Eĩ ngue embesa ra:

¹⁷ “Mbae ua jiri mos e ra Espíritu Turã amondo mbia ja je”, i que Dios ra.

“Jendiirĩ nda secheẽ mbuchecua mbia je.

Acuanindu ra serea rea tuchi cuu.

Amei abe ra serea rea cuu no.

¹⁸ Aqué mose ra Espíritu Turã amondo serimba ja je.

Serimba ra secheẽ mbuchecua checua mbia je.

19 Mbia mae sayã nda asaã saã ibi rĩ no.

Eruqui rese ra mbia mae no.

Tata rese ra mbia mae no.

Tatashĩ ndese ra mbia mae no.

20 Mbia rerecua tu nonde ra tenda ñimoo.

Eruqui rã nda nyasi mbia rerecua tu nonde”, i que Dios ra.

21 “Ndeya eã ño serese, Sererecua”, i mose emo ñee

Dios je, aque ra Dios sirõ eicuã si,

i que Joel embesa ra.

22 Israel jenda, iseandu rã! Nazaret jenda rĩ aico ñee ñee jẽje a. Jesús rĩ. Dios que Jesús mbuquirãcuã tuchi ra. Nyebe que Jesús mbia mae sayã saã saã nda. Ũquĩ ndese que jemaẽ nda.

23 “Mbia icuã nda seriirĩ iquia”, i que Dios Jesús mano nonde ra. Jẽ nguia Jesús jẽiquia tuchi nguia cote. Jẽ nguia jemee nguia mbia icuã je. Eiquia nonde. Dios rane ngue jirandu Jesús rese ra. “Mbia icuã nda Jesús iquia”, i que Dios quia nyii ra.

24 Dios que Jesús mbuquera si ra. Jesús mano mbei aroneãte.

25 David que Jesús cheẽ senei cose ra. ã ngue ñee nda:

Sererecua riqui sembuĩ eã mbei co.

Eriqui bei serese co.

Mbae riqui sembusiquiche aroneãte co.

26 Nyebe seya tuchite riqui co.

Nyebe aico ñee turãte Dios rĩ co.

Semano mose abe ra Dios hui eã mbei sesi.

27 Seaingue ra eresechayã semana mose, Sererecua.

Serete abe ra erembuquera si mingo.

Ndechesequate aico co.

28 Semingosa tuchi rei nde.

Sereco mose nderese ra seya tuchi,
i que David Jesús cheẽ nenei cose ra.

²⁹ Tacheẽ nyecua jêje, Seresenda. Nanderu David que mano cose resẽ. Mbia que echati resẽ. Eatisa nandeicua ja quia co resẽ.

³⁰ David rei Dios cheẽ mbuchecuada. Dios que ñee ee ra. “Nderiirĩ mo nda Cristo. Ae ra mbia rerecuarã tuchi. Nderiquicharõ nda mbia rerecuabi tuchi”, i que Dios David je cose ra. “Dios ñee ñooñoa tuchi chõ nguiã”, i que David ra.

³¹ David que Dios cheẽ icuate quia ra. Nyebe que ñee Jesús rĩ nda. “Seaingue ra eresechayã semana mose. Serete ra erembuquera si mingo”, nyebe David i nguiã Jesús rĩ.

³² Dios que Jesús mbuquera si ra. Ñquĩ ureicua ja quia ã. Nyebe ureico nguiã jembiiirandu randu ñquĩ ndese ã.

³³ Dios que Jesús querao ibate nyiese ra. Dios jii eriqui pee cote. Dios que Espíritu Turã mee Jesús je cote ra. Ucheẽ nguire que emee ee ra. Jesús riqui Espíritu Turã mondo ure je co. ã Espíritu Turã nyisaã jeñandu ñandu quia ã. Espíritu Turã ndiqui ã mbucheẽ mbia mo ñee ã.

³⁴⁻³⁵ David osoã ibate aque mose. Jesús rĩ ngue David embesa ra. ã ngue embesa ra:

Dios que ñee sererecua je ra. “Ecoi sejii. Nde abe ra ererecua serese.

Ae ndeucuayãte quia nae, ñquĩ je ra ndequirãcuã ateacuquia tuchi.

Ndequirãcuã tuchi ra ñquĩ si”, i que Dios sererecua je ra,

i que David embesa mbesa ra.

36 Jesús jembucha quia ira rese nae, ae si Dios mingo mbia rerecuarã co. Ae nandesaarõ arõ nguia, ae si rei Jesús. Jesús rese tẽirandu ja, Israel jenda, i que Pedro ñee ocote ra.

37 Mbia ia eã tuchite que Pedro cheẽ andu ra. Ñee ngue Pedro je ra. Pedro resenda je abe. — ¿Mañi ure ra equia re? i que Pedro je ra. Jesús chimbaaquiату ja je.

38 Pedro que echeẽ sibishorõ nda. — ¡Jẽicuã si jẽhui rã jẽ! Sã bautizar ure jẽje Jesucristo riñ. Dios jẽicuã mbutiã sacua. Aquere ra Dios Espiritu Turã mondo jẽje.

39 “Espiritu Turã nda amondo jẽje. Jendiirĩ je abe ra amondo. Ishonda je abe ra amondo. Sechiirabo ja je ra Espiritu Turã amondo”, i que Dios ñee nande je ra, i que Pedro Dios cheẽ nenei nda.

40 Eĩ ngue Pedro ñee ocote mbia je ra. Ñee turã ngue ee ra. — Mbia icua achõte eriqui ibi jenda ã. Quiachã ja equia Dios si ã. Ñquĩ si jẽhui chõ. Jẽ abe jẽquiachã yã sacua Dios si, i que Pedro mbia mbaaquiату ra.

41 — ¡Ae beite jẽ! i que mbia tubiriã Pedro cheẽ andu ra. Ñquĩ je que bautizar i ra. Aque mose que mbia tres mil Jesús isi ra.

42 Ñquĩ abe que ñmunua nua nguia Jesús quiato ataque rese ra. Jesús chimbaaquiату ñee ñee mose mbia je. Ñmunua nua ñee Dios je. Etura mbei que eriqui nyue ra. Mbichae que eu eu quia ndua ndua Jesús rese ra.

Jesús icuasa siqui turã nyue

⁴³ Mbia que siquiche ja Dios si ra. Jesús chimbaaquiatsu que Dios mbuquirãcuã nda. Nyebe mbia mae sayã naa naa tuchi nguiã.

⁴⁴ Jesús icuasa que ñumunua nua mbei quia ra. Abei tuchi que eriqui nyue ra.

⁴⁵ Umbae je que eriqui vender i tuchi ra. Mbae isiquia que emee mee nguia mbaecha reã je cote ra.

⁴⁶ Ñumunua nua mbei que equia Dios chuchúaa ra. Quiaru quiaru que equia nyiese uchuchúaa ra. Dios riñ ngue eriqui ñee turã turã nyue ra. Eya tuchi que eriqui Dios rese ra.

⁴⁷ Dios riñ ngue eriqui ñee turã turã nda. Mbia ataque que ñee turã turã nguia Jesús icuasa riñ nda. Jesús icuasa que Dios mbeta mbeta bei quia ra.

3

Ecuatayã mbucherõ

¹ Emo mose que Pedro nyoï quia Dios chuchúaa ra. Juan ndese. Tenda nyesece mose. Hue tenda bei que mbia riqui ñee ñee Dios je ra.

² Huee que amei mo ngatayã ndiqui bei huee ra. Echaacuquia mosenda bei eiquieï icuã. Mbia que ecuruchoï choï bei quia huee ra. Dios chuchúaa. Eiquesa turã, i que hue eiquesa je ra. Huee que eriqui ecuatayã mii mii mbei eiquesa jii ra. Ache ache i sacua mbia ique mose Dios chuchúaa.

³ Dios chuchúaa nda Pedro ique nguiã Juan ndese chã. Ecuatayã ngue mae erese ache ache i ee ra.

⁴ Pedro que nguesa mbui reã mae erese ra. Juan abe. —¡Ure rese emae jê! i ecuatayã je.

⁵ Eandu mose que mae erese ra. —Mbae mo nda emee seje reae, i mae nguiatu erese.

⁶ Pedro que ñee ee ra. —Mbae isiquia eã ndaque sembae. Mbae mo nda asaã ndeje. Jesucristo quirãcuã nembucherõ na mbucuata. Ehuã na ngata. Nazaret jenda quirãcuã nembucherõ na, i que Pedro ee ra.

⁷ Pedro que eo isi ra. Mua ngue eo rese ra. Aque mosebe que ei nyerõ nda. Eiquieĩ abe nyerõ eo isi ruibe.

⁸ Ecuatayã ngue juã asi cote ra. Ngata cuata que ra. Ique Dios chuchúaa ãquĩ ndese. Eya tuchi que ra. Oo oo tuchi que ra. Iaanye, i tuchi que equia Dios je ra.

⁹ Mbia que mae ja u ecuatayã ngata rese ra. Ñee turã mose Dios je que mbia nyiisaquia u echeẽ ndese ra.

¹⁰ Mbia que nyuruira u mae erese ra. Mbia que eicua ja ra. —Ecuatayã ño aque re. Ache ache i beite que equia Dios chuchúaa, ae chõ co re, i que mbia nyuruira tuchi mae erese ra.

Pedro ñee oco judíos je

¹¹ Embucherõ ji que Pedro chiba isi isi quia ra. Juan chiba abe no. Mbia que ngaẽ ucha mae erese ra. Nyuruira erea. Portal de Salomón, i eiquesa je. Huee que echi ra.

¹² Pedro que mae mbia chumunua ndese ra. Ñee ngue ee ra. —¿Mbaerã jẽingo nyuruirate mae erese re, Israel jenda? ¿Mbaerã jẽingo nyurui rate mae urerese re? Ure ae eã ño Ecuatayã urembucherõ nguiã. Urequirãcuã eã Ecuatayã mbucuata nguiã.

Dios quiarei uquiracuã mee ee embucherõ. Ure-
cuata turã embucherõ eã nguiã.

13 Dios rei nanderu rerecua bei. Abraham.
Isaac. Jacob. Ñquĩ nderecua bei Dios. Dios ñee turã
mbei nguiirĩ ñii. Jesús rĩĩ. Ae que jemee icuã mbia
je eiquia sacuaã nda. “Jesús tambui”, i mose Pilato,
ũquĩ mose que jëisi quiatu quiatu chõchĩ nguiã.

14 “Embui”, jenyee eã ñochĩ ngue Jesús turã ñii
nde. “Embui”, jenyee chõchĩ ngue mbia iquiasa rĩĩ
nde.

15 Eĩ jenyee chõchĩ ngue mbia mingosa iquia
nguiã. Dios que embuquera si ra. Equera si rese
que uremae nda. ã ureico mbia mbiirandu randu
equera rese ã.

16 ã jengu mae Ecuatayã ndese ã. Jë Ecuatayã
jëicuate resë. Jendesa rae que Dios embucherõ
nda. Ure Jesús ureicuate quia ã. Nyebe Ecuatayã
mbuquirãcuã nguiã.

17 Jëaquiatuã ño Jesús jëiquia nguiã, Seresenda.
Jenderecua aquiatuã ño Jesús iquia nguiã no.

18 Dios quia que ucheë mbuchecuaasa mbucheë
cose ra. Cristo rĩĩ embucheë. “Mbia icuã icuã
nda Cristo je. Cristo mbasi mbasi rae”, i que
embuchecuaasa cose ra. Ñquĩ ñee nguire quia Cristo
mbasi mbasi nguiã cote.

19 ¡jëicuã si jëhui chõ jë! Jemba rã Dios icha cuti.
Dios jëicuã mbutiã sacuaã. Eĩ jenyee mose ra Dios
jembiate cote.

20 Dios ra Jesucristo mbuquichi imbu cote. Ae
que emi jenderecua rã cos e ra.

21 Namõ ño nda Jesús riquichõ ibate. Dios mbae
mbitirõ ja mose ra eru cote. Eĩ ngue Dios cheë

mbuchecuada ñiinda ñee nda.

²² Nyebe Moisés ñee nguiã nanderu cose ndare je. “Dios ra nanderesenda mo isi. Dios cheẽ mbuchecua sacua. ¡Ae cheẽ nda jemumba jirichĩ jẽ!

²³ Echeẽ mumbasa ra Dios mbuquiachã nyesi”, i que Moisés ñee nda.

²⁴ Dios cheẽ mbuchecuada ja que mbia mbiirandu randu mbae rĩ nda. Ae riqui nyecua namo ã cote. Samuel nane ngue mbia mbiirandu randu ã nĩ nda. Samuel nduinda ja abe que embiirandu randu ã nĩ no nda.

²⁵ Jẽje chõ Dios cheẽ mbuchecuada ñee ñee nguiã. “Seturãte ra jendiirĩ ja je”, i que Dios ñee nanderu ñiinda je ra. Jẽje abe Dios ñee. Ucheẽ nda embuchebi eã. Dios que ñee Abraham je cose ra. “Nderiirĩ mo nda mbia mbia ja tuchi quia. Ibi jenda ra embia ja tuchi”, i que Dios Abraham je ra.

²⁶ Dios que nguiirĩ mondo íbii cote ra. Jẽ nane je que embu ra. Jembuturã sacua. Jẽhui sacua jẽicua si, i que Pedro judíos je ra.

4

Ererecua paama i ja Pedro je, Juan abe je

¹ Sacerdotes que ngaẽ cote ra. Pedro ñee mbei mose mbia je. Juan abe ñee mose ee. Dios chuchua raarõsa abe que tu erese huee ra. Saduceos mo abe que ngaẽ erese huee ra.

² Ũquĩ paama i ja Pedro je. Juan abe je. Mbiambaaquiātu quiātu mose chõ ngue paama i ra. — Jesús que quera si manonde ra. Eĩ nda mbia abe

quera si, i que Pedro ee nyii ra. Nyebe ũquĩ ndiqui nguiã paama i ee.

³ Nyebe eisi suruchoi nguiã policíaa. Eresaitõ ño emingue nguiã tarõ. —Isamami nguia nda nandechandu nguiã, i que ererecua nyue ra.

⁴ Mbia tubiriã Dios cheẽ ñandu erenei nenei mose. Eatate que Jesús icua ra. Jesús icuasa rei cinco mil hombres.

⁵ Isamami ngue mbia tubiriã ñumunua nda. Judíos rerecua que ngaẽ ñumunua huee ra. Amei abe que ngaẽ ñumunua erese ra. Embesasa abe que ngaẽ ñumunua erese no nda. Ũquĩ ja que ñumunua Jerusalén nda.

⁶ Anás abe que chí erese ra. Ae rei sacerdote rerecua. Caifás abe que chí erese ra. Juan abe no. Alejandro abe no. Sacerdotes nducucha ja que chi ñimbaacua ra.

⁷ Pedro que emii mbia ite re ra. Juan ndese. Mbia ñee ee cote. —¿Aba jembirãcuã nde? ¿Aba jembirãcuã nguia ecuatayã mbucuata nonde re? i que ee ra.

⁸ Espíritu Turã ngue Pedro mbucheẽ cote ra. —Tacheẽ jêje, mbia rerecua. Tacheẽ jê abe je, Amei.

⁹ “Ecuatayã ndese urembiirandu rã”, jenye chõ nguiã ure je ã. “¿Aba jembirãcuã ecuatayã mbucherõ nonde re?” jenye chõ nguiã ure je ã.

¹⁰ Tacheẽ nyecua jêje. Sã mbia ureandu ja. Sã Israel jenda ureandu ja. A ecuatayã embucherõ ji riqui jendesa rae a. Jesucristo quirãcuã nguiarei embucherõ. Aque sí quirãcuã ño ñene. Ae jêiquia. Ae jembucha ira rese. Ae Dios mbuquera si. Aque quirãcuã ño ñene. Nazaret jenda quirãcuã.

¹¹ ðhuaẽ nandechirirõ na ño Jesús re. Sañi

nandeico mae mae ñhuae nandechirirõ ndese no. “Aque chõ ndei que eturã nda”, sañi nandeico erirõ i no. Eĩ nyee ra mbia Jesús ndiichã i no. Mbia ra eisi tuchi nguerecuarã cote. Jesús momboi isi. Eisire rocoĩ nyii.

¹² Aba mo eã ndei nanderirõsa nandeicuã si. Jesús ae nanderirõ nguiã nandeicuã si. Dios aba mo abe mbu eã nguiã mbia rirõ sacua huicuã si. Jesús ae ñene, i que Pedro ra.

¹³ Mbia rerecua nyuruira Pedro cheẽ andu. —¿Mbaerã eriqui siquicheãte ñee nde? Papel ndesenda eã ndaque. Mbia ataque rã ño ndaque, i que ererecua nyue ra. Pedro rii. Juan nii. —Jesús resendã quia eriqui reaẽ. Nyebe eriqui siquicheãte ñee nde, i nyue cote.

¹⁴ Hue que embucherõ ji riqui huee ra. Nyebe mbia rerecua ñee icuã aroneate erii.

¹⁵ Ererecua ñee ja cote. —Sã Pedro choi usẽ taicuee. Juan abe no. Nandechẽ nandechue nande ae, i que ererecua nyue ra.

¹⁶ —¿Mañi nande ra Pedro je re? ¿Mañi nande ra Juan abe je re no? Pedro chimbucherõ ndese mbia riqui jirandu randu jate ã. Jerusalén jenda riqui jirandu randu jate ã no. “Mbucheroã ngue ra”, nande aroneate.

¹⁷ Nandembusiquiche rã no. Ñee ñee siã nda equia Jesús rii ña. Mbia nda jiranua nguia mámbii chã. Jesús rese chã. “¡Jesús cheẽ nda jēsenei senei sichĩ jẽ!” nande rã ee, i que ererecua nyue ra.

¹⁸ —Jenyu, i Pedro je cote. Juan abe je. —¡Mbia ra jembaaquiatuchi Jesús rii jẽ! ¡Jesús ra jēsenei seneichi mbia mo je jẽ! i rei que ee ra.

19 Pedro que echeẽ sibishorõ nda. Juan ndese. — ¿Aba cheẽ nguia ra aba mumbayã nguia re? ¿Jeñee nguiatu ra aba mumbayã nguia re? Dios cheẽ aba mumba aroneate. ¿†jêje re?

20 ¿Mañi nda aba umaesa reneiã nde? ¿Mañi nda aba uchiandu abe reneiã ne no? † que Pedro ee ra. Juan abe.

21 Ererecua ñee icuã Pedro je. Juan abe je. — Nandembusiquiche nandechesi, † raque. Hui chõ ngue esi cote ra. Embasiã mondo cote. Ererecua ireĩte mbia tubiriã si. Nyebe eiruã nuã eã nguia. Pedro ecuatayã mbucherõ mose mbia ñee turã turã ño nguia Dios rĩ neaẽ. Nyebe ererecua ireĩte riqui nguia esi.

22 Ae Dios mbucherõ nae, aque amei. Cuarenta años que ae ra.

Urembusiquicheã, † equiato Dios je

23 Mbia rerecua hui ja Pedro si. Juan abe si. Nyoĩ nguesenda mbiirandu ja mbia rerecua cheẽ ndese. Amei ñee ndese. Sacerdotes cheẽ ndese. Nguesenda mbiirandu ja.

24 Eresenda eandu mose que ñee ja Dios je ra. Ñee nyecha ee. —Dios, urererecua tuchi nde. Nde rei mbae aosa. Ibei aosa. Ibi aosa. Ama abe aosa no.

25 Sã David erembucheẽ nderimba cose no. Sã eĩ erembucheẽ no:

¿Mbaerã ño mbia pare pare † ja re?

¿Mbaerã mbia riqui ndua ndua chõõnote mbae mo ndese re?

26 Ibi jenda rerecua ja rei eicuã Dios je.

Mbia rerecua ja ñumunua icuã Dios je.

Ñumunua icuã ja eriirí abe je no. Cristo je,

sã David i cose no.

²⁷ Eĩ si tuchi mbia rerecua quia ñumunua icuã Jesús je co. Nderiirĩ turã je co. Herodes. Poncio Pilato. Judíos. Judíos eã abe no. Ñquĩ ja que siqui icuã icuã nguia Jesús je ra. Ndechiirabo raque Jesús.

²⁸ Eĩ ere que ñee cose, eĩ si eicuã nguia ã namo.

²⁹ Echiisaquia echeẽ icuã ndese, Urererecua. Nandembusiquiche, i tuchi equia ure rĩĩ ã. Urembusiquicheã na, Urererecua. Urembusiquicheã ndecheẽ nenei nenei sacuã.

³⁰ Ndequirãcuã embu ure je. Mbia rasi mbucherõ cherõ sacuã. Mbia mae sayã naa naa sacuã. Jesús rĩĩ. Nderiirĩ turã nĩi, i que Pedro resenda ñee nyecha Dios je ra.

³¹ Ñeende Dios je que ibi nyere ee ra. Ñumunuásaa que ibi nyere mbia je ra. Espíritu Turã ngue ique tuchi echiangui re ra. Esiquicheãte que mbia mbiirandu randu Dios cheẽ ndese cote ra.

Jesús quiato abeichiã eã

³² Hue rĩ ja Jesús icuasa ndua ndua checha. Eicuasa tubiriã. Ndua ndua ja. —Sembae ae chõ co re, i eã emo umbae je. —Nandembaerã ja chõ ã nde, i umbae ja je nyue.

³³ Jesús chi mbaaquiato que mbia mbiirandu randu tuchi Jesús quera resera. Jesús que uquirãcuã mee mee nguia uchimbaaquiato je ra. Dios que siqui tuchi erese ra.

³⁴⁻³⁵ Mbae tiã eã ngue eriqui Jesús icuasa mo je ra. Tuchuacha que vender i jaaja uchuchua je ra. Ibicha abe que vender i jaaja umbae ibi je no nda. Mbae isiquia que emee mee Jesús chimbaaquiato je cote ra. Jesús chimbaaquiato que emee mee

mbaecha reã ja je cote ra. Nyebe mbae tiã eãte riqui nguiã emo je. Jesús quiato mo je.

³⁶ Sã José no. Bernabé, i Jesús chimbaaquiatu José je. Mbia mbiãsa, i chõ nguiã Bernabé i. Ae rei Chipre jenda. Levita mo ngue ae ra.

³⁷ Ae rei ibicha. Ibi umbae je que vender i ra. Mbae isiquia que emee Jesús chimbaaquiatu je cote ra.

5

Ananías ñee ñooño

¹ Ananías, i que emo je ra. Safira, i que eninisi je ra. Ñquĩ ngue vender i ibi mo je ra.

² —Mbae isiquia ataque nandembuchimi nandembaerã, i nyue. Eataque que emee Jesús chimbaaquiatu je cote ra. Eninisi abe que eicua ja ra.

³ Pedro que ñee Ananías je ra. —¿Mbaerã Satanás ndiqui ique ndechiangui re re? ¿Mbaerã erecheẽ ñooño Espíritu Turã je re? ¿Mbaerã ño mbae isiquia ataque erembuchimi nde? ¿Mbaerã ño ibi ribishoronda erembuchimi nde?

⁴ ¿Mbaerã ño ere? Ibi rei nembae vender i nonde. Mbae isiquia abe rei nembae. Mbia je rocoĩ erecheẽ ñooño chĩ nde. Dios je chõ erecheẽ ñooño nguiã, i que Pedro ra.

⁵ Ananías eandu mose que esi ngoi mano nda. Eandusa que siquiche ja ra.

⁶ Acuanindu mo ngue ngaẽ eraaque uma nda. Nguruchoi que nyati ra.

⁷ Emo mose jiri que mano je ninisi ru ra. Tres horas. Jiranuãte que ngu rese ra.

⁸ Pedro que ñee ee ra. —¿Manya rei ibi ribishoronda re? ¿Nderu ibi ribishoronda queru ja rei re? i que Pedro ee ra. —Ae. Ũquí ja chõ nyeresẽ, ichõiño ngue eninisi Pedro je ra.

⁹ Pedro ñee ee cote. —¿Mbaerã ere? ¿Mbaerã jendua nduachĩ ũquí ndese re? Jeñee ñooñoĩ nguiã Espíritu Turã je. Ae nderu curuchoi nyati nae, ũquí nyi nderaarõ arõ a. Eiquesa ji a. A ecuaẽ ndererao sacua a, i que Pedro ee ra.

¹⁰ Pedro cheẽ mose tuchi que esi ngoi mano nda. Ngu rã si. Pedro resa rae mano. Acuanindu que ique ja eraaque rea ra. Nguruchoi que nyati ra. Eru atiquia jii que eruruchoi nyati ra.

¹¹ Jesús icuasa que siquiche jate ra. Eandusa abe que siquiche jate no nda.

Mbia mae sayã

¹² Jesús chimbaaquiato que Dios quirãcuã teacuquia cuquia mbia je ra. Mbia mae sayã ngue esaã saã nguia mbia je ra. Milagros, i que ũquí je ra. Jesús icuasa que ñumunua nua ja quia eiquesaa ra. Portal de Salomón, i que eiquesa je ra.

¹³ Jesús icuasa rĩ ngue mbia ñee turã ja quia ra. Mbia ataque que siquichete ra. Nyebe ñumunua eã nguia erese.

¹⁴ Jesús icuasa tubiriãt e que cote ra. Hombres tubiriã. Mujeres abe tubiriã no.

¹⁵ Erasi abe que mbia curuchoi choi quia ñeenda jie ra. Huee que eriqui eno eno ngua ye ra. —Sã Pedro aĩ ño ubi ubi erasi rese, i que mbia ñee Pedro ucua mose ra.

¹⁶ Jerusalén ndurubinda abe que ngaẽ ngaẽ nguia ra. Erasi rurucuaẽ cuaẽ Jerusalén. Aba

checuayã nyireco abe que ecurucuaẽ cuaẽ nguia ra. Dios que embucherõ cherõ ja quia ra.

Jesús quiato tarõ policíaa

¹⁷ Sacerdote rerecua que paama i ra. Saduceos mo abe que chi erese ra. Ñquĩ abe que paama i no nda.

¹⁸ Nyebe que Jesús chimbaaquiato isi icuã nda. Tarõ ngue policíaa ra.

¹⁹ Isa que ibatenda mo nguichi ee ra. Angel. Etaronda que embuquiata ra. Jesús chimbaaquiato que equerao itaicuee ra. Ñee nonde ee.

²⁰ —Dios chuchúaa jëso. Mbia je mbiirandu randu tuchi Dios cheẽ ndese. Dios cheẽ ndei aba mingosa. Aque rese mbia jemiirandu randu, i que ibatenda Pedro je ra. Juan abe je.

²¹ Jesús chimbaaquiato eandu mose que echoi Dios chuchúaa ra. Mbia mbaaquiato quiato que echoi ra. Isamamimbe cote. Isamamimbe echoi mbia mbaaquiato. Sacerdote rerecua que “jenyu” i mbia rerecua ja je ra. Sacerdote resenda abe. Amei je abe ñee. Ñmunua ja u nyiese. Ñee ngue policíaa raarõsa je cote ra. —Jëso policíaa. Jesús chimbaaquiato jendu rã ure je, i rei que ee ra.

²² Ecuasẽ mose policíaa que Jesús chimbaaquiato oreã ño ee ra. Ae nyebi chõ ecuaẽ nguiã sacerdote rerecua mbiirandu. Ñee ee.

²³ —Puerta atã ngue chi ndei nguiã ure je. Soldados ngue chi rei nguiã itaicuee. Eraarõ ndaque. Ureequia rei ngue re. Eoreã ngue ra. Jesús chimbaaquiato oreãte que ure je ra, i que ra.

24 Sacerdote rerecua que nyuruira eandu ra. Dios chuchua raarõsa abe nyuruira eandu. —¿Mañi mañite equia re? i que u ñee ñee nyue ra.

25 Emo ngue tu ñee ee cote ra. —Huee que jenyitarõ nyi Dios chuchúaa ra. Mbia mbaaquiату quiatu, i que embiirandu ra.

26 Eandu mose que Dios chuchua raarõsa nyoï erea ra. Nguesenda rese echoï erea. Curucuaë ja nguerecua je. Curucuaë turã. —Mbia tubiriã nda sita mombo mombochĩ nande je, i ñene. Nyebe eicuã eã ee.

27 Jesús chimbaaquiату que ecurucuaë mbia rerecua je ra. Sacerdote rerecua que ñee ee cote ra.

28 —“iMbia ra jembiirandu randuchĩ Jesús rese jẽ!” ure rei que jẽje. Urecheẽ jemumba chõchĩ. Jerusalén jenda ja jembiirandu randu chõchĩ nguiã. “Jesús iquiasa chõ ũquĩ nde”, ijenyechĩ nda ure riĩ jẽ! i que sacerdote rerecua Jesús chimbaaquiату je ra.

29 Pedro que echeẽ sibishorõ nda. Nguesenda rese echeẽ ndibishorõ. —Dios cheẽ nguia aba mumba aroneate nguia. Mbia cheẽ nguia nda aba mumba jiri nguia ña.

30 Jẽ nguia Jesús jembucha nguia ira rese. Eiquia sacua. Dios que embuquera si ra. Nanderu rerecua que embuquera si ra.

31 Dios que nguiirĩ mingo mbia rerecuarã tuchi cote ra. Ujii bei que emingo ra. Mbia rerecuarã. Mbia rirõ sacua eicuã si. Israel jenda mbui sacua huicuã si. Dios eicuã mbutiã sacua esi.

32 Ũquĩ ndese que uremae ja ra. Nyebe ureico nguia mbia mbiirandu randu ã. Espíritu Turã abe

mae ja erese. Nyebe a e abe riqui nguiã mbia mbiirandu randu co. Dios quia Espíritu Turã mee mee nguiã ucheẽ mumbasa reã je, i que Pedro ra.

³³ Ererecua que paama i ja Pedro cheẽ mose ra. Nyebe eriqui nguiã eiquia ja serĩte.

³⁴ Fariseo mo abe que chĩ erese ra. Gamaliel, i que ee ra. Ae abe que ererecua ra. Mbia chĩcua jat e que ae ra. Mbia mbaaquiato quiatusa que ae ra. Dios cheẽ nenei neneisa que ae ra. Ae que juã ñee nda. —Jesús chimbaaquiato jemondo mbiirĩ conosẽ itaicuee, i que ra.

³⁵ Ñee ngue ererecua uataque je cote ra. — Tacheẽ jêje, Israel jenda. ¡Jendua tuchi jê! ¡Jëocochĩ nda Jesús chimbaaquiato rese jê!

³⁶ ¿Teudas si jêtesarei re? ¿Jendua eãte quia erese re? Teudas quiato ucuasu saã saã nguia resẽ. Erimbarã tubiriãte chee. Cuatro cientos chee erimba. Mbia Teudas iquia chee. Teudas mano nyee. Erimba que saseĩ saseĩ ja chee. Erimba que ua ja ra.

³⁷ Aquere que Judas abe riqui ra. Galilea jenda. Censo mose. Mbia que siqui jate erui no nda. Erimbarã. Ae abe que mano cote ra. Erimba abe que saseĩ saseĩ nda. Erimba que ua ja no nda.

³⁸ Nyebe ã jêteachõ. Jesús chimbaaquiato jêteachõ. Sã ae ae quia ua, Dios siquiã mose erese.

³⁹ Dios quirãcuã siqui mose erese ra nandesiquisã aronea. ¿Mañi nande ra eriquisã nde? ¡Jesús rimba nandeteachõ ño jê! Dios quirãcuã nguia siqui rei erese. Dios je ra nandeicua abareãte, i que Gamaliel ra.

⁴⁰ Gamaliel cheẽ ndui si chõ ngue ererecua siqui ja nguiã cote. —Jenyu, i nguiã Jesús chimbaaquiato

je cote. Iruã nua cote. —¡Mbia je ra Jesús cheẽ jẽsenei senei sichĩ core jẽ! i rei que ee ra. Ererecua que hui esi cote ra.

⁴¹ Jesús chĩmbaaquiato que nyoĩ mbia rerecua recha cote ra. Eyate que nyoĩ ra. —Jesús rĩĩ ño ureĩruã nua nguiã, i que ra. Eya tuchi chõ ngue ra.

⁴² Mbia que embaaquiato quiato bei ra. Jesucristo rĩĩ mbia mbiirandu randu bei. Mbia chuchua que embuchesea sea quia mbia mbiirandu randu Jesús rĩĩ nda. Dios chuchúaa abe mbia mbiirandu randu.

6

Mbia siete irabo mbia mbuquiaru sacuã

¹ Jesús quiato tubiriãte que cote ra. Ae griego cheẽ saã nguia, ùquĩ ngue paama i ra. Ae judío cheẽ saã nguia, ùquĩ je que paama i ra. Jesús quiato ja raque. —Ureresenda eru cheecha ja ngue jembuquiaru icuã icuã ñochĩ nguiã, i que griegos judíos je ra.

² Nyebe Jesús quiato rerecua mbia munua nguiã. Jesús quiato munua ja. Ñee sacuã ee. — ã ureico Dios cheẽ nenei nenei mbei mbia je ã. Urehui aronea tuchi quiarei Dios cheẽ si. Mbia urembuquiaru quiaru aroneate. Dios cheẽ nenei nenei ndocoĩ.

³ Nyebe Jesús quiato siete chõ jẽirabo. Mbia mbuquiaru sacuã. Mbia chĩcua siete chõ jẽirabo. Hombres aracua chõ jẽirabo. Espĩritu Turã ndesenda tuchi chõ jẽirabo. Sã ùquĩ ño mbia mbuquiaru quiaru quia.

⁴ Ure quiatu ra urecheẽ mbei quia Dios je. Ure quiatu ra Dios cheẽ uresenei senei mbei quia mbia je, i que Jesús quiato rerecua ra.

⁵ —Coche ñene, i jat e que Jesús quiato ra. Nyebe que siete irabo ra. Esteban irabo. Ae rei Jesús quiato tuchi. Ae rei Espíritu Turã ndesenda tuchi. Felipe. Prócoro. Nicanor. Timón. Parmenas. Nicolás. Ñquĩ ja que eirabo ra. Nicolás ndei Antioquía jenda. Judío eã ngue ae ra.

⁶ Curuchoi ja que Jesús quiato rerecua je ra. Jesús quiato rerecua que o chono ñono ja ñquĩ ãquĩ arõ nda. Ñquĩ siete ãquĩ arõ. Ñee ngue Dios je cote ra.

⁷ Mbia tubiriã ngue Dios cheẽ isi isi quia ra. Jesús quiato tubiriã tuchi que mbia Jerusalén jenda cote ra. Sacerdote tubiriãte abe que Jesús quiato cote ra.

Mbia icuã tuchi Esteban je

⁸ Dios que siqui tuchi Esteban ndese ra. Dios quirãcuã ngue siqui tuchi erese ra. Nyebe eriqui nguiã mbia mae sayã naa naa tuchi mbia je.

⁹ Mbia emo emo ngue paama i Esteban je cote ra. Esclavos Libertados, i que mbia chumunuasa mo je ra. Hue jenda que paama i ee ra. Cirene jenda abe no. Alejandría jenda abe no. Cilicia jenda abe no. Asia jenda abe no. Ñquĩ jate que paama i Esteban je ra.

¹⁰ Ñquĩ ngue Esteban ñee sobeishĩ aroneate quia ra. Espíritu Turã nguia Esteban mbaaracuate nguiã. Espíritu Turã nguia Esteban mbuch eẽ aquiatute nguiã. Nyebe ñquĩ ndiqui Esteban ñee ndibishorõ aroneate.

11 Paama isa que mbae isiquia mee mbia mo je ra. Ñee ñooño nonde Esteban nii. —Esteban ngue ñee icuâte Moisés rĩ nda. Esteban ngue ñee icuâte Dios rĩ no nda, ichõiño nonde Esteban nii.

12 Ñee ñooño je que mbia mbĩcuâte Esteban je ra. Amei abe mbĩcuâte Esteban je no. Embesasa abe mbĩcuâte Esteban je no. Nyebe mbia Esteban isi suruchoi nguiã ererecua je.

13 Ñee ñooño je que ñee icuã si Esteban nii huee no nda. —¡Esteban ngue ñee icuã icuâte quia Dios chuchua rĩ nda jẽ! ¡Dios cheẽ nii abe que Esteban ndiqui ñee icuã icuâte ra jẽ! ichõiño Esteban nii.

14 —¡Esteban ñee ngue urechandu ra jẽ! “Jesús ra Dios chuchua mbucoi. Moisés cheẽ nda Jesús mbutiã”, ¡i que Esteban nda jẽ! ¡ique ñee ñooño ererecua je ra.

15 Mbia que mae ja u Esteban ndese cote ra. Ererecua abe que mae ja u erese ra. Ibatenda nduba rã tuchi quiarei Esteban. Eruba nininya tuchi quiarei ũqui mose.

7

Esteban ñee mbia je

1 Sacerdote rerecua que ñee Esteban je cote ra. —¿Mbia ñee ñooño nguia nderĩ nde? ¡ Esteban je.

2 Esteban ngue ñee oco ee cote ra. —Tacheẽ jẽje, Seresenda. Tacheẽ jẽje, Amei. Dios Turã ngue nyecua u nanderu Abraham je ra. Abraham siqui mose Mesopotamia. Oso nonde Harán.

3 Dios que ñee Abraham je ra. “Ibi mo nguia eso. Nderecua esecha. Nderesenda abe esecha ja. Ibi

mo tateacuquia ndeje. Huee eso rã. Huee quia tereico”, i que Dios ee ra.

⁴ Abraham ngue oso nguecua recha ja ra. Ibi Caldea recha ja. Oso ibi mo. Harán, i que hue ibi je ra. Emo mose que eru mano ee ra. Aquere que Dios Abraham ndurucuaẽ aa ra. A nandeico a. Aa que erurucuaẽ nda.

⁵ Dios que ibi mo mee eã Abraham je ra. Ibi boque ñetẽ mo mee eã tuchi ee. “Ibi tamondo nderiirĩ mbaerã. Ndetiã mose ra amee nderiirĩ je”, i que Dios ee ra. Abraham nguiirĩ ndea eã mose que Dios ñee ee ra.

⁶ “Nderiirĩ nda siqui ja rei mbiamo ndese. Ndetiãmbaa. Mbiamo ndécuaa ra eriqui bei. Mbia icuã tuchi ra eriqui nderiirĩ je. Mbia rimbarã nda nderiirĩ. Cuatro cientos años nda eriqui mbia rimbarã”, i que Dios Abraham je ra.

⁷ “Nderiirĩ mbuquieĩ quieisa ra ambasi mbasi. Ñquĩ mos e ra nderiirĩ cuaẽ usẽ aa. Aa ra ñee ñee turã seje aa cote”, i que Dios ra.

⁸ Dios que ñee Abraham je ra. Abraham ngue Dios cheẽ ñanduchõ eã nda. Nyebe Dios circuncisión ndeacuquia Abraham je cote. Erãcoĩ ire ai o ji je chõ eriqui nguiã circuncisión, i ñquĩ je. Dios cheẽ si embutesareĩã sacua ndei circuncisión. Nyebe Abraham circuncisión saã nguiirĩ je. Eitãquieĩ mose. Ocho días mose. Isaac, i que eriiirĩ je ra. Isaac cuasu mose que ae abenguiirĩ tea ra. Jacob, i que eriiirĩ je ra. Isaac abe que circuncisión saã nguiirĩ je no nda. Embutesareĩã sacua Dios cheẽ si. Jacob abe que nguiirĩ tea ecuas mose ra. Ae abe que circuncisión saã nguiirĩ je no nda. Doce

eririĩ. Ũquĩ ndei nandei cose.

⁹ José, i que Jacob riiriĩ mo je ra. José nongue que paama i ja José je ra. Nyebe José mee nguiã mbia rimbarã cote. Mbia que José isi suruchoi Egíptoo ra. Huee ab e que Dios riqui tuchi José rese ra.

¹⁰ Mbia icuã mose José je, huee que Dios riqui eraarõ tuchi ra. José ia eã eãte que eriqui ra. Dios embaaracua tuchi. Nyebe mbia rerecua turãte riqui nguiã ee. Faraón, i Egipto jenda rerecua je. Ererecuabi tuchi que José riqui ra. Nyebe emingo nguiã ererecuarã. Egipto jenda rerecuarã. Nyebe emingo nguiã uchuchua jenda rerecuarã.

¹¹ Emo mose jiri que mbae tiã mbia je ra. Mbia chiurã tiã ngue Egíptoo ra. Canaán abe mbia chiurã tiã. Nandei riãcuã ja que eriqui cose ra.

¹² Quiata a mbuae que Egíptoo ra. Jacob jirandu mose que nguiiriĩ mondochoi erea ra. “Nandechiurã mo jëisi rã oso”, i que emondochoi Egíptoo ra. Aque ramo tuchi que eririĩ nyoĩ Egíptoo ra. Jacob ndiiriĩ ndei nandei ja.

¹³ Aquere que echoi si uchiurã ndea ra. Aque mose chõ ngue José nyecua nguiã ngõngue je cote ra. Nyeb e Faraón José nongue icua nguiã cote.

¹⁴ José que ngõngue mondochoi ngu rea cote ra. Jacob, i que eru je ra. “Nanderu jendu rã. Jeninisi abe jendu rã. Jendiiriĩ abe jendu rã”, i que José ee ra. Curucuaẽ ja que ra. Setenta y cinco que mbia ra.

¹⁵ Eĩ ngue Jacob oso siri Egíptoo ra. Huee que eriqui bei ra. Mano nyee. Nandei ja abe que chi bei huee ra. Mano nyee.

¹⁶ Emo mose que mbia Jacob quiangue ruruchoi Siquem nda. Ibicua rie que eno huee ra. Ae Abra-

ham isi ibi nyii, huee que equiangué no nda. Huee que nandei quiangué no nda. Ae ibi Abraham isi quia Hanor ndiirĩ si nae, huee que equiangué no nda.

¹⁷ “Cuatro cientos años nda nderiirĩ nyi bei Egíptoo. Aquere Ibi Canaán tamee ee”, i quia Dios Abraham je nyii reaẽ. Cuatro cientos años ua jiri mose que nandei tubiriãte cote ra.

¹⁸⁻¹⁹ Aque mose que emo Egipto jenda rerecua rã cote ra. Ae que jiranuã José rese ra. Nyebe ngue eriqui nguiã nandei mbiriĩ irĩ. Eicuã tuchi que eriqui nandei je ra. “Jendiirĩ itãquieĩ jẽsecha chõ. Sã ae ae mano ja”, i que ererecua nandei je ra.

²⁰ Aque mose que Moisés nyaacuquia ra. Diosbi tuchi que Moisés ra. Nyaacuquia ramo mose. Tres nyasi que esi embutiarõ nyecuayã nda. Mbia rerecua si. Eru abe siqui embutiarõ nyecuayã. Eitãquieĩ mose.

²¹ Nguereco checuayã aroneate chee que ra. Nyebe ererecua riirĩ ngasẽ nguiã ee. Isi turã ngue ra. Mbutiarõ ngue nguiirina nda. Nyucuaaque que ererecua riirĩ nda. Ae que Moisés itãquieĩ mbutiarõ cote ra.

²² Nyebe Moisés mbaaquiatu tuchi nguiã Egipto jenda rã si. Earacua tuchi que ecuasú mose cote ra. I tuchi que ra.

²³ Moisés que ndua tuchi uataque rese cote ra. “Taso rã israelitas rea”, i que cuarenta años mose cote ra.

²⁴ Oso que cote ra. Egipto jenda mo icuã icuã mose israelita mo je que Moisés si ngasẽ nda. Moisés que esiquisã nda. Iquia que ra. Egipto

jenda iquia que ra.

²⁵ Moisés que ñee uchiangui re ra. “Sere senda ra seisi turã. Seicuate rae. ‘Dios chimbu chõ tu nguiã co. Urerirõ sacuã a si’, i ra seresenda serĩ”, i rei ngue Moisés uchiangui re re. Eresenda que eisiã ñochĩ nguiã.

²⁶ Isamami nongue que israelitas mo icuã icuã nyue ra. “Tacheẽ turã ee. fnda eturã si nyue”, i rei que Moisés ra. “¿Mbaerã jẽicuã icuã ndiqui jenyue re? Nande ja chõ nyeresẽ”, i que Moisés ee cote ra.

²⁷ Ae rane eicuã icuã ndiqui nyue nae, a que que ñee icuã Moisés je ra. Moisés maña mondo. “¿Aba nemingo ererecuarã nde? Urereachõ ño ae”, i que ñee icuã Moisés je ra.

²⁸ “Ae ereiquia curi, ¿aque rã si ra seiquia re?” i que ñee icuã Moisés je ra.

²⁹ ã andu mose que Moisés si uchã nda. Ibimo. Madián, i que ibimo je ra. Huee que eriqui arete ra. Nguiirĩ nyeremo ngue etea huee ra.

³⁰ Huee que eriqui arete ra. Cuarenta años. Emo mose que esi turuquia rĩ nda. Ibi ibate jii que eriqui ra. Sinaí, i que hue je ra. Huee que ira ruri riqui sendi ee ra. Tata rendi mbirõ ngue ibatenda mo nyecua ee ra. Angel que nyecua Moisés je ra. Ira ruri rendi ite re que nyecua ee ra.

³¹ Moisés que nyuruira tuchi erea ra. Erurubi que mae tuchi erese cote ra. Dios que ñee ee cote ra.

³² “Dios chõ se re. Ndei rerecua chõ se re. Abraham nderecua. Isaac abe rerecua no. Jacob abe rerecua no. Ñquĩ nderecua ja chõ se re”, i que Dios ra. Moisés que titi titi i ra. Siquichete que mae ndocõĩ erese ra.

³³ Dios que ñeembe ee ra. “Ndeiyao esirõ na. Seturã ño se re. Sésaa ndeiyao esirõ.

³⁴ Serimba rese aico mae mae mbeite Egíptoo co. Mbia icuã tuchite ee. Mbia embasi mbasi beite. Amae mae mbeite que erese ra. Echeseo seo rese que aico mae mbei ra. A achu erirõ sacuã a. Tasirõ eicuã si cote. Eso Egíptoo. Taremondo Egípto cote”, i que Dios Moisés je cote ra.

³⁵ Dios que Moisés mingo mbia rerecuarã cote ra. Mbia rirõ sacuã Egípto si. Mbae icuã si. Mbia que Moisés isi sereã nea nyii ra. “¿Aba nemingo urererecuarã nde?” i que mbia Moisé je nyii ra. Ñquĩ sí je que Dios Moisés mondo si ra. Ererecuarã. Dios que tata rendi ite renda mbucheẽ Moisés je ra.

³⁶ Moisés que mbia mae sayã saã saã nguia nandei je ra. Mbia mae sayã tubiriãte que esaã saã nguia ra. Moisés que mbia curuchoi Egípto si cote ra. Curuchoi que Ama Ireĩ ndasa ra. Moisés que mbia quereco bei turuquia rui ra. Cuarenta años. Mbia mae sayã tubi riãte que esaã saã nguia ra.

³⁷ Amei mose que Moisés ñee mbia je ra. “Dios ra jemo irabo ucheẽ mbuchecua sacuã jẽje. Seraanguia si ra eirabo. ¡Aque cheẽ nda jemumbachĩ jẽ!” i que Moisés israelitas je ra.

³⁸ Moisés bei chõ ngue ererecua ra. Moisés bei chõ ngue nandei quereco quia turuquia rĩ ndesẽ. Ae je chõ ngue ángel ñee ndesẽ. Mbia chumunua mose Ibi Ibate Sinaí. Ibatenda mo ngue ñee ñee u Moisés je ra. Moisés que ñee ñee nandei je cote ra. Ibatenda cheẽ mbuchecua ee. Mbia mingosa cheẽ nenei nenei mbia je. Nandei je.

³⁹ Nandei que Moisés cheẽ ñandu sereãte quia ra.

Echeẽ mumba mumba. “Nyaso rei nyebi Egipto ae”, i que equia ra.

⁴⁰ Nandei que ñee ñee Aarón je ra. Moisés cutiã ngue ñee ñee ee ra. “Mbae raanguia mo esaã jiri ure je ae. Imagen. Urererecuarã. Ae je nda ureico ñee ñee jiri chã. Ae nda urererao Egíptoo chã. Moisés tiãte ure je cote. Ae urereru Egipto si. Maranguiti chõ esi urerecha”, i que mbia Aarón je ra.

⁴¹ Nyebe que Aarón ticuasú raanguia raã ee ra. Imagen. Nandei que mbae iquía iquía ticuasú raanguia je ra. Eroo que emiã ticuasú raanguia jii ra. Mendi que ee cote ra. Mbia ia tuchi que uchiao rese cote ra.

⁴² Ñquĩ icuã tuchi que Dios je ra. Nyebe Dios hui nguiã nandei si cote. Nandererecua, i chõchĩ mbia tenda je cote. Nyasi je abe no. Nyasi tata je abe no. Ñquĩ je chõ mbia riquichĩ ñee ñee. Ñquĩ mose que Dios ucheẽ mbu cote ra. Dios cheẽ mbuchecuaa que Dios cheẽ senei senei mbia je ra. Co rei embesa ji co:

Israelitas, ¿aba je jẽingo mbae roo mendi mendi cose re?

Jẽingo mose turuquia cuarenta años mose.

¿Seje chõ jẽingo mbae roo mendi mendi cose re?

⁴³ Tei. Seje eã ñene.

Jenyiao je chõ jẽingo mbae roo mendi resẽ.

Tuchua ñetẽ jendaso raso bei chõchĩ.

Mbae aingue raanguia resebe. Moloc, i ee.

Aque je chõ jẽingochĩ nguiã ñee ñee.

Seje ñee ñee ndocoi.

Nyasi tata je abe jẽingochĩ nguiã ñee ñee.

Nyasi tata rei Refán mbae.

Mbae raanguia jenyia^o je abete que jẽingo ñee ñee nda.

Nyebe ra jaemondo jembae ibi si.

Babilonia ndobei ra jaemondo.

Mbia rimbarã nda jaemondo,

ĩ que Dios nandei je cose ra.

⁴⁴ Nandei que chi arete turúquiaa ra. Aque mos e que nandei riqui tuchia rurucuata bei cose ra. Mbae ire que tucharã cose ra. Aque tuchiaqui re que mbia riqui ndua ndua Dios rese ra. Dios que tuchia nyao uquia Moisés je ra. “¡Eĩ ere chõ eao jẽ!” ĩ que Dios Moisés je ra. Dios cheẽ ndui si tuchi que Moisés eao ra.

⁴⁵ Moisés manonde que Josué nandei rerecua cote ra. Ae que nandei curuchoi turuquia si cote ra. Ngasẽ nonde ibi mo je. Dios chĩmee, hue ibi je que ngasẽ cote ra. Nandei que guerra saã saã hue jenda je ra. Dios que mbia mombo ja hue jenda ra. Aque mose que nandei riqui tuchia ruruchoi bei ra. Tuchia, ĩ chõ nguiã mbae ire ao ji je. Aque tuchia que equereco bei quia ra. David abe mbia rerecua mose.

⁴⁶ Dios que siqui tuchi David rese ra. David que ñee ee ra. “Tuchia cuasu tasaã ndeje”, ĩ rei ngue David Dios je re. Jacob nderecua rei Dios.

⁴⁷ David ndiirĩ nguiatu que tuchia saã Dios je ra. Salomón, ĩ que eriirĩ je ra.

⁴⁸ Mbia rã eã ndei Dios. Dios siquiã tuchi chõ nguiã tuchiaqui re. Mbia chiaqui re. Dios cheẽ mbuchecuada que Dios cheẽ saã nda:

⁴⁹ Se quia ererecua tuchi re.

Ibatenda rerecua abe rei se.

Ibi jenda rerecua abe rei se no.

¿Mañi nda mbia sechucharã ao re?
Equi re ra aicoã ndesẽ.

⁵⁰ Se quiatu que mbae achao ja resẽ,
i que Dios nandei je ra.

⁵¹ Jeñia icuã ñochĩ. Jëisayã ñochĩ. Espíritu Turã
jëisiteã teã ñochĩ. Jendu rã si chõ Espíritu Turã
jëisiteã teã ñochĩ.

⁵² Jendu icuã bei que eriqui Dios cheẽ
mbuchecuasa ja je ra. Jendu que Dios cheẽ
mbuchecuasa iquia iquia bei quia ra. Ibatenda
Turã nda tu, ae i quia cose nae, ñquĩ abe que jendu
iquia iquia quia cose resẽ. Ibatenda Turã tu mose
que jemee ñochĩ nguiã mbia icuã je ra. Eiquia
nonde que jemee ñochĩ nguiã mbia icuã je.

⁵³ Dios que ángeles mbu rei jëje ra. Ucheẽ nderu
raque jëje. Jë echeẽ mumbayã sacuã. Echeẽ ngue
jemumba mumba bei chõchĩ nguiã, i que Esteban
ñee oco tuchi ee ra.

Mbia Esteban iquia sita je

⁵⁴ Eandusa que paama i tuchi Esteban je ra.
Esteban i quia serĩ.

⁵⁵ Espíritu Turã ngue siqui tuchi Esteban ndese
ra. Esteban ngue mae tuchi ibei rese mbia paama
i mose ee ra. Dios Turã ndese que mae ibate ra.
Jesús rese abe que mae nda. Jesús que chí juã Dios
ji ee ra.

⁵⁶ Esteban ngue ñee nda. —Jemae jë. Ibei
nyiequia rese aĩ mae a. Huee mbia rucucha ñi juã
Dios ji huee. Huee Jesús ñi juã Dios ji huee, i que
Esteban nda.

⁵⁷ Mbia que tasẽ tasẽ tuchi paama i ra. Huisacua que emitao ja Esteban ñee si ra. —Nandecua recua erese, i que o oe Esteban ndese ra.

⁵⁸ Mbia que Esteban curuchoi sucha tubiriã si ra. Huee que sita mombo mombo erese ra. Sita mombo mombosa que huirao mbui mbui acuanindu mo je ra. —Esaarõ, i que ee ra. Saulo, i que eieirao raarõsa je ra.

⁵⁹ Mbia que sita mombo mombo Esteban ndese ra. Sita mombo mombo mose que Esteban ñee Ibatenda je ra. —Aque aso quia ndeje aque, Sererecua Jesús. Seisi cote, i que Esteban Ibatenda je ra.

⁶⁰ Ngoi que nguia ndese cote ra. Tasẽ tasẽte que ñee mombo mombo ra. —Sererecua, a icuã ndaque seje. ¡Erembasi mbasichĩ nda huicua ñi jê! i que Esteban Jesús je ra. Esteban ngue mano cote ra.

8

Saulo icuã Jesús quiato je

¹ —Coche rei mano, i que Saulo Esteban mano mose ra. Aque mose tuchi que mbia icuã icuã tuchi Jesús quiato je cote ra. Jerusalén jenda. Jesús quiato que nyoï ja ñimbuchao Judea rĩ nda. Samaria rĩ abe que echoï ñimbuchao ra. Jesús chimbaaquiato achõ ngue chichõ Jerusalén nda.

² Mbia turã mo ngue Esteban nyati ra. Nyeseo tuchi que eati mose ra.

³ Saulo icuã tuchi que eriqui Jesús quiato je ra. —Jesús quiato tambutiã, i tuchi que Saulo quia ra. Nyebe eriqui nguia mbia chuchua mbuchesea seate. Jesús quiato rea rea ererao sacua tarõ

policíaa. Saulo icuã tuchi que eriqui Jesús quiato je ra.

Samaria jenda Dios cheẽ ñandu

⁴ Ae uchã nyoĩ quia Jerusalén si nae, ñquĩ ngue nyoĩ mbia mbiirandu randu tuchi quia Jesús rĩĩ nda. Mbia recua ja que eriqui nyoĩ nyoĩ mbia mbiirandu randu Jesús rĩĩ nda.

⁵ Felipe que oso Samáriaa ra. Sucha tubiriã mo. Huee que eriqui mbia mbiirandu randu Jesús rĩĩ no nda.

⁶ Dios que Felipe mbuquirãcuã nda. Mbia mae sayã ngue esaã saã nda. Mbia tubiriã ngue nyiisaquia tuchi quia echeẽ ndese ra.

⁷ Aba checuayã icuã ngue Felipe jea jea tuchi mbia si ra. Aba checuayã icuã ngue tasẽ tasẽ nguia huĩ mose mbia si ra. Felipe que mbia cuatayã mbucuata ja quia ra. Mbia umi sayã abe que embucherõ cherõ nguia ra.

⁸ Nyebe hue jenda ia tuchi sucha tubiriã jenda.

⁹ Huee sucha tubiriã ngue Simón ndiqui ra. Brujo que ae nyii ra. Ae que mbia mbiĩrĩ irĩ tuchi quia nyii ra. Mbia Samaria jenda chĩcua tuchi que ae ra.

¹⁰ Mbia que nyiisaquia tuchi quia Simón ñee ndese cose ra. Mbia riirĩ abe que nyiisaquia quia echeẽ ndese ra. —Dios embuquirãcuã tuchi quia co, i rei que mbia Simón nĩĩ nda.

¹¹ Simón ngue mbia mbiĩrĩ irĩ tuchi quia brujería je ra. Nyebe que mbia riqui nyiisaquia tuchi eres e nyii ra.

¹² Huee que Felipe Jesús renei nenei tuchi cote ra. —Dios ra mbia rerecuarã tuchi, i que Felipe

quia hue jenda je ra. Ũquĩ mose que mbia Jesús icua icua tuchi ra. Bautizar i que mbia atate je ra.

¹³ Simón Brujo abe que Jesús icua cote ra. Bautizar i que ee ra. Felipe rui bei que eriqui cote ra. Felipe que mbia mae sayã saã saã nguia ra. Simón ngue nyuruira tuchi quia mae erese ra.

¹⁴ —Samaria jenda riqui Dios cheẽ isi isi tuchiã, i que mbia Jerusalén jenda mbiirandu randu ra. Nyebe que Jerusalén jenda Pedro mondochoi Samáriaa ra. Juan abe mondo.

¹⁵ Ngasẽ mose que ñee Dios je ra. —Espíritu Turã emondo rã Jesús quiato a jenda je, i que Dios je ra.

¹⁶ Espíritu Turã iqueã mose hue jenda chianguire que Pedro choi erea ra. Jesús rimbarã ño ngue mbia bautizar i nguiã ee nyii. Espíritu Turã iqueã ño nguia echianguire nyii reaẽ.

¹⁷ Pedro que o chono Jesús quiato ãquĩ arõ nda. Juan ab e o chono earõ. Espíritu Turã ngue tu Jesús quiato je cote ra.

¹⁸ Simón ngue mae erese ra. O chono mose earõ. Espíritu Turã tu mose ee. Nyebe que mbae isiquia reacuquia Pedro je ra. Juan abe je.

¹⁹ Ñee ngue ee ra. —Sembaaquiato se abe. Ndequirãcuã embu seje. Sã se abe seo tachono ñono mbia arõ. Sã se abe Espíritu Turã quirãcuã tamee mee mbia je. Mbae isiquia tamee jẽje jẽquirãcuã ndibishorõ, i rei que Simón nda.

²⁰ Pedro que ñee asi ee ra. —Sã mbae isiquia nmbae quiachã ja. Nde abe equiachã tuchi. ¡Dios ra uquirãcuã mee eã mbae isiquia ribishorõ jẽ!

²¹ Ndeturã eã ñochĩ ndechianguire. Nyebe ra Dios uquirãcuã mee eã ndeje.

22 ¡Ndeicuã si ehui rã jẽ! Echeẽ ñee Dios je. Sã Dios nendua icuã mbutiã ndesi.

23 ¡Sã ndeicuã tuchi riqui ndechiangui re jẽ! Ndeicuã aicuate quia co, i que Pedro ee ra.

24 Simón ngue ñee Pedro je cote ra. —Echeẽ turã Dios je serĩ. Sã Dios seicuã mbutiã. † nda aquiachãyã esi, i que Simón nda.

25 Pedro que Dios cheẽ senei senei nguia ra. Juan abe esenei senei no. Aquere que echoi nyebi Jerusalén nda. Ñeend a cua jenda que embuchesea sea sucha tubiriã nda. Samaria jenda mbuchesea sea Jesús renei nenei mbia je.

Carro yenda Dios cheẽ ñandu

26 Angel mo ngue tu Felipe je ra. Ibate si que eru nguichi ñee ee ra. —Eso chõ turúquiaa. Eso chõ ñeenda icoĩ Jerusalén icha. Gaza icha abe, i que ibatenda Felipe je ra.

27 Felipe que oso Dios cheẽ nguire ra. Echia o ji mo ngue esobeishĩ ñeenda cúaa ra. Etiopía jenda rei echia o ji. Ae rei ererecua resenda. Candace, i que ererecua je ra. Reina. Mbae isiquia Candace mbae que esaarõ arõ tuchi quia ee ra. Echia o ji oso quiatu quia Jerusalén nyii reaẽ. Oso quia equia Jerusalén ñee ñee sacuã Dios je nyii reaẽ.

28 Uba que u quia uchuchua quitu cote ra. Carro ye que eru quia cote ra. Isaías chimbesa rese que eru quia mae mae carro ye ra. Dios cheẽ.

29 Espíritu Turã ngue ñee Felipe je ra. —Eso rã carro jii, i que ee ra.

30 Felipe que oso ra. Oso que Etiopía jenda andu ra. Isaías chimbesa rese que esi quia maema nda.

Nyebe Felipe ñee ee. —¿Isaías chimbesa checuate eriqui ndeje re? i que Felipe ee ra.

³¹ —Tei. ¿Mañi ae ra eicua re? Aba mo eicuayãte seje resê. Echui rã. Ecoi sejii. Sembaaquiatu rã se, i que carro yenda ee ra.

³² ã Isaías chimbesa rese que eriqui mae mae nda. ã ndei e ã:

Nanderiquicharõsa rei oveja rã.

Mbia que oveja querao eiquiásaa ra.

Mbia que ovejara nyisia sia ra.

Oveja ñee ñeeã ee.

Eĩngue nanderiquicharõsa ñee ñeeã hu#quia mose ra.

³³ Nanderiquicharõsa turãte raque.

Mbia icuã tuchi ee. Mbia eiquiachõ.

Emosenda icuã tuchite ee.

Emosenda eiquia chee.

Nanderiquicharõsa siquiã ibi rĩ cote,

i qu e Isaías embesa ra. Embesa ji rese que Etiopía jenda riqui mae mae nda.

³⁴ Etiopía jenda que ñee Felipe je ra. —Embesa ji embuchecua seje. ¿Aba rĩñ Isaías riqui embesa mbesa re? ¿Mbiamo nĩ eriqui embesa re? ¿Ngũñ eriqui embesa re no? i que Felipe je ra.

³⁵ Felipe que embuchecua ee ra. Mbaaquiatu tuchi que Jesús rĩñ cote ra.

³⁶ Carro que ngasẽ ama moo cote ra. —iCo ama ñi co! ¿Aa ra bautizar ere seje re? i que Etiopía jenda Felipe je ra.

³⁷ —¿Jesús ereicua quia cote re? Jesús icua tuchi mose ra bautizar ae ndeje cote, i que Felipe ee ra. Etiopía jenda ñee ee cote. —Jesús aicuate quia co

cote. Jesucristo rei Dios ndiirĩ. Aicua sequia co cote, i que ra.

³⁸ Carro que embutiba cote ra. Nguichi que esi ra. Ama ndie que echoi ra. Felipe que bautizar i ee cote ra.

³⁹ Usẽ ngue ama si cote ra. Espíritu Turã ngue Felipe querao hue si cote ra. Etiopía jenda que mae eã mbei Felipe rese cote ra. Etiopía jenda ia tuchi que oso ra.

⁴⁰ Felipe que ngasẽ Azótoo ra. Sucha tubiriã ngue embuchesea sea ra. Mbia mbiirandu randu tuchi Jesús cheẽ ndese. Ngasẽ nyee que Cesarea ra.

9

Saulo uba ramo Dios icha rui

¹ Saulo icuã mbei que eriqui Jesús quiato je ra. Taiquia ja, i rei que equia ra. Nyebe que esi ñee sacerdote rerecua je ra.

² —Papel embesa rã sechiraorã. Tarao Damáscoo. Judíos chumunua mose ereacuquia sacuã ee. Jesús quiat o hue jenda taru taru Jerusalén. Ecuasa taru taru quia etarõ sacuã policíaa. Mujeres abe taru. Hombres abe taru taru no, i rei que Saulo ñee icuã Jesús quiato rĩnda.

³ Damasco rurubi mose que tata mo tu tuchi ee ra. Tata mo ngue tu tuchi ee ibate si ra. Tata que Saulo tesae tuchi ra.

⁴ Saulo que ngoi oso íbii ra. Echeẽ mo ngue ehandu ra. —¿Mbaerã ndeicuãte riqui seje re? i que ibatenda ñee ee ra.

⁵ Saulo que ñee ee ra. —¿Aba nde re? i ee. Ibatenda que ñee ee ra. —Jesús rei se. Seje quia ndeicuãte riquichĩ nguiã. Ndeicuã mose seje, nde

sí chõ ereico ñimbasi co. Sã ticuasuriqui nambacua mbuti no. Sã eriqui hui mbaba ira racua echi no. Ñquĩ na tuchi quiarei nde, i que Jesús ee ra.

⁶ Saulo que titi titi i eandu ra. —¿Mañi ae ra sequia se re, Sererecua? i que Saulo Jesús je ra. —Ehuã. Eso sucha tubiriã. Huee ra sequiato mo secheẽ nenei ndeje, i que Jesús Saulo je ra.

⁷ Saulo resend a que siquiche tuchi ra. Echeẽ andu mose. Mbia mô ndese que maeã nda. Nyebe siquichete echeẽ andu.

⁸ Saulo que juã ndei nguesa ira ra. Emae sayã tuchi. Eresayã ngue ra. Nyebe que mbia eo isi suruchoi sucha tubiriã nda. Sucha tubiriã Damáscoo.

⁹ Tres días que eresayã tuchi riqui ra. Aque mose que eresayã mbae mo uãte ra. Aque mose que yu eã no nda.

¹⁰ Huee sucha tubiriã ngue Jesús quiato mo ndiqui ra. Ananías, i que ee ra. Aque nda Dios tea cuu ra. —Ananías, i nda Dios eque re ra. —¿Mbae? i nda Ananías e e ra.

¹¹ —Eso rã Ñeenda Chaa Chaareã. Huee que Judas chuchua ñi nda. Huee eso Saulo rea. Saulo rei Tarso jenda. Hue eriqui ñee ñee seje hue.

¹² Saulo que nderea cuu ra. Ereso que ndeo no erese cuu ra. Eresa que erembucherõ cuu ra. Ñquĩ sí esaã oso ee, i nda Dios Ananías je ra.

¹³ Ananías que teã ndei ra. —Mbia Saulo icuã icua tuchi quia co, Dios. Eicuã tuchi Jesús quiato Jerusalén jenda je. Mbia sembiirandu ja quia co, Dios.

¹⁴ A eru Jesús quiato isi ererao sacuã a. Ñquĩ je chõ sacerdote rerecua embu nguiã a. Uretarõ ja sacuã, i que Ananías Dios je ra. Esiquichete que

Saulo si ra.

¹⁵ Dios que ñee ee ra. —Eso chõ erea. Ae quia airabo mingo serimbarã co. Ae ra Israel jenda mbiirandu randu secheẽ ndese. Ae ra mbia mangue choõnoa jenda abe mbiirandu randu secheẽ ndese no. Ae ra mbiamo nderecua abe mbiirandu randu secheẽ ndese no.

¹⁶ Saulo secheẽ nenei nenei mose ra mbia embasi mbaši tuchi. Mbiam icuã icuã tuchi ra ee serĩ mambi. Uqui ndese Saulo tambiiirandu, i que Dios ra.

¹⁷ Ananías que oso cote ra. Dios cheẽ nguire. Ique que Judas chuchúaa ra. O que echono Saulo rese ra. —Seresenda ereico co cote, Saulo. Jesús que nyecua ndeje ñeenda cúaa, ae sí sembu quia ndeje co. Jesús sembu ndeje co. Espíritu Turã ique sacua ndechiangui re. Nemaesacua abe sembu co no, i que Ananías Saulo je ra.

¹⁸ Aque mose tuchi que sira quishĩ naanguia tu ngoi eresa si ra. Saulo que mae turã cote ra. Jesús quiato que bautizar i Saulo je cote ra.

¹⁹ Saulo que quiaru ñimbuquirãcuã cote ra. Itõ mocoĩ jiri que Jesús quiato rese huee ra. Damasco jenda rese itõ mocoĩ.

Saulo Dios cheẽ nenei namo

²⁰ Saulo que oso oso quia Jesús renei nenei judíos chumunuásaa ra. —Jesús rei Dios riirĩ, i tuchi que equia mbiam je ra.

²¹ Mbiam nyuruira tuchi quia echeẽ andu ra. —Co chõ Jesús quiato iquia iquia quia cose nye. Jerusalén jenda. Co chõ tu a Jesús quiato rerao sacua nye. Co chõ Jesús quiato queraose rete quia sacerdote rerecua je nye. Ae Jesús quiato riqui

quia namo co cote, i que mbia nyuruira Saulo rea ra.

²² Saulo quirãcuã tuchi que eriqui cote ra. Ererecua rã ño eriqui nguiã mbia mbaaquiato quiato Jesús rĩ. —Jesús rei Cristo. Ae jësaarõ arõ nguia, aque rei Jesús, i tuchi que Saulo quia judíos je ra. Judíos Damasco jenda que Saulo cheë sibishorõ aronea nda.

Saulo uchã judíos si

²³ Emo mose jiri que judío rerecua ñee nyue ra. —¡Saulo nandeiquia jê! i rei que ñee nyue ra.

²⁴ Mbia mo ngue Saulo mbiirandu ra. — Nandeiquia, i nda mbia nderĩ nda. Hue echi nyiquitirõ nderese eiquésaa hue. Isa abe echi nyiquitirõ nderese hue, i que embiirandu ra.

²⁵ Itondaru mose que Jesús quiato mo Saulo mbuchemi nda. Nyuchã ngue iru ye ra. Iru resebe que embuquichi mondo etaronda robei ra. Muralla robei.

Saulo siquibe Jerusalén Jesús quiato ramo mose

²⁶ Saulo que oso Jerusalén cote ra. —Taico Jesús quiato rese, i rei que ngasẽ nda. Jesús quiato que siquiche ja esi ra. —Saulo Jesús quiato saã saã ño nguiã nande je co, i rei que mbia ra. Nyebe siquiche rei nguiã esi.

²⁷ Bernabé mĩ ngue Saulo isi turã nda. Ae que Saulo querao Jesús quiato rerecua je ra. Embiirandu tuchi Saulo rese. —Saulo que oso rei Damáscoo ra. Nandererecua Jesús que nyecua ee ñeenda cúaa ra. Jesús que ñee ee ra. Saulo que siqui Jesús rui cote ra. Saulo que siquicheã nguia

Jesús renei nenei Damasco jenda je cote ra, i que Bernabé uataque je ra.

²⁸ Aquere que Jesús quiato Saulo isi turã cote ra. Saulo que siqui are jiri Jerusalén cote ra. Hue jenda Jesús quiato rese que eriqui tuchi ra.

²⁹ Saulo siquicheã ngue eriqui Jesús renei nenei mbia je ra. Ae griego cheẽ saã saã nguia nae, ùquĩ je abe que erenei nenei nda. Ñee asi asi que Saulo je Jesús rĩĩ nda. Saulo abe que ñee tuchi ee Jesús rĩĩ nda. Nyebe mbia riqui nguia “nandeiquia” i Saulo rĩĩ.

³⁰ Jesús quiato que jirandu erese ra. Nyebe Saulo ruruchoi nguia Cesarea. Mondo que echuchúaa sí cote ra. Tarso, i que Saulo chuchua je ra.

³¹ Aquere que mbia icuã icuã eã Jesús quiato je cote ra. Judea jenda je. Galilea jenda abe je. Samaria jenda abe je no. Jesús quiato hue jenda que ñimbuquirãcuã nacuã ja ra. Siqui i i tuchi Jesús rese. Espíritu Turã ngue embeta mbeta ra. Etubiriã nyee. Jesús quiato que Dios cheẽ mumba mumbayã nguia ra.

Jesús quirãcuã Eneas mbucherõ

³² Pedro que mbia mbuchesea sea tuchi quia ra. Oso que Jesús quiato Lida jenda rea no nda.

³³ Hue que umi sayã mo ndiqui ra. Ae ngatayã mbei quia ocho años. Nyaara bei chõ ngue equia ra. Eneas, i que umi sayã je ra.

³⁴ Pedro que ñee ee ra. —¡Jesús riqui nembucherõ a jẽ! Ehuã na. Nderua abe enua, ique Pedro umi sayã je ra. Ñquĩ mose que nyerõ nda.

³⁵ Mbia que mae ja u umi sayã ngata rese ra. Nyebe que mbia Jesús icua ja cote ra. Lida jenda Jesús icua ja. Sarón jenda abe que eicua ja n o nda. Ngãmeĩ ñee si que hui Jesús isi cote ra.

Dios quirãcuã Dorcas mbuquera si

³⁶ Dorcas, i que ari mo je ra. Jope jenda que ra. Dorcas, i que griego cheẽ quiicuã je ra. Jesús quiato que ae ra. Ae que eturã mbei riqui mbia je ra. Ae que mbae mee mee mbei quia mbaecha reã je ra.

³⁷ Dorcas rasi que eiquia cote ra. Mbia que eraaque mbuchasu ra. Mii ngue equesa nongue ibatenda ye ra. Segundo piso.

³⁸ Pedro que siqui aichi ra. Lida, i que sucha tubiriã je ra. Nyebe que Jesús quiato mbia nyeremo mondochoi Pedro reru sacuaã nda.

³⁹ Pedro que oso erese ra. Ngasẽ mose que mbia eruruchoi equesa ibatenda ra. Dorcas raaque rese mae. Hue eru chiecha tubiriã a nyi nyeseo eraaque res e hue. Dorcas chimee tubiriã ngue eteacuquia cuquia u nyue hue ra. Mbia irao tubiriã ngue Dorcas chia ra.

⁴⁰ Pedro que mbia mbusẽ ja mondo taicuee ra. Ngũiã ndese que ñee Dios je cote ra. Aquere que ñee eraaque je cote ra. —Ehuã na, Dorcas, i que ee je ra. Eraaque que nguesa ira mae Pedro rese ra. Nyuruã ngue ngoi cote ra.

⁴¹ Pedro que emua eo rese ra. Jenyu, i que Jesús quiato je cote ra. Eru chiecha ja je abe no. Ngaẽ ngue mae equera rese cote ra.

⁴² Mbia Jope jenda que jirandu tuchi erese ra. Nyebe que mbia tubiriã Jesús icua cote ra.

⁴³ Pedro que itõ mocoĩ hue ra. Sucha tubiriã. Simón curtidor chuchúaa que eriqui uque ra.

10

Pedro oso Cornelio rea

¹ Soldados rerecua mo ngue siqui sucha tubiriã Cesaréaa ra. Italia jenda rei ũqui soldados. Cien ngue soldados ra. Cornelio, i que soldados rerecua je ra.

² Ae que ñee ñee mbei quia Dios je ra. Ae que eturã ndiqui Dios je ra. Mbae isiquia que emee mee tuchi quia mbaecha reã je ra. Echuchua jenda abe que eturã ndiqui Dios je ra.

³ Tenda nyeseco ramo mose que Cornelio ibatenda mo ndea cuu ra. Angel. Echecua tuchi que ee cuu ra. Ique que echuchúaa ee cuu ra. — Cornelio, i que ñee ee cuu ra.

⁴ Cornelio que mae quiatu tuchi erese ra. — ¿Mbae ere, Sererecua? i que siquiche ñee ee ra. Ibatenda que ñee ee cote ra. —Co ereico ñee ñee mbeite Dios je co. Co ereico mbae mo mee mee mbeite mbaecha reã je co. Nyebe Dios ia tuchi riqui nguiã nderese co.

⁵ Huee que Simón Pedro mo ndiqui Jópee ra. Nderimba mo emondochoi erea. Ereru sacua ñee ndeje.

⁶ Huee eriqui Simón Curtidor chuchúaa huee. Am a ndisha rimia eriqui hue. Sã nderimba ecurucuaẽ hue si. Ñee ñee sacua ndeje, i que ibatenda Cornelio je cuu ra.

⁷ Dios chimondo ibatenda que oso Cornelio recha cote ra. Cornelio que ñumumba cote ra. Jenyu, i que ngũimba nyeremo je ra. Aque mii

soldado je abe no. Ae rei Cornelio raarõsa. Ae que ndua ndua bei quia Dios rese ra.

⁸ Ñquĩ je que Cornelio uquereicuã nenei nenei ja ra. —Jẽso Pedro reru Jope si, i que ee cote ra.

⁹⁻¹⁰ Isamami ngue Cornelio rimba ngasẽ Jope rurubi cote ra. Aque mose que Pedro chi tuchia arõ nda. Huee rei equesa nõ. Huee que Pedro chi ñee ñee Dios je ra. Tenda ibate mose que Pedro riãcuã nda. Echĩurã ngue uchi ãte ra. Nyebe que uque u ra. Uchiurã naa mose. Equereicuã ngue cote ra.

¹¹ Ibei que nyiequia ee cuu ra. Tiru icoi que tu ibei si ra. Tiru chimangũiana isi ji que tu nguichi ee cuu ra. Echimangũiana isi ji ja.

¹² Mbae tubiriã ngue tu nguichi tiru icoi y e ee cuu ra. Mbae chumumbara tuchi. Quiaa riinda ja. Mbei abe n o. Nguireĩ abe no. Mbae ibi riinda ja tuchi que chi tiru ye cuu ra.

¹³ Pedro que echeẽ mo ñandu cote ra. —Ehuã na, Pedro. Emo eiquia ndechĩurã, i que ra.

¹⁴ —Tei, Sererecua. Urechĩu eã ño ã ndesẽ. ã mo ngue ureu eã mbei quia ra. Mbaeiaae tuchi ure je judíos ja je, i que Pedro ee ra.

¹⁵ Dios que ñeembe ee ra. —¡Sechĩmee ndechĩurã nda ereisiteãchĩ jẽ! i que ra.

¹⁶ Eĩ si que tiru icoi ru tres veces ra. Mbae chumumba ra ja resebe. Tiru que oso bei ibate cote ra.

¹⁷ Pedro que ñumumba cote ra. Ndua ndua tuchi que uquereicuã ndese ra. Aque mosete que Cornelio rimba ngasẽ nda. —¿Ma Simón chuchua ma nde? i que ngasẽ nda.

¹⁸ —¿Simón Pedro riqui a re? i que ra.

19 Pedro qu e ndua ndua beite quia uquereicua ndese ra. Nyebe Espiritu Turã ñee nguiã ee. —Mbia tres ngaẽ nguia nderequia co.

20 Equichi. Eso rã erese. ¡Esiquicheã oso erese jê! Se chõ ngue ambu nderea resẽ, i que Dios Pedro je ra.

21 Pedro que nguichi u ee cote ra. Cornelio rimba je. —Serequia chõ jenyu nguiã co. ¿Mbaerã jêingo serequia re? i que Pedro ra.

22 —Cornelio quia urembu nguiã nderea co. Ae rei soldados rerecua turã. Judío chí#cua tuchi que ae ra. Eaturãte eriqui Dios je co. Angel que oso ñee Cornelio je ra. “Mbia emondo rã Pedro reru sacua. Pedro cheẽ echandu rã”, i que ángel Cornelio je ra, i que Cornelio rimba Pedro je ra.

23 —Jenyu rã ique. Jengue a, i que Pedro ee ra. Isamami ngue Pedro oso erese cote ra. Jesús quiato Jope jenda abe que nyoĩ erese ra.

24 Isamami ngue ngasẽ Cesarea cote ra. Cornelio que esaarõ arõ nguia huee ra. Nguesenda rese que eriqui eraarõ arõ nda. Nguiirĩ abe rese que eriqui eraarõ arõ nda. —Jenyu Pedro raarõ serese. Echeẽ andu sacua, i nda nguesenda je nyii ra.

25 Pedro que ngasẽ oso Cornelio chuchúaa ra. Cornelio que oo erese ra. Aquere que ngoi ngũiã ndese ñee ñee ee ra. Ibatenda Pedro riqui reĩ nguiã Cornelio je.

26 Pedro que ñee ee ra. —Ehuã na. Dios eã ño se re. Nderã sí chõ se re. Mbia chõ se re, i que Pedro ra.

27 Ñee ñee ngue equia nyue cote ra. Nyoĩ que ique mbia tubiriãsa cote ra.

28 Pedro que ñee ãquĩ je ra. —Se rei judío. Judío

siqui aronea ndaque mbiamo ndese. Judío ique aronea mbiamo nyuchúaa. Ũquĩ jẽicua raque quia ã. Dios que ñee seje cuu ra. Dios que sembaaquiату cuu ra. “Mbiamo abe que eturãte riqui ra. Mbiamo ndese abe eico jiri”, i que Dios seje ra.

²⁹ Nyebe achu jei nguiã ndecheẽ mose co. ¿Mbaerã “echu” ere seje re? i que Pedro Cornelio je ra.

³⁰ Cornelio que ñee ee cote ra. —Hue tenda bei aico ñee ñee Dios je co. Tenda nyese co mose aico bei ñee ñee Dios je co. Se cheẽ mose que ibatenda mo ndu seje ra. Angel. Tu que seje hace cuatro días ra. Tirushĩ tuchi que ecunua nda.

³¹ Ibatenda que ñee seje ra. “Cornelio, Dios ndecheẽ ñandu bei quia co. Dios mae mbei quia nderese co. Mbae mee ndese mbaecha reã je eriqui mae co. Dios riqui ndeicuate co.

³² Mbia mo emondo rã Jópee. Hue Simón Pedro ndiqui hue. Hue eriqui Simón Curtidor chuchúaa hue. Ama ndisha rimiã ndese eriqui hue. Sã nderimba mo erurucuaã aa”, i que ángel seje ra.

³³ Nyebe serimba amondo jei nderea. Coche erechu nguiã seje aa. Ndecheẽ andu sacua ño urecu nguiã aa. Dios cheẽ esenei na ure je cote. Ae Dios mondo ndeje, erenei sacua ure je, i que Cornelio Pedro je ra.

³⁴ Pedro que ñee ee cote ra. —Judíos achõ je eã ño Dios turã ndiqui reaẽ. Mbiamo abe chõ ebi riqui reaẽ.

³⁵ Mbiamo abe ireĩ ireĩ chĩ nguiã Dios si re. Ibimo jenda re. Ũquĩ siqui turã ño nguiã Dios je reaẽ. Nyebe Dios abe eturã ndiqui ũquĩ je reaẽ. Judíos

achõ eã ndaque.

³⁶ Dios que ucheẽ turã mondo judíos je ra. Dios cheẽ turã ngue tu Jesucristo rĩ nda. Ae rei aba mbiasa. Jesucristo rei mbia rerecua tuchi.

³⁷ Judío recua ja que Dios cheẽ turã ndiqui ã ndesẽ. Juan Bautista reco mose que Dios cheẽ ngasẽ judíos ja je ra. Juan Bautista que Dios cheẽ senei senei Galilea ra. Aque mose rane ngue Dios cheẽ ngasẽ judíos ja je cote ra. Ñquĩ jẽicua tuchi quia ã ndesẽ.

³⁸ Jesús siqui turã jẽicua quia resẽ. Jesús Nazaret jenda siqui turã mbei. Dios que Jesús mbuquirãcuã Espíritu Turã je ra. Dios que siqui tuchi erese ra. Nyebe eriqui nguiã mbae turã naa naa. Nyebe eriqui nguiã aba checuayã icuã jea jea mbia si. Ñquĩ jẽicua quia ã ndesẽ.

³⁹ Jesús chĩmbaaquiatsu chõ ureico nguiã ã. Jesús chĩsaã ndese que ureico mae mae huee ra. Judea rui ja. Jerusalén abe que ureico mae mae echisaã ndese ra. Huee Jesús reco mose que mbia eiquia cote ra. Huee que mbia embucha ira rese ra. Eiquia sacuã.

⁴⁰⁻⁴¹ Dios que Jesús mbuquera si cote ra. Tres días mose. Dios que Jesús mbuchecua ure je cote ra. Mbiasa ja je embuchecuayã. Ure je achõ ngue embuchecua ra. Uchiirabo achõ je. Jesús renei nenei sacuã ngue Dios ureirabo ra. Urequiaru que Jesús rese ra. Jesús quera ico. Mbae mo abe que urembei erese ra.

⁴² Jesús que uremondo mbiasa mbiirandu randu sacuã ngũĩ nda. “Secheẽ turã jẽsenei senei nguia mbiasa je. ‘Dios que Jesús mĩ nda. Mbiasa mano je icuã

ndea sacuaã. Manoã je abe icuaã ndea sacuaã. Jesús r a eicuaã tea ja', jenyé quia mbia mbiirandu randu", i que Jesús ure je ra.

⁴³ Dios cheẽ mbuchecuasa ja que embesa mbesa Jesús riĩ cose ra: "Dios turã nda eriqui Jesús icuasa je. Dios ra Jesús icuasa icuaã mbutiã tiã esi", i que Dios cheẽ mbuchecuasa ra, i que Pedro Cornelio je ra.

Espíritu Turã ique judíos eã chianguí re

⁴⁴ Pedro cheẽ mose que Espíritu Turã ndu ique eandusa chianguí re ra. Eandusa chianguí re ja ique.

⁴⁵ Pedro resenda judíos que nyuruira tuchi ra. — Judíos eã je abe chõ Dios riqui Espíritu Turã mondo mondo re, i que judíos Jesús quiato u nyuruira ra.

⁴⁶ Judíos eã ngue mbiamo ñee saã saã nda. Espíritu Turã ique mose echianguí re. Ñee turã ja Dios riĩ. Nyebe judíos ñee. —Ã ñianguí re abe Espíritu Turã iquechĩ. Judíos eã ndaque, i que eandu ra. Pedro que ñee nguesenda je cote ra.

⁴⁷ —Espíritu Turã ngue ique echianguí re cote ra. Nyebe bautizar tae ee i je cote. Emo nda seriquisãyã, i que Pedro ra.

⁴⁸ Nyebe que Pedro bautizar i ee ra. Jesucristo rimbarã ngue bautizar i ee ra. Aquereque ñee ja Pedro je ra. —Eitõ mocoĩ jiri quia ure rese aa, i que ee ra.

11

Pedro Jerusalén jenda mbiirandu ja

¹ Jesús chimbaaquiatu que jirandu erese ra. Judíos eã ndese. Jesús quiato Judea jenda abe que

jiirandu erese ra. —Judíos eã abe riqui Dios cheẽ isi isi ã, i que mbia ee ra.

² Pedro que oso Jerusalén cote ra. Huee que judíos ñee asi asi ee cote ra.

³ —Mbiamo je ereso chõchĩ. Judíos eã je ereso chõchĩ. Judíos eã ndese ereiaru chõchĩ, i que ñee asi Pedro je ra.

⁴ Pedro que embiirandu tuchi cote ra.

⁵ —Emo mose que aico Jope ra. Huee que aico ñee ñee Dios je ra. Mbae mo ngue atea cuu ra. Tiru icoi mo ngue tu ibate si cuu ra. Echimangũiana isi ji que tu nguichi seje cuu ra. Echimangũiana isi ji ja.

⁶ Mbae chumumbara tuchi que tu aque tiru ye cuu ra. Quiaa rĩnda ja. Mbei abe no. Nguireĩ abe no. Mbae ibi rĩnda ja tuchi que chi tiru ye cuu ra.

⁷ Echeẽ mo ngue tu seje cote ra. “Ehuã na, Pedro. Emo eiquia ndechiurã”, i que seje cuu ra.

⁸ “Tei, Sererecua. Urechiu eã ño ã ndesẽ. ã mo ngue ureu eã mbei quia ra. Mbaeia tuchi ure je judíos ja je”, ae rei que ee ra.

⁹ Dios que ñeembe seje ra. “¡Sechimee ndechiurã nda ereisi teãchĩ jẽ!” i que seje ra.

¹⁰ Eĩ si que tiru icoi ru tres veces ra. Oso bei que ibate serecha cote ra.

¹¹ Aque mosete que Cornelio rimba ngasẽ seje ra. Seruruchoi sacuaã ngue ecuaẽ Cesarea si ra. Tres que ngaẽ seruruchoi sacuaã nda.

¹² “Eso rã erese. ¡Esiquicheã oso erese jẽ!” i que Espíritu Turã seje ra. ã nanderesenda seis que nyoĩ serese ra. Urecuasẽ ngue emondosa chuchua ra. Cornelio chuchua.

¹³ Cornelio que uquereicuã senei ure je ra. “Angel mo ngue tu ñee seje ra. ‘Mbia emondo Jópee Simón Pedro rea.

¹⁴ Ae ra ñee ñee nguia jêje. Ndechuchua jenda je abe ra eriqui ñee ñee. Dios jendirõ sacua jêicuã si’, i que ángel seje ra”, i que Cornelio seje ra.

¹⁵ Se ñee namo mose ee que Espíritu Turã nguichi ee ra. Ique que echiangui re ra. Ique que nandechiangui re nyii nae, eĩ si que ique Cornelio chiangui re cote ra. Cornelio chuchua jenda chiangui re abe.

¹⁶ Jesús cheẽ ndese que andua ndua cote ra. Ñ ndei echeẽ ã: “I je que Juan bautizar i rei mbia je ra. Espíritu Turã je bautizar tae jêje cote”, i que Jesús cose ra. Aque rese que andua ndua cote ra.

¹⁷ Nande judíos achõ je eã ño Dios riqui nguiã Espíritu Turã mondo. Judí eã je abe chõ eriqui nguiã Espíritu Turã mondo. Jesús icua mose. ¿Mañi ae ra Dios riquisã se re? i que Pedro ñee oco judíos je ra.

¹⁸ Mbia que Pedro cheẽ sobeishiãte ra. Ñee turã turã ngue Dios je cote ra. —Dios judío eã abe mbui mbui quiatu quia huicuã si reaẽ. Judío eã abe chee ra siqui bei Dios rese nye, i que judíos ra.

Antioquía jenda Jesús quiato

¹⁹ Mbia icuã tuchi que eriqui Jesús quiato je cote ra. Esteban icuia mosebe bei que mbia icuã ndiqui Jesús quiato je ra. Nyebe Jesús quiato choi nguiã uchã Jerusalén si. Emo nyo Feníciaa. Emo nyo Chipre no. Emo nyo Antioquía no. Huee ja que echí Jesús cheẽ turã nenei nenei nda. Judíos achõ

je que echí erenei nenei nda. Judío eã je erenei nenei eã.

²⁰ Chipre jenda rei emo. Cirene jenda rei emo no. Ñquĩ nguia que nyoĩ Antioquíaa ra. Ñquĩ nguiatu que Jesús cheẽ senei senei judío eã je ra.

²¹ Dios quirãcuã ngue siqui tuchi embiirandusa rese ra. Nyebe que hue jenda tubiriã Jesús icua ra.

²² Jesús quiato Jerusalén jenda que jirandu erese ra. Antioquía jenda rese. Nyebe Bernabé mondo Antioquíaa.

²³ Bernabé que ngasẽ ñee Jesús quiato je ra. — Dios turã tuchi riqui nguĩã jẽje co. Aque rese seyate riqui co. ¡Jẽingo tuchi nandererecua rese jẽ! ¡Jẽhuichĩ nda esi jẽ! ¡ tuchi que Bernabé quia mbia je ra.

²⁴ Bernabé turãt e que eriqui ra. Espíritu Turã ngue siqui tuchi erese ra. Ae que Dios icua tuchi quia ra. Nyebe mbia tubiriã ndiqui nguĩã Jesús isi isi.

²⁵ Aquere que Bernabé si Tarso ra. Oso que Saulo requia huee ra. Tea que ra. Nguerao que Antioquíaa ra.

²⁶ Huee que echí bei Jesús quiato mbaaquiату quiatu ra. Un año que echí huee ra. Mbia tubiriã mbaaquiату quiatu bei. Hue jenda je rane ngue “Cristianos” ¡ Cristo quiato je ra.

²⁷ Aque mose que Dios cheẽ mbuchecuaasa mo ngaẽ Antioquíaa ra. Ngaẽ ngue Jerusalén si ra.

²⁸ Emo ngue juã ñee mbia je ra. Agabo, ¡ que ee ra. Espíritu Turã ngue Agabo mbucheẽ ñee nda. — Mbia chiurã eã nda namo jiri. Mbia riãcuã ja ra cote, ¡ que Agabo ra. Echeẽ nguire tuchi que mbae

ua cote ra. Mbia riãcuã tuchi que cote ra. Claudio mbia rerecua mose.

²⁹ Nyebe Jesús quiato Antioquía jenda ñee ñee nyue. —Mbae mo nandemondo rã Jesús quiato Judea jenda je. Nandembae mbae mo nandemondo ee, i que nyue ra.

³⁰ Eĩ ngue umbae mondo mondo Judea jenda je ra. Mee mee ja que Saulo je ra. Bernabé abe je. Ñquĩ ngue ecuruchoi cote ra. Ae emee nguiã Jesús quiato rerecua je. Judea jenda.

12

Mbia Jacobo iquia; mbia Pedro tarõ

¹ Aque mose que ererecua icuã tuchi riqui Jesús quiato je ra. Herodes, i que ererecua je ra.

² Ae que Jacobo ãquĩ ndoso ti quise je ra. Jacobo rei Juan nongue.

³ Judíos ia tuchi que Jacobo ãquĩ ndoso mose ra. —Judíos tambiabe no, i que ererecua ra. Nyebe Pedro abe isi nguiã. Fiesta de Pascua mose que Pedro isi nguiã.

⁴ Tarõ ngue mii mbia icuã tarõsaa ra. Diez y seis soldados que chi eraarõ mbei ra. —Pedro tamee je mbia je. Eiquia sacuã. Fiesta ua mose r a amee ee, i rei que ererecua uchiangui re ra.

⁵ Nyebe que soldados Pedro tarõ ji raarõ tuchi u ra. Pedro resenda que ñee ñee tuchi Dios je ra. Jesús quiato mo. Ñee ñee tuchi que equia Pedro rii ee ra.

Dios Pedro sirõ nyecuayã etaronda si

⁶ Isamami nda ererecua Pedro mee nguiã mbia je chã nde. Eiquia sacuã. —Isamami nda amee

mbia je, i rei que Herodes ra. Aque isa que Pedro uque u soldados joñ ñi nda. Ecuaji que uque u ra. Cadena nyeremo je que ecua ino nda. Soldados nyeremo ngue uqueã u eraarõ nda.

⁷ Ibatenda mo ngue tu Pedro je isa ra. Angel. Nyaashĩ na tuchi que tuchia ra. Mbae resae ja. Ibatenda que oco Pedro rese ra. Emumba. —¡Ehuã asi jê! i que Pedro je ra. Ehuã mose que cadenas nyera eo si ra.

⁸ —Ndeirao emingue ja rã. Ndeiyao abe emingue, i que ibatenda ee ra. Ae que Pedro emingue echeẽ mose ra. —Ndeirao aronda abe emingue. Nyao serese cote, i que Pedro je ra.

⁹ Pedro que oso erese ra. Etaronda si que Pedro rerao cote ra. —Seque re chõ aico rei co, i rei que Pedro ra. Equereicuã eriqui reĩ nguiã ee.

¹⁰ Eraarõsa cuaãcuã ngue echoi quia ra. Eraarõsa jiranua tuchi erese. Ngasẽ nyee que etaronda icoi ra. Fierro que etaronda ra. Etaronda a e que nyeequia ee ra. Usẽ ngue ra. Pe jiri que echoi nyiese ra. Ibatenda que oso Pedro recha cote ra.

¹¹ —Cu u eã ño eriqui re. Echecua chõ eriqui re, i que Pedro eicua cote ra. —Dios chõ ibatenda mo mbu serirõ sacuañde. Serirõ ño equia Herodes si re. Judíos ra seiquiayã cote, i que Pedro uchiangui re ra.

¹² Pedro que ndua ndua huĩ nda. Ae esi nguiã María chuchúaa. María rei Juan Marcos si. Mbia tubiriãte que chi ñumunua huee ra. Ñee ñee ngue u Dios je ra.

¹³ Pedro que ngasẽ eiquesa mbuu mbuu ra. Nyucuaaque mo ngue oso rei ee ra. Rode, i que ee ra.

¹⁴ Pedro cheẽ ngue eicua ra. Eya tuchi que

nyebi asi oso mbia mbiirandu ra. Eiquesa equia rocoĩ Pedro je. —Hue Pedro ñi taicuee hue, i que embiirandu ra.

¹⁵ —Tei. Echeẽ ñooñoa na, i chõ ngue mbia Rode je ra. —Ae beite. Acheẽ ñooñoa ño jẽje re, i tuchi Rode. —Pedro eã ño ñene. Eãingue chõ ñee ndei ndeje, i ja rei que mbia nyucuaaque je ra.

¹⁶ Eiquesa que Pedro mbuu mbuu bei huĩ mbia je ra. Emo ngue oso cheete rei eequia ee ra. Pedro que ique cote ra. Ñumunua je que nyuruira tuchi mae erese ra.

¹⁷ Pedro que mbia mbuquiriri o je ra. Mbae que esenei ja ee cote ra. —Eĩ ngue Dios serirõ setarõsa si ra, i que erenei nenei ja ee ra. — Jacobo jembiiirandu ja rã serese. Jesús quiato ja jembiiirandu, i que Pedro ra. Pedro que oso mbia recha cote ra.

¹⁸ Isamamimbe que soldados pare pare i tuchi ra. Pedro oreã ndese mae. —¿Mañi Pedro usẽ nde? i que u ñee ñee nyue ra.

¹⁹ Herodes que ñee nda. Ererecua. —Pedro jendu rã seje, i rei que soldados je ra. Pedro oreã ngue ee ra. —Sembiiirandu ja rã se. ¿Mañi Pedro si usẽ nde? i que ererecua soldados je ra. Soldados que eicuayãte ee ra. Nyebe que ererecua soldados iquia nguiã. Pedro raarõsa iquia ja. Aquere que Herodes si siri Cesaréaa ra. Judea si siri.

Herodes mano

²⁰ Herodes que mbia chiurã mondo mondo Tiro jenda je nyii ra. Sidón jenda je abe no. Paama i que ee cote ra. Nyebe echiiurã mondo monoa ee cote.

Nyebe que ùquĩ nyoĩ ja Herodes chuchúaa ra. — ¡Nandeturã mbei chõ ee jê! † nda nandechiurã mon-dobe nande je, i que nyue ra. Herodes resenda mo ngue ñee turã ee ra. Blasto, i que aque je ra. — Echeẽ turã turã Herodes je ure rĩ. † nda eturambe ure je, i que mbia Blasto je ra.

²¹ Emo mose jiri que Herodes huĩrao turã mingue ra. Ngoi que ngũenda icoi tose ra. Jenyu seje, i que Tiro jenda je cote ra. Sidón jenda je abe no. Herodes que ñee ocote ùquĩ je cote ra.

²² Mbia abe que ñeete ee cote ra. —Dios chõ nde resẽ. Dios cheẽ na si nde. Mbia cheẽ na eã, i que mbia Herodes mbucuasú i i ra.

²³ —Dios eã ño se re, i eã mbei que Herodes mbia je ra. Ñee turã eã ngue equia Dios rĩ nda. Nyebe Dios embasi nguiã. Nyebe Dios ángel mo mbu nguiã Herodes mbasi tuchi. Erosei que erie u ra. Eiquia nonde. Mano ngue cote ra.

²⁴ Jesús quiato que Jesús cheẽ senei senei tuchi quia ra. Mbia tubiriã ngue echandu chandu quia ra. Mbia tubiriã ngue Jesús icua icua quia cote ra.

²⁵ Bernabé que nyoĩ Jerusalén nda. Saulo rese. Mbae isiquia ruruchoi sacua. Mbae isiquia que emee mee Jesús quiato hue jenda je cot e ra. Nyoĩ que Antioquíaa cote ra. Juan Marcos abe que ecuruchoi nyiese ra.

13

Espíritu Turã Bernabé mondo Dios cheẽ nenei nenei sacua, Pablo rese

¹ Jesús quiato que ñumunua nua nguia Antioquía jenda ra. Mbia mbaaquiato quiatusa abe que chi

erese ra. Dios cheẽ mbuchecuasa mo abe que chi erese ra. Bernabé, i que emo je ra. Simón nondei abe que ra. Lucio de Cirene abe que ra. Manaén abe que ra. Ae rei que Herodes resenda eñetẽ mose ra. Herodes ererecua nonde. Saulo abe que ra. Ñquĩ ja que mbia mbaaquiatsu quiatusa ra.

² Emo mose que ñquĩ nyi ñmunua nda. Ñee ñee ngue u Dios je ra. Uchiu si que hui ra. Ndua ndua sacua Dios rese. Aque mose que Espiritu Turã ñee ee ra. —Bernabé jemee na seje. Saulo abe jemee na seje no. Ñquĩ ngue airabo ra. Airabo que secheẽ nenei nenei sacua nda, i que Espiritu Turã ñee ñmunua je je ra.

³ Mbia que ñee turã mbei Dios je ra. Quiaruã mbei que u ra. O que echono ñono Bernabé ñquĩ ndese cote ra. Saulo ñquĩ ndese abe no. Mondo que Dios cheẽ nenei nenei sacua cote ra.

Pablo Dios cheẽ senei senei Chípree, Bernabé rese

⁴ Aquere que Espiritu Turã Bernabé curuchoi Selúciaa ra. Saulo rese. —Ama ndui nyao Chipre, i que ua canoa cuasu ye ra.

⁵ Ngasẽ ngue sucha tubiriã Salamina nda. Salamina ndei Chipre jenda mo. Judíos chumunuasaa que echoi Dios cheẽ nenei nenei nda. Juan Marcos abe que siqui erese Dios cheẽ nenei nenei nda.

⁶ Tuchua que embuchesea sea tuchi ra. Ngasẽ nyee Pafos. Huee que brujo mo ndiqui ee ra. Barjesús, i que brujo je ra. Judío mo ndei aque brujo. —Dios cheẽ mbuchecuasa rei se, ichõño mbei que equia mbia je ra.

⁷ Brujo que siqui ererecua rese ra. Sergio Paulo, i que ererecua je ra. Ererecua aquiatu tuchi que ra. —Jenyu, Dios cheẽ tachandu rã, i que ererecua Bernabé je ra. Saulo je abe no.

⁸ Brujo que Bernabé cheẽ siquisã nda. Pablo cheẽ abe riquisã. —I nda sererecua Jesús icuayã, i tuchi brujo ùquĩ ñee ndiquisã. Elimas, i abe que brujo je ra.

⁹ Espíritu Turã ngue siqui tuchi quia Pablo rese ra. Pablo, i abe que equia Saulo je ra. Pablo que ma e quiatu brujo rese ra.

¹⁰ Ñee ngue ee ra. —Mbia mbiirĩ irĩsa tuchi quiarei nde. Diablo resenda tuchi quiarei nde. Mbae turã ndesenda reã tuchi quiarei nde. ¿Mbaerã ereico mbia riquisã quisã Dios icha si re? ¿Manose ra erehui ùquĩ si re? i que Pablo ñee icuã ee ra.

¹¹ —Dios ra nembasi tuchi cote. Nderesayra cote. Tenda rese ra ereico mae eã are jiri, i que Pablo brujo je ra. Echeẽ mosebe que eresa uque tuchi ra. Mae eã mbae rese cote. —Jenyiba taisi. ¡Sembucuata turã na nguia jẽ! i tuchi eresayã nguia mbia je cote.

¹² Ererecua que echandu ja ra. Nyebe ngue Jesús icua nguia cote. Nyuruira tuchi que huĩ Jesús cheẽ andu ra.

Pablo que siqui Antioquíaa ra; Bernabé rese

¹³ Pablo que nyoĩ Pafos recha cote ra. Nguesenda rese que echoĩ ama ndui ra. Ngasẽ ngue Perge de Panfíliaa ra. Huee si que Juan Marcos si nyebi Jerusalén nda. Pablo recha. Bernabé abe recha.

14 Emo mose que echoi Perge si ra. Ngasẽ ngue sucha tubiriã Antioquíaa ra. Pisidia, i que hue ibi je ra. Sábado mose que ique judíos chumunuásaa ra. Huee que echi ngoi ra.

15 Judíos que leer i Dios cheẽ je ra. Moisés chimbesa je. Dios cheẽ mbuchecuasa chimbesa je abe no. Aquere que judíos ñee Pablo je ra. Bernabé je abe no. —¿Mbia ra jembaaquiato quiatu jẽ nde? i que ee ra.

16 Pablo que juã cote ra. O je que mbia mbuquiriri ra. Ñee ngue ee cote ra. —Seandu rã se, Israelitas. Seandu rã se, Dios quiato.

17 Dios que Israelitas rerecua ra. Dios que nanderamei cose ndare irabo ra. Siqui tuchi que equia nanderamei ndese ra. Nanderamei chi mose Egipto. Dios que nanderamei mbeta mbeta ra. Dios quirãcuã ngue nanderamei sirõ nyee Egipto si ra.

18 Dios que nyecuachõ tuchi quia nanderamei je ra. Cuarenta años que eriqui nyecuachõ tuchi ra. Nanderamei chi mose turuquia.

19 Sucha tubiriã jenda que mano ja mbiamo nda. Dios que equia ja ra. Siete rei sucha tubiriã. Canaán jenda. Dios que ñquĩ iquia ja nanderamei si ra. Ñquĩ mbae ibi que Dios mee nanderamei je cote ra.

20 Dios que jueces mii mii nanderamei nderecuarã cote ra. Jueces que emii mii nguia cuatro cientos cincuenta años nda. Aquere que Dios Samuel mii nanderamei nderecuarã nda.

21 Aquere que nanderamei ñee Dios je ra. “Rey mo nguia emii urererecuarã”, i que Dios je ra. Nyebe que Dios Saúl mii ererecuarã nda. Rey. Ae

rei Cis ririĩ. Cis rei Benjaminito. Saúl que siqui arete nanderamei nderecuarã nda. Cuarenta años que eriqui ererecuarã nda.

²² Cuarenta años ua mose que Dios Saúl mombo cote ra. Dios que David mĩ nanderamei nderecuarã cote ra. Saúl rendaque re. David rei Isaĩ ririĩ. Dios que ñee David je ra. “David sebi tuchi. Ae quia ra secheẽ mumba mumbayã”, i que Dios cose ra.

²³ David sí que Jesús ramei nda. Dios que Jesús mbu Israel jenda rirõ sacua huĩcuã si ra. Ucheẽ nguire que Jesús mbu ra. Dios que ucheẽ mbuchebiã nda.

²⁴ Jesús tu nonde que Juan Bautista riqui ñee ñee nanderamei je ra. Israel jenda je. “Jẽicuã si jẽhui. Jemba Dios icha rui. I nda bautizar ae jẽje”, i tuchi que Juan nguia mbia je ra.

²⁵ Umano nonde que Juan ñee mbia je ra. “Ae jẽsaarõ nguia nae, ae eã ño se re. Ae ra tu serui. Ae rei ererecua tuchi sesi. Se oco aronea eiyaõ rese”, i que Juan ñee Jesús riĩ nda.

²⁶ Seresenda, Abraham ndiriĩ ndei jẽ. Jemo ndiqui Dios icua ã. Nande je quia Dios ucheẽ mondo nguia. Nanderirõ sacua nandẽicuã si. Dios que Jesús mondo nande je ra.

²⁷ Jerusalén jenda que Jesús icuayãte ra. Ererecua ja que chi Jesús icuayãte ra. Dios cheẽ mbesa ji abe que eicuayãte ra. Eraã naa mbei raque sábado mose, eicuayã mbei. Dios cheẽ mbuchecua cheẽ nguire que Jesús icua ra.

²⁸ “Jesús eiquia rã”, i tuchi que mbia quia Pilato je ra. Jesús icua eã ndaque.

²⁹ Nyebe que Jesús mano ndei ra. Embesa ji

cheẽ nguire que Jesús mano nda. Jesús raaque que embuquichi ira si cote ra. Ñono ngue sita ribicoi ji ye ra.

³⁰ Jesús que quera si manonde cote ra. Dios que embuquera si ra.

³¹ Galilea jenda que siqui bei quia Jesús rese Jerusalén nae, ñquĩ ngue mae mae equera si rese cote ra. Mae mae mbei equia Jesús quera si rese cote. Ñquĩ ñee mbei quia Jesús rĩ ã cote.

³² A ureico Dios cheẽ turã nenei nenei jêje a. Dios ñee ñee nguia nanderamei je nyii nae, ñquĩ uresenei senei nguia jêje a.

³³ Nande je que Dios Jesús mbuquera si ra. Ucheẽ nguire que embuquera si ra. Dios ñee ñee nguia nanderamei je nyii nae, eĩ si que Jesús mbuquera ra. “Nde rei serucucha. Namu ngue arembuchecua mbia je ra”, i que Dios Jesús rĩ cose ra. Eĩ ngue Salmo dos nda.

³⁴ Dios que Jesús mbuquera si ra. Jesús roo ra soõ eã mbei cote. Nyebe que Dios ñee nyii ra. “Seturãte ra jêje. Seturã David je nyii nae, eĩ si ra seturãte jêje”, i que Dios ra. “Jesús tambuquera si jêje”, i ñene.

³⁵ Co abe rei embesa ji. ã ndei e ã: “Se rei Ibatenda rucucha turã. Ibatenda ra seroo sechayã. Seroo ra emoo eã. Sembuquera si rae”, i que embesa ji ra.

³⁶ David que siqui turã mbei quia uchabenda ja je ra. Dios cheẽ nguire que eriqui turã ee ra. Aquere que mano nda. Mbia que echati ngãmei jii rĩ nda. Aquere que David roo soõ cote ra.

³⁷ Jesús roo quiatu que soõ eã nda. Dios que

embuquera si resẽ. Nyebe ae roo soõ eã nguiã.

³⁸ Seresenda, Jesús mĩ ndiqui nandeicuã mbutiã sacuã co. A ureico ũquĩ nenei nenei jêje a. Jêirandu sacuã erese.

³⁹ Dios que ucheẽ senei senei nguia Moisés je nyii nae, aque cheẽ nguia r a aba icuã mbutiã eã. Jesús mĩ ndiqui nandeicuã mbutiã sacuã co. Nande Jesús icua mose.

⁴⁰ “Mbae icuã nda tuchĩ jêje”, i que Dios cheẽ mbuchecuada ra. Jêtesa bei u jê. Sã Dios cheẽ mbuchecuada io eã jêje. Eĩ ngue Dios cheẽ mbuchecuada ra:

⁴¹ Co jê, mbae turã ucuayãsa.

Je nyuruirã rae. Jemano ndae.

Mbia mae sayã nda asaã ndaque jêje.

Jêicua sereãte ra equia.

Mbia embuchecua raque jêje. Nyebe ra jemano, i que Dios cose ra, i que Pablo ra.

⁴² Pablo que usẽ nyoĩ echumunuasa si cote ra. —Jenyube rã sãbado nongue. Ũquĩ jêsenei seneimbe rã u ure je, i que mbia ee ra.

⁴³ Mbia que usẽ ja echumunuasa si cote ra. Judíos tubiriã ngue nyoĩ Pablo rui ra. Bernabé rui abe no. Judíos resenda tubiriã abe no. Pablo que ñee tuchi mbia je ra. Bernabé rese. —Dios rese jêingo tuchi jê, i tuchi que equia ee ra.

⁴⁴ Sãbado nongue mose que sucha tubiriã jenda ñumunua ja ra. Ñumunua nua ja Dios cheẽ andu.

⁴⁵ Judíos mo ngue chi mae mae mbia chumunua ndese ra. —Pablo cheẽ ño echanduchĩ nguiã. Nandecheẽ andu rocoĩ, i que judíos ngueteã mbia rese

Pablo si ra. Nyebe judíos ñee icuã icuã nguiã Pablo je.

⁴⁶ Pablo que siquicheã tuchi ñee judíos je ra. Bernabé rese. —Jẽ nane je ureico rei Dios cheẽ nenei nenei ã. Dios cheẽ nguire ureico rei nguiã erenei nenei jẽ nane je ã. Ibate jẽingo bei sereã ñochĩ. Nyebe jẽingo nguiã Dios cheẽ isiteã teã ã. Nyebe ureso nguiã erenei nenei judíos eã je co.

⁴⁷ ã ngue Dios ñee ure je cose ra: “Aremingo que secheẽ nenei nenei sacuã mbia ja je ra. Judíos eã ja je. Mbia ibi jenda ja je. Secheẽ isiquia ra siqui bei”, i que Dios ure je ra, i que Pablo ra.

⁴⁸ Judíos eã ia tuchi que Pablo cheẽ ndese ra. Ñee turã turã ngue Dios cheẽ nã nda. Dios que mbia irabo ata ra. Emingo bei sacuã ibate. Ñquĩ ngue Jesús icua ja cote ra.

⁴⁹ Hue jenda ja que embucha mbucha quia Dios cheẽ nenei nenei nda.

⁵⁰ Judíos que mbia mbuqueta queta tuchi Pablo je ra. Bernabé je abe. Ari mbia chũcua mbuqueta tuchi que ra. Amei mbia chũcua abe mbuqueta que ra. Nyebe mbia paama i ja Pablo je. Bernabé je abe. Nyebe Pablo mombo nguiã hue si. Bernabé abe mombo no.

⁵¹ Nyoĩ nondẽ que hui tubi mbutomo tomo mbia je ra. —Jẽicuã tẽicua, i ñe hue jenda je re. Aquere que echoi Iconio nda.

⁵² Jesús quiato ia tuchi que chi ra. Espíritu Turã ngue siqui tuchi quia erese ra.

14

Pablo que siqui Icónioo nda, Bernabé rese

¹ Pablo que ngasẽ Iconio nda. Bernabé rese. Judíos chumunuasa que echoi ra. Dios cheẽ ngue esenei senei huee ra. Nyebe que judíos tubiriã Jesús icua ra. Judíos eã abe que eicua no nda.

² Judíos ataque que Jesús cheẽ isiteã teã no nda. Ñquĩ ngue judíos eã mbiicuã icuã Pablo je ra. Bernabé je abe no. Ñee icuã icuã tuchi erĩ.

³ Pablo que chi arete huee ra. Bernabé abe no. Siquicheã tuchi que equia Dios cheẽ nenei nenei nda. Ebia tuchi Dios rese. Dios que embuquirãcuã nda. Nyebe que eriqui mbia mae sayã naa naa nda. —Ichõño eã ño equia re, i chee mbia Pablo cheẽ je. Bernabé cheẽ je abe no.

⁴ Mbia cuabẽ ndua turã ja eã. Emo emo ngue siqui Jesús resenda rui ra. Emo emo ngue siqui judíos rui no nda.

⁵ Nyebe judíos icuã icuã Pablo je. Pablo resenda je abe no. Judíos eã abe eicuã icuã ee no. Mbia rerecua abe que eicuã icuã ee ra. —¡Pablo nandequia jẽ! ¡Bernabé abe nandequia jẽ! ¡Sita nande mombo mombo erese jẽ! i rei que mbia ra.

⁶ Pablo que jirandu erese ra. Bernabé abe. Nyebe echoi uchã sucha tubiriã mo. Licaonia jenda. Listra, i sucha tubiriã mo je. Derbe, i emo je. Hue rurubi que echoi ra.

⁷ Hue jenda je que Dios cheẽ nenei nenei nda.

Mbia sita mombo mombo Pablo rese

⁸ Ngasẽ ngue Listra ra. Huee que emo ngatayã ñi ee ra. Eitãquieĩ mosenda bei ei icuã. Nyebe ngatayã mbei.

9 Aque que Pablo cheẽ ñandu ra. —Sembucherõ arõ, i ndua uchiangui re. Pablo que eicua ra. Nyebe e mae nguiatu erese.

10 Ñee nyecua que ee ra. —Ehuã ndei rese, i que Pablo ee ra. Ecuatayã ngue juã asi ngata cote ra.

11 Mbia tubiriã ngue chi mae Pablo chimbucherõ ndese ra. Nyebe ucheẽ naa naa u nyue. Pablo rii ñee ñee. —Dios ngaẽ nguichi nande je mbia rã sí a, i rei que nyuruira ra. Tasẽ tasẽ. Licaonia, i hue jenda cheẽ je.

12 Mercurio reĩ nda Pablo mbia je. Mercurio, i mbia umbae dios mo je. Pablo que ñee mbeite quia ra. Nyebe “Mercurio” i mbia ee. Jupiter reĩ nda Bernabé mbia je. Jupiter, i mbia umbae dios mo je no.

13 Hue jenda que ñumunua nua nguia ñee ñee Jupiter je ra. Ae ñee ñee nguia Jupiter je, aque que ticuasú quimbae queru Pablo je ra. Ira uti resebe ereru ee. —Ticuasú nandeiquia iquia rã Pablo je. Nandesei sei ee, i ja que mbia ra. —Pablo rei Dios rã sí. Bernabé rese. Nyebe ticuasú nandeiquia iquia rã ee. Dios raanguia je, i rei que mbia ra.

14 Pablo que echandu ra. Bernabé rese. Nyebe huirao ndoro ndoro paama i ee. —Ureya eã jendese, i ñe ne. Ique que echoi mbia ite ite rĩ nda. Ñee asi asi mbia je.

15 —¿Mbaerã nda re, mbia? ¿Mbaerã nda ticuasú jëiquia ure je re? Mbia chõ ure re. Jẽ na sí chõ ure resẽ. Dios eã ño ure resẽ. Nyebe urechu nguia Dios cheẽ turã nenei nenei jëje ã. ã mbae icuã jësecha ja chõ. Dios quiarei ereco. ¡Ae rui jëingo! Ae que ibei chao ra. Ae que ibi chao no nda. Ae que ama nyao

no nda. Ae que mbae chao ja ra. Mbae aosa rui jẽingo.

¹⁶ Dios que mbia teachõ cose ra. Mbia tesarei mose esi.

¹⁷ Dios que eturã saã saã mbei quia mbia je ra. Mbi a eicua sacuaã. Dios chõ ama mbuchaaqui bei nguiã nande je. Ae quia mbae a mee mbei nguiã nandechiurã. Dios chõ nandembia mbia bei nguiã co, i que Pablo mbia je ra.

¹⁸ Eĩ ngue Pablo embiirandu Dios rese ra. Nyebe que mbia ticuasú iquia eã nyee ee ra.

¹⁹ Emo jiri mose que judíos ngaẽ huee ra. Antioquia si. Iconio si abe no. Uquĩ ngue mbia mbicuã icuã Pablo je ra. Nyebe que mbia sita mombo mombo tuchi Pablo rese ra. Pablo manote reĩ nguiã ee. Mbia que ecuruchoi mbutiriri pe jiri sucha tubiriã si.

²⁰ Hue que Jesús icuasa chi Pablo matãte hue ra. Pablo que juã quera cote ra. Osobe que nyebi sucha tubiriã nda. Isamami ngue esi Derbe ra. Bernabé rese.

²¹ Dios cheẽ turã ngue esenei senei nguia huee ra. Derbe jenda je. Mbia tubiriã ngue Jesús icua hue jenda cote ra. Aquere que nyebi Lístraa ra. Iconioo abe. Antioquíaa abe. Huee sucha tubiriã ngue echoi nyebi ra.

²² Pablo que Jesús icuasa mbaaquiato quiato hue jenda ra. Bernabé rese. —Jesús rese jẽingo tuchi jẽ! Mbia ra nandembasi mbasi tuchi. Aquere ra Dios nandererecuarã tuchi cote, i que Pablo mbia je ra. Bernabé rese.

²³ Amei mo ngue eirabo rabo miĩ ino huee ra. Jesús icuasa rerecuarã no hue. Nnumunua je rere-

cuarã jaaja. Aquere que hui uchiu si ra. Quiaruã. Ñee ñee ngue equia Dios je ra. Ñee ñee ee ererecua namonda riĩ. — ã jẽingo Dios icuate ã. Sã Dios jendaarõ arõ, i que Pablo ererecuarã je ra. Bernabé rese.

Pablo ngãembe Antioquíaa, Bernabé rese

²⁴ Nyoĩ que erecha cote ra. Pisidia, i equia ibi je, hue rĩ ngue echoĩ ra. Ngasẽ ngue Panfilia no nda.

²⁵ Jesús cheẽ turã ngue esenei senei sucha tubiriã Perge jenda je ra. Aquere que echoĩ Atalia no nda.

²⁶ Hue si que echoĩ ama ndui ra. Nguique riita quitu que ecuaẽ tiba Antioquíaa cote ra. Mbia hue jenda rane nguiatu que Pablo mondo Bernabé rese Dios cheẽ nenei nenei sacua nyii ra. — Chã Dios turã jendeaquiato jẽso mose, i que ee nyii ra. Huee que tiba obeĩ cote ra.

²⁷ Ngasẽ mose Antioquíaa, Jesús icuasa que emunua nua cote ra. Mbae ja que esenei tuchi ee ra. — Dios que urereaquiato tuchi quia ra. Dios que urembucheẽ ñee nguia judíos eã je ra. Dios que Jesús icua tuchi ee ra. Nyebe etubiriã ndiqui nguia Jesús icua cote, ure echeẽ nenei nenei mose, i que Pablo ra. Bernabé rese.

²⁸ Chi arete que Antioquíaa ra. Jesús icuasa ja rese echĩ huee.

15

Jesús quiato rerecua ñumunua ja

¹ Judea jenda mo ngue ngaẽ Antioquíaa ra. Ngaẽ ngue Jesús icuasa mbaaquiato quiato icua nda. — Circuncisión jẽsaã saã ja. Moisés cheẽ nguire jẽsaã

saã, i rei que Jesús icuasa je ra. Eracoĩ ire o ji je chõ eriqui nguiã circuncisión, i ùquĩ je. —Eĩ jenyee eã mose ra jẽsoã ibate, i rei que ra.

²—Tei, eĩ eã ñene, i tuchi que Pablo ee ra. Bernabé rese. —Ae beite. Pablo ñee ñooño nguiã, i tuchi Judea jenda. Nyebe ñee tuchi nguiã nyue circuncisión nii. Nyebe Jesús icuasa mondochoi Jerusalén. Jirandu sacua circuncisión ndese. Pablo mondochoi. Bernabé abe no. Mbia mo abe no. Ûqui mondochoi ja. —Jẽso Jerusalén. Jeñee Jesús quiato rerecua je. “¿Circuncisión nda uresaã saã nde?” jenyee oso ee. Sã Jesús quiato rerecua ñee jẽje. Jenyu ñee ure je cote, i que ñee uchimondo je ra.

³Jesús icuasa que embucuata turã cote ra. Mondochoi Jerusalén. Fenicia rui que echoi ra. Samaria rui abe no. Judíos eã je rese que hue jenda mbiirandu randu ra. —Judíos eã abe que Jesús isi isi quia cote ra. Judíos eã ngue hui hui quia huicua si cote ra, i que hue jenda mbiirandu randu ra. Jesús icuasa ia tuchi que eandu ra.

⁴Pablo que ngasẽ Jerusalén cote ra. Bernabé rese. Nguesenda rese no. Hue jenda Jesús icuasa que eisi turã nda. Jesús quiato rerecua abe que eisi turã no nda. Pablo que Dios turã senei senei ee ra. —Dios quirãcuã ngue siqui quia ure rese ra. Ure echeẽ naa naa mose, i que embiirandu ra.

⁵Fariseos Jesús icuasa mo ngue juã ñee cote ra. —Judíos eã Jesús icua mose, circuncisión jẽsaã saã ee. Jeñee na ee. “Moisés cheẽ ndui jẽingo bei”, jenyee chõ ee, i rei que Fariseos ee ra.

⁶Nyebe Jesús quiato rerecua ñumunua ja a que rĩĩ.

⁷Ñee ñee tuchi nyue circuncisión nii. Aquere que

Pedro juã ñee nda. —Tacheẽ se, Seresenda. Dios que seirabo cose ra. Ucheẽ turã nenei nenei sacuaã judíos eã je. Ûquĩ Jesús icua sacuaã ngue seirabo cose ra. Ûquĩ jêicuate quia ã.

⁸ Dios quia aba chiã icua jate nguiã co. Judíos eã je abe Dios Espíritu Turã mondo mondo cote. Nande achõ je eã emondo. Ûquĩ abe je emondo mondo Jesús icua mose no. “Judíos eã abe sequiato”, i ñe Dios re.

⁹ Judíos eã Jesús icua mose, Dios ùquĩ ñia mbiasu cote. Nande rã si. Nyebe Dios riqui nguiã judíos eã je abe siqui turã. Nande rã si.

¹⁰ ¿Mbaerã jêingo Dios cheẽ abi abi chõ nde? Dios cheẽ jembeta mbeta chõchĩ nguia re. Judíos eã je chõ jêingochĩ embeta re. Embeta ji chĩ nda eãtã tuchi aba je cot e re. Ûquĩ nanderu cose ndare saã aroneate.

¹¹ Dios turã nguia nandemingo bei nguiã ã. Dios turã nguia nandemingo bei nguiã ibate. Nande Jesucristo icua mose. Dios turã nguia judíos eã abe mingo bei nguiã ã no. Nande rã si no, i que Pedro ra.

¹² Pablo que mbae senei ja mbia je cote ra. Bernabé rese. Mbia tubiriã ngue quiriri cote ra. Nyiisaquia que Pablo cheẽ ndese ra. Bernabé cheẽ ndese abe. —Dios que urererao judíos eã je ra. Urembirãcuã tuchi que equia ee ra. Nyebe mbia mae sayã uresaã saã tuchi ee, i que Pablo ra. Bernabé rese.

¹³ Pablo cheẽ huire que Jacobo ñee cote ra. —Seandu rã se, Seresenda.

¹⁴ Pedro que ñee jêje namo nda. Dios turãte que judíos eã je ra. Dios que ùquĩ mo irabo rabo

nguesendarã nda. Pedro que jembairandu erese namo nda.

¹⁵ Eĩ ngue Dios cheẽ mbuchecuasa embesa cosete ra. Nyebe eriqui nguiã eĩ eĩ ã cote.

¹⁶ ã ndei embesa ji ã:

Se rei Dios. David reco mose que serimba siqui tuchi serese ra.

Aquere hui ja sesi cote.

Achube ra echiã mbitirõ si cote.

Siqui si ra serese cote.

¹⁷ Judíos eã abe ra siqui serese cote.

Mbia sembaerã nda siqui ja serese cote, i que Dios ra.

¹⁸ Eĩ ngue Dios ñee mbia mbiirandu cose ra, i que Jacobo ra.

¹⁹ —Judíos eã mo ngue Dios icua icua quia cote ra. ¡Nandechẽ nandembetayã jiri ee jê!

²⁰ ¡Nandechẽ mii ño nandembesa mondo ee jê! Nandechẽ mumbayã sacuã. “Mbia soo mondo mondo mose dios raanguia je, ¡aque soo ra jẽuchĩ jê!” nande rã ee. “¡Jeninisi rese siqui rocoĩ nda jẽingochĩ emo ndese jê! ¡Jendu rese siqui rocoĩ nda jẽingochĩ emo ndes e jê!” nande chõ ee. “¡Eruqui resebe ra soo jẽuchĩ jê! ¡Mbae ruqui ra jẽuchĩ jê!” nande chõ ee. Ûquĩ mii nandembesa rã mondo ee. Nandechẽ mumbayã sacuã.

²¹ Ûquĩ mii nande rã ee. Ûquĩ ño mbia ñandu ñandu mbei quia cose ndare bei. Mbia Moisés chimbesa saã saã sucha tubiriã ja je. Sábado mose bei. Judíos chumunua nua mose, i que Jacobo ra.

²² —Coche ñene, i ja Jesús quiato rerecua Jacobo cheẽ je. Jesús icuasa ja abe. Nyebe mbia nyeremo

mondo Pablo rese. Bernabé rese abe. Silas, i que ee ra. Judas, i que enongue je ra. Barsabás, i abe que equia Judas je ra. Ñquĩ ndei Jesús quiato rerecua mo. Ñquĩ ngue emondo Antioquíaa ra. — Urecheẽ jēsenei senei Jesús icuasa hue jenda je, i que Jerusalén jenda ra.

²³ Jesús icuasa que ucheẽ mbesa mondo ee ra. A rei embesai a: —Ure rei Jesús quiato rerecua. Ure rei Jesús icuasa. A ureico embesa mbesa jėje a, Jesús icuasa. Judíos eã je. Antioquía jenda je. Siria jenda je. Cilicia jenda je. Saludos.

²⁴ Ureresenda mo ngue nyoichĩ jembaaquiato icuã icuã nda. Ñquĩ ñee jemingo asi asite rei. “Circuncisión jěsaã saã”, i chõchĩ equia jėje reaẽ. “Moises cheẽ ndui jěingo bei”, i chõchĩ equia jėje re. Ñquĩ uremondo eã ñee jėje. Ae ae chõ nyoĩ nguiã ñee ñooño jėje.

²⁵ Nyebe ureico nguiã ñumunua a. Emo ngue ureirabo emondo sacuã jendea ra. Nyeremo uremondo quia aque. Pablo rese. Bernabé abe rese. Urequiato tuchi que ñquĩ nda.

²⁶ Ñquĩ ireĩ ireĩ eã tuchi nyoĩ Jesucristo cheẽ nenei nenei. Mbia ei quia arondete raque. Siquicheã tuchi.

²⁷ Aque Judas uremondo quia jendea aque. Silas rese. Ñquĩ nda jembiiirandu ja. Ñquĩ nda urecheẽ senei senei jėje.

²⁸ Espíritu Turã ngue urembaaquiato ra. Nyebe ra urecheẽ tuchiã jėje. Echeẽ mumbayã sacuã. Ñ mĩ ño uremondo quia jėje aque.

²⁹ “Mbia soo mondo mondo mose dios raanguia

je, ¡aque soo ra jẽuchĩ jẽ! ¡Eruqui resebe ra soo jẽuchĩ jẽ! ¡Mbae ruqui ra jẽuchĩ jẽ! ¡Jeninisi rese siqui rocoĩ nda jẽingochĩ emo ndese jẽ! ¡Jendu rese siqui rocoĩ nda jẽingochĩ emo ndese jẽ!” Coche ùquĩ je-mumbayã nguiã. Aque mii ño urecheẽ urembesa mondo aque, i que embesa ra. Eĩ ngue Jerusalén jenda embesa ee ra.

³⁰ Uchimondo que emondochoi turã nda. Ngasẽ ngue Antioquíaa cote ra. Jesús icuasa hue jenda que emunua ja ra. Embesa ji que emee ee ra.

³¹ Echumunua mos e que leer i ee cote ra. Eya tuchi que erese ra. Eya tuchi Jerusalén jenda chimbesa isi mose.

³² Dios cheẽ mbuchecuasa rei Judas. Silas rese. Nyebe que ùquĩ Dios cheẽ nenei nenei tuchi Jesús icuasa je ra. Jesús icuasa mbaaquiату quiату tuchi.

³³ Chi are jiri que huee ra. Jesús icuasa que embuchebi turã mondochoi cote ra. Nyoĩ que nyebi Jerusalén nda.

³⁴ Silas que siquichõ nda.

³⁵ Pablo abe que siquichõ Antioquíaa ra. Bernabé rese. Mbia que embaaquiату quiату quia ra. Dios cheẽ turã ngue esenei senei nguia ra. Jesús icuasa tubiriã ngue esenei senei erese ra.

Pablo nyao Bernabé si

³⁶ Aquere que Pablo ñee Bernabé je ra. —Nyao nanderique rui Jesús icuasa mbuchesea sea mae ja erese. Dios cheẽ ngue nandesenei senei, hue jenda mbuchesea sea nyao. Mañi Jesús icuasa u mambi reae. Nyao erea, i que Pablo ra.

³⁷ —Eno. Juan Marcos abe nanderao, i rei que Bernabé ra.

38 —Tei. Ae que nanderecha Panfíliaa nyii resẽ. Hui jei que nande si resẽ, nande Dios cheẽ nenei nenei mose. ¿Mañi nande ra ererao si re? i que Pablo ra.

39 Ñee asi asi chee que nyue ra. Marcos rĩ. Nyebe que nyao nyesi ra. Bernabé que Marcos querao ra. Ama ndui que echoi Chípree ra.

40 Pablo que ñee Silas je ra. —Nyao serese, i que ee ra. Jesús icuasa que ñee ee ra. —Chã Dios turã jendeaquiato bei jẽso mose, i ja que ee ra. Pablo que nyoĩ cote ra. Silas rese.

41 Siria rĩ ngue echoi ra. Cilicia rĩ abe no. Hue jenda Jesús icuasa mbaaquiato quiato que echoi ra.

16

Pablo resenda bei que Timoteo cote ra

1 Pablo que nyoĩ Dérbee ra. Lístraa abe echoi. Huee que Jesús icuasa mo ndiqui ee ra. Timoteo, i que ee ra. Esi rei judía. Esi rei Dios icuasa. Judío eã ngue eru ra.

2 Jesús icuasa hue jenda que Timoteo icua ja ra. Timoteo turãte, i ja que Jesús quiato quia ee ra.

3 —Timoteo tarao serese, i que Pablo ra. Judíos tubiriã ngue chi aque ibi rui ra. —Judío eã ndei Timoteo ru, i ja judíos. Nyebe Pablo circuncisión naa Timoteo je. Nguerao nguesendarã cote.

4 Nyoĩ que sucha tubiriã mbuchesea sea cote ra. Jesús quiato rerecua cheẽ ngue esenei senei ja quia mbia je ra. Jerusalén jenda cheẽ. —jũquĩ ñee nda jemumba mumbachĩ jẽ! i que Pablo nyoĩ quia ra.

⁵ Pablo que Jesús osei uquia Jesús quiato je ra. Jesús icuasa tubiriã nia ngue esi quia cote ra.

Echu urembaaquiato quiatu, i que Macedonia jenda Pablo je cuu ra

⁶—Nyao Dios cheẽ nenei nenei Asia, i rei ngue re. Espiritu Turã ngue nya i ee ra. Nyebe echoi nguiã Frigiaa. Galáciaa abe.

⁷ Ngasẽ ngue Mísiaa ra. Nyao Bitinia, i rei ngue re. Espiritu Turã ngue nya i ee ra.

⁸ Misia que echucuaño nyoï ra. Ngasẽ nyee Troas.

⁹ Huee que Pablo Macedonia jenda mo ndea isa ra. Tea que cuu ra. Chĩ nda juã ñee ñee Pablo je cuu ra. —¡Echu aa Macedóniaa jê! Echu urembaaquiato quiatu, i nda Pablo je cuu ra.

¹⁰ Nyebe ureso nguiã ereare. Se abe que aso erese ra. Se rei Lucas. —Dios urererao quia Macedonia co. Ucheẽ nenei nenei sacua, ure que urechue cote ra. Nyebe urecuata nguiã cote.

Pablo tarõ ji que chi Filipos ra

¹¹ Ama ndui que ureso Troas si ra. Eriimbe que ureso iasa ra. Urecuasẽ nyee que oso Samotracia ra. Isamami ngue ureso Neápolis cote ra.

¹² Hue si que ureso ibi rĩ nda. Urecuasẽ nyee oso sucha tubiriã tuchi je. Filipos, i hue sucha tubiriã je. Romanos mbae rei sucha tubiriã. Macedonia, i que ibi ja je ra. Huee que urecu arete ra.

¹³ Sábado mose que ureso ama nimíaa nda. Sucha tubiriã ndecha. Huee que judíos riqui ñumunua nua mbei ñee ñee Dios je ra. Ari que ngaẽ ngaẽ nguia huee ra. Acuani mo ndese. Urecoi que Dios cheẽ nenei nenei ee ra.

¹⁴ Lidia, i que urecheẽ andusa mo je ra. Ae rei tiru rubi vender isa. Ae rei Tiatira jenda. Ae rei Dios icuasa. Dios que Pablo cheẽ mbuchecua ee ra. Pablo cheẽ ngue eisi ra.

¹⁵ Nyebe que bautizar i ee ra. Echuchua jenda je abe que bautizar i ra. —Se Jesús resenda tuchi mose jẽje, jenyu uque sechuchúaa, i que Lidia ure je ra. Ñee tuchi ure je. Nyebe urererao nguiã uchuchua.

¹⁶ Emo mose que ureso quia mbia ndua nduásaa Dios rese ra. Nyucuaaque mo ngue uresobeishĩ nda. Aba checuayã icuã ngue siqui tuchi quia erese ra. Aba checuayã icuã ngue mbae icua icua quia ee ra. Nyebe mbia mbae isiquia mee mee tuchi quia nyucuaaque rerecua je. Nyucuaaque cha je.

¹⁷ Nyucuaaque que tu Pablo rui ra. Tu ure ja rui. Ñee ngue urerĩĩ nda. —Ñ ndei Dios rimba ã. Ibatenda rimba. A echi aba icuã mbutiãsa nenei nenei jẽje a. A echi Jesús renei nenei jẽje a, i bei que nyucuaaque quia urerĩĩ nda.

¹⁸ I bei que nyucuaaque quia urerĩĩ nda. Pablo que echeẽ nyosei chiã nyee ra. Uba que ñee aba checuayã icuã je cote ra. —Jesús rĩĩ aico ñee ndeje a. Esẽ nyucuaaque si, i que Pablo aba checuayã icuã je ra. Echeẽ mosebe que usẽ esi ra.

¹⁹ Nyucuaaque rerecua que paama i Pablo je ra. —Mbia ra mbae isiquia mondo monoa techĩ nande je cote re, i nyue. Nyebe que Pablo isi ra. Silas rese. Curuchoi que plaza ra.

²⁰ Mondo que mbia rerecua je ra. —Ñ ndei judíos ã. Mbia mbĩcuã icuãte equia ñee ñee ã.

21 “Ure rã jẽingo”, ichĩ nguiã nande je. Romanos ndaque nande. Ñquĩ nandesaã aronea tuchi quiarei, i que mbia nguerecua je ra.

22 Nyebe que mbia paama i Pablo je ra. Silas abe je. Ererecua que eirao mbui asi ra. —Ira je jẽiruã nua, i que ererecua ra.

23 Mbia que eiruã nua tuchi ra. Tarõ ngue cote ra. —Jẽsaarõ tuchi, i que ererecua eraarõsa je ra.

24 Echeende que etarõ tuchi cote ra. Ei abe que emumbi ino ira je ra.

25 Pablo que ñee ñee nguia Dios je itondiite mose ra. Silas rese. Irasei rasei abe no. Etarõi que echandu ja quia ra.

26 Aque mose que ibi titi titi i ra. Etarõsa abe que quiata quiata ja ra. Eiquesa abe que quiata ja ra. Eicuaa que nyera ja cadenas nda. Etarõ ji si que nyera ja ra.

27 Eraarõsa que ñumumba ra. Eiquesa eequia ji rese que mae nda. Etarõ ji uchã nei nguiã ee. Nyebe ñee nguiã. —Tachi#quia, i que tiquise rirõ nda.

28 Pablo que tasẽ ee ra. —¿Mbaerã nda erechi#quia re? ¡A urecu chõte a resẽ! i que Pablo ee ra.

29 —Tata eru, i que eraarõsa mbia mo je ra. Ique que Pablo rea cote ra. Titi titi i tuchi que ra. Ngoi que nguiã ndese Pablo je ra. Silas abe je.

30 Eraarõsa que ecuruchoi taicuee cote ra. Ñee ee. —Sã Dios serirõ seicua si. ¿Mañi ae ra se re? Siqui bei sacua Dios rese re, i que eraarõsa ra.

31 Pablo que ñee ee cote ra. Silas rese. — Jesucristo eicua. Ñquĩ mose ra Dios nderirõ

ndeicuã si. Ũquĩ mose ra Dios ndechuchua jenda
abe rirõ huicuã si, i que Pablo ee ra.

³² Jesús cheẽ ngue esenei senei ee ra. Echuchua
jenda je abe que erenei nenei nda.

³³ Pablo iruã nua ji que eraarõsa irei irei ra. Silas
iruã nua ji abe. Itondii mose raque. Bautizar i que
eraarõsa je cote ra. Echuchua jenda ja je abe que
bautizar i ra.

³⁴ Eraarõsa que Pablo querao mbuquiaru
uchuchúaa ra. Silas abe no. Ey a tuchi que ra.
Echuchua jenda abe ia tuchi. —Nandeico Dios
icua co cote, i ñene. Nyebe eya tuchi Dios rese.

³⁵ Isamamimbe que ererecua ñee policia je ra. —
Jẽso Pablo mbusẽ cote. Silas abe jembusẽ, i que ee
ra.

³⁶ Eraarõsa que ñee Pablo je ra. —A policia cuaẽ
a. Jembusẽ sacua. Hui que jẽsi ra. Jẽso turã cote, i
rei que eraarõsa Pablo je ra.

³⁷ —Nya, i que Pablo ee ra. —¿Mbaerã ererecua
ureiruã ñooño nde? Mbiasa. Mbae icua naa mose
rocoi. Romanos ndaque ur e abe. Uretarõ ñooño
ngue ra. “Nandembusẽ checuayã”, i raque ure je
co cote. Tei. Sã ũquĩ ngaẽ urembusẽ nyecua, i que
Pablo ee ra.

³⁸ Pablo cheẽ ngue policia senei nguerecua je ra.
“Romanos”, i mose que ererecua chiã cuaãcuã i ja
ra.

³⁹ Ererecua que nyoĩ Pablo rea cote ra. Silas abe
rea. —Ureicuã ñochĩ jẽje. Ureicuã eã nda cote. Jẽso
a si cote, i que ererecua embusẽ turã mondo cote
ra.

⁴⁰ Pablo que usẽ etarõsa si cote ra. Silas rese.
Nyoĩ que Lidia chuchua ra. Hue que echi mbirĩ
Jesús icuasa mundua ndua ra. Nyoĩ que hue si cote

ra. Sucha tubiriã si.

17

Pablo que siqui Tesalónicaa ra

¹ Pablo que nyoï Antípolis rĩ nda. Apolonia ñĩ abe echoï. Silas rese. Hue si que echoï ngasẽ Tesalónicaa ra. Huee que judíos chumu nuasa mo huee ra. Sina goga, i equia tuchua je.

² Pablo que oso hue sábado mose ra. Querabe que eriqui oso oso bei judíos chumunuásaa ra. Tres sábado que Pablo mbia mbaaquiату quiату huee ra.

³ Dios cheẽ ngue esenei senei ee ra. —“Mbia ra Cristo mbasi tuchi. Manonde ra quera si”, i que Dios cheẽ nda. Eĩ ngue mbia Jesús je cote ra. Jesús ae rĩ aico ñee ñee jêje, ae rei Cristo. Ae jêsaarõ arõ mbeite quia, aque rei Jesús, i que Pablo embaaquiату quiату ra.

⁴ Emo emo ngue Jesús isi cote ra. Siqui que Pablo rui ra. Silas rui abe. Griegos tubiriã ngue siqui erui no nda. Dios icuasa rei ãquĩ. Griego ninisi tubiriã abe que siqui Pablo rui ra. Mbia chiicua tuchi rei ãquĩ.

⁵ Judíos que ngueteãte quia mbia rese Pablo je ra. Mbia siqui mose Pablo rui. Ae Dios cheẽ andu sereãte quia, ãquĩ ngue ngueteãte quia mbia rese ra. Nyebe ngata chooño je munua nguiã. ãquĩ ngue sucha tubiriã jenda mbupaama i tuchi ra. Mbia tubiriã ngue mbaba chee Jasón chuchua je cote ra. —¿Ma Pablo ma nde? ¿Ma Silas ma nde? Uremee nda mbia icuã je, i rei que judíos ra.

⁶ Pablo oreã ngue ee ra. Silas abe oreã ngue ee ra. Nyebe que Jasón nduruchoi mbutiriri nguerecua je ra. Jasón ndesenda rese. Ñee nguerecua je. —Pablo ngaẽ ñochĩ mbia mbĩcuã icuã ja aa. Pe jenda mbĩcuã icuã jare.

⁷ Jasón eisi turã ñochĩ nguia uchuchúaa a. Ñquĩ icuã ja que eriqui nandererecua je. César cheẽ emumba mumba bei chõchĩ nguĩã ã. “Jesús quia ererecua tuchi César si re”, i chõchĩ Pablo, i que mbia paama i Pablo je ra.

⁸ Mbia ataque eandu mose que paama i ra. Ererecua abe que paama i ra.

⁹ Ererecua que mbae isiquia isi Jasón si ra. Jasón ndesenda si abe. —Uremeembe ra jẽje Pablo choi mose, i que ererecua ee ra. Ererecua que hui ja esi cote ra.

Pablo que siqui Beréaa ra

¹⁰ Jesús icuasa que Pablo mondochoi jei Berea ra. Silas rese. Aque isa mose bei. Ngasẽ ngue Berea ra. Nyoĩ que judíos chumunuasa cote ra.

¹¹ Judíos Berea jenda que earacua ra. Tesalónica jenda si. Berea jenda quiatu que Dios cheẽ ñanduse rete ra. Berea jenda que embesa ji tea jei jei ra. —Ma Pablo ñee Dios cheẽ ndui si, i que nyue ra.

¹² Nyebe que mbia tubiriã Jesús icua ra. Griegos tubiriã abe que Jesús icua ra. Griegos ninisi abe. Mbia chĩcua rei griego s ninisi.

¹³ Pablo que Dios cheẽ senei senei Berea jenda je ra. Judíos Tesalónica jenda que jirandu ra. Jirandure que echoi Beréaa mbia mbĩcuã icuã Pablo je ra.

14 Jesús icuasa que Pablo mondo ama ndisha quití ra. Silas que siquichõ Beréaa ra. Timoteo rese.

15 Ae Pablo curuchoi, ñquĩ ngue tiba esi ra. Atenas, i que sucha tubiriã je ra. —A ureico nyebi a, i que Pablo je ra. Echebi mose que Pablo ñee ee ra. —Silas jembu jei seje. Timoteo rese, i que Pablo ee ra.

Pablo que siqui Atenas nda

16 Pablo que siqui Silas raarõ arõ Atenas nda. Timoteo abe raarõ arõ. Dios abareã tubiriã ngue huee ra. Ñquĩ ndese quiatu que mbia riqui oo tuchi ra. Pablo que mae icuã ñquĩ ndese ra. Pablo que paama ite mbia rese mae nda. Mbia Dios abareã nderequia requia mose.

17 Nyebe Pablo oso oso bei nguiã judíos chumunuasa. Ñee ñee tuchi hue jenda je. Judíos eã je abe ñee ñee tuchi hue jenda mbia je. Dios icuasa je. Plázaa abe que Pablo riqui ñee ñee tuchi mbia je ra.

18 Epicúreos resenda mo ngue ngaẽ ñee tuchi Pablo je ra. Estoicos resenda mo abe que ngaẽ ñee Pablo je ra. —¿Mbae ichõte Pablo quia nande je re? Echeẽse rete eriqui reae, i que emo emo nda. — Dios mo nñi eriqui ñee ñee nande je reae, i que emo emo nda. Pablo ñee ñee mose Jesús rñ. Pablo Jesús quera renei nenei mose.

19 Mbia que Pablo curuchoi ibi ato mo cote ra. Huee que ererecua riqui ñumunua nua mbei ra. Ñee ngue Pablo je cote ra. —¿Mbae rñ ereico ñee ure je re? Embuchecua ure je.

20 ã ngue urechuanate quia ra. Ndecheẽ embuchecua ure je. ¿Mbae ere quia re? i que mbia Pablo je ra.

21 Atenas jenda mingo uquia reã mbae mo ndese. Ae siqui Atenas jenda rese, ãquĩ abe mingo uquia reã mbae mo ndese. Echeemo andu andu bei. Echeemo ndese bei.

22 Nyebe que Pablo juã mbia ite re ra. Ibi ato. Ñe e ngue mbia je cote ra. —Tacheẽ jẽje, Atenas jenda. Dios ata rete rese jẽingo reae.

23 Secuatasa que amae mae dios tubiriã jembae rese ra. Emo ndese que amae nda. “Co Dios mbia mae sayã”, jenye que embesa mi nda. Ae je jẽingo ñee ñee ãquĩ. Jemae sayã ndaque. Ae riĩ aico ñe e jẽje co.

24 Co Dios que ibi chao ra. Mbae ao ja. Ae rei mbae rerecua. Ibi riĩnda rerecua. Ibei jenda abe rerecua. Dios siquiã ño nguiã tuchuaqui re mbia chiao.

25 —¿Aba ra mbae chao seje re? i eã ngue Dios quia ra. Ae quiarei mbae meesa. Nandembuquiarusa rei ae. Nande mingsosa rei ae.

26 Mbia miĩ ngue Dios chao ra. Aque rei mbia i ja aque. Emo eã ño nandeico nguiã ã. Nande ja chõ nandeico nguiã ã. Dios rei nandeaosa. Nyebe Dios mbae rerecua ja. —Co ra nyeacuquia co mose. Co ra mano co mose, i bei que Dios quia ra. Mbia recuarã ngue Dios mee mee mbia je ra.

27 Dios que mbia mingo ibi riĩ nda. ĩ nda mbia Dios requia. ĩ nda mbia Dios icua. Isho eãte Dios riqui a. Nande ja jii eriqui a.

28 Dios riĩ ae nandeico nguiã. Eriĩ ae nandeico nguiã ngata. Jemo abe que ñee nda. “Dios riiriĩ ño

nandeico ja nguiã ã”, i que jemo nda.

²⁹ Ae bei chõ nandeico nguiã ã. Dios riirĩ. “Dios” nandechĩ nguiã mbia chiao je. Oro ao ji je. Plata ao ji je. Sita ao ji je.

³⁰ Dios que mbia icuã teachõ cose ra. Mbia aquiatuã mose. Namõ ño Dios riqui nguiã ñee mbia je co. “Jẽhui chõ jẽicuã si”, i Dios quia mbia jaje co.

³¹ Dios que Jesucristo irabo ra. Jesucristo turã mbei. Jesucristo ra ñee emo je. “Jẽso tata cuasu”, i ra ee. “Jẽso ibate”, i ra emo je no. Manose chõ nda ñee. Dios mi ño eicua nguiã. Dios que Jesucristo mbuquera si manonde ra. Nyebe ra Jesucristo emo mondo ibate. Emo mundo tata cuasu no.

³² —Jesucristo que quera si manonde ra, i que Pablo ee ra. Mbia que iquia iquia chõchĩ nguiã Pablo cheẽ mose. Emo emo ngue ñee ee ra. —Emo mose quiatu ra ndecheẽ urechandu, i que eataque ra.

³³ Pablo que oso mbia recha cote ra.

³⁴ Emo emo ngue siqui erui ra. Ae Jesús cheẽ isi turã, ãquĩ ngue siqui bei erui ra. Dionisio, i que ãquĩ mo je ra. Ae rei mbia rerecua mo. Dámaris, i que cuña mo je ra. Emo emo abe que siqui Pablo rui ra.

18

Pablo que siqui Coríntoo ra

¹ Pablo que oso Atenas ndecha cote ra. Ngasẽ ngue sucha tubiriã mo cote ra. Corinto, i que hue je ra.

² Hue que judío mo ndiqui ee ra. Aquila, i que ee ra. Ponto jenda que ae ra. Priscila, i que eninisi je

ra. Ũquĩ ngue ngaẽ namo Italia si ra. Italia recha ramo. Claudio judíos mombo ja mose Roma si. Pablo que oso Aquila chuchua ra.

³ Pablo que tuchua saã saã nguia mbae ire je ra. Eĩ ngue Aquila no nda. Tuchua raã naa mbei mbae ire je. Nyebe Pablo siquichõ nguiã erese. Quiei quiei erese.

⁴ Sábado mose que Pablo riqui oso oso judíos chumunuasa ra. Hue que eriqui bei Dios cheẽ nenei nenei judíos je ra. Judíos eã je abe no.

⁵ Silas que ngasẽ Macedonia si cote ra. Timoteo rese. Pablo que Dios cheẽ senei senei tuchi quia judíos je cote ra. Jesús mbuchecua checua tuchi ee. —Jesús rei Cristo. Ae jësaarõ arõ mbeit e quia, aque rei Jesús, i tuchi que Pablo ee ra.

⁶ Judíos que paama i Pablo je cote ra. Ñee icuã icuã tuchi que ee ra. Nyebe Pablo huiirao mbaaba aba ee. Taso jendecha, i ñene. —“Aemingo bei ra se”, i rei Dios nande je. Jë nguiarei Dios cheẽ isi sereã tuchi. “¿Mbaerã Dios cheẽ eresenei eã ure je re?” jenyechĩ nda seje. ¡Dios cheẽ ngue asenei tuchi rei jëje ra jë! Nyebe taendecha. Judíos eã je Dios cheẽ tasenei senei cote, i que Pablo huiirao mbaaba aba ee ra.

⁷ Pablo que oso judíos recha cote ra. Judíos chumunuasa jii esi. Justo chuchúaa. Judío eã ndei Justo. Dios quiato que Justo ra.

⁸ Crispo que judíos chumunuasa rerecua ra. Aque que Jesús icua cote ra. Echuchua jenda ja abe que Jesús icua cote ra. Corinto jenda tubiriã ngue Dios cheẽ ñandu ra. Mbia tubiriã ngue Jesús icua cote ra. Bautizar i que cote ra.

⁹ Itondaru mo ngue Pablo Jesús rea ra. Ñee ngue Pablo je cuu ra. —Eresiquichechĩ nda mbia si jẽ. Secheẽ esenei senei mbei. Erehuichĩ nda esi jẽ.

¹⁰ Co aico nderea quiatu co. Mbae icuã nda ñ eã ndeje. Secheẽ esenei senei mbei. Ajenda ra seicua ja jiri cote, i que Jesús Pablo je cuu ra.

¹¹ Pablo que siqui arete Corinto ra. Un año ndobeichõ jiri que eriqui huee ra. Mbia mbaaquiatsu quiatu bei Dios riĩ.

¹² Galión ngue Acayo jenda rerecua ra. Aque mose que judíos ñimbicua tuchi Pablo je ra. Oo que erese ra. Curuchoi que nguerecua je ra.

¹³ Judíos que ñee ererecua je ra.

—Pablo que mbia mbaaquiatsu icuã icuã nguia ra. Dios riĩ. Nandererecua cheẽ ndui eã, i que judíos ra.

¹⁴ Pablo nda ñee nguiã ña. Ererecua Galión nane nguia ñee nguiã esi. Ñee judíos je. —Mbae icuã ndese que Pablo riqui ãte. Eĩ nguia nda jeñee achandu nguiã ña.

¹⁵ Mbae icuã ngue esaã eãte. Pablo cheẽ je chõ jẽingo nguiã paama i. Judíos cheẽ niñ ño jẽingo nguiã paama i Pablo je. Nyebe ra jeñee achana. Jẽ ae jeñee turã jenyue ae, i que Galión judíos je ra.

¹⁶ Mombo ja que uchuchua si cote ra.

¹⁷ Sóstenes, i que judíos chumunua nuasa rerecua je ra. Judíos eã ngue paama i Sóstenes je ra. Isi icuã ngue ra. Iruã nua tuchi que ra. Ererecua Galión ndésaa que eiruã nua nda. Ererecua que teachõ nda.

Pablo tube Antioquía

18 Pablo que siqui atate Coríntoo ra. —Co acua quia jendecha co, i que uataque je cote ra. Jesús quiato je. Aquila abe que oso erese ra. Priscila abe no. Ngasẽ ngue ama nimíaa nda. Such a tubiriã. Cencrea, i que hue sucha tubiriã je ra. Pablo que ua chisia cote ra. —Acheẽ ngue Dios je, a que que amumbayã nda, i que ua sia cote ra. Siria icha rui que echoi cote ra. Ama ndisha icoi tuchi rui.

19 Sucha tubiriã je que ngasẽ cote ra. Efeso, i que sucha tubiriã je ra. Aquila que siquichõ eresebe huee ra. Priscila, i que eninisi je ra. Pablo que oso judío s chumunuásaa ra. Ñee ñee tuchi que judíos je ra.

20 —Eico are jiri aa, i rei que judíos ee ra. Pablo que echeẽ mumba bei oso ra.

21 —Taso Jerusalén. Mbia chumunua mose taico rã Jerusalén. Achube ra mae jendese. Dios sembu mose ra achube mae jendese, i que Pablo ra. Oso que Efeso si cote ra. Ama ndisha rui bei que echoi ra.

22 Ngasẽ ngue Cesaréaa ra. Hue si que Pablo si Jerusalén cote ra. Hue jenda rese que mae nda. Jesús quiato. Hue si que esi Antioquíaa ra.

23 Siqui arete que Antioquíaa ra. Oso que Galacia cote ra. Frigia abe no. Sucha tubiriã ngue embuchesea sea tuchi quia hue jenda ra. Jesús quiato mundua ndua hue jenda.

Apolos Dios cheẽ senei senei

24 Aque mose que judío mo ngasẽ huee ra. Efésoo. Apolos, i que ee ra. Alejandría jenda que ae ra. Dios cheẽ nenei neneisa tuchi mbia je. Dios cheẽ icuasa tuchi.

²⁵ Apolos que Dios icha icuate ra. Mbia que embaaquiату quiату turã tuchi quia ra. Mbia mbaaquiату turã Jesús rĩ. Juan Bautista cheẽ achõ ngue eicua quia ra. Juan bautizar i mose mbia je.

²⁶ Apolos siquicheã tuchi que eriqui mbia mbaaquiату quiату ra. Judíos chumunuásaa. Aquil a que echandu ra. Priscila rese. Nyebe que ãquĩ Apolos rerao mbaaquiату quiату tuchi ra. Dios icha que embuchecua tuchi ee ra.

²⁷ Apolos que orose Acáyaa ra. Nyebe Jesús quiato emondo turã. Papel que embesa Acaya jenda je ra. Jesús quiato je Acaya jenda je. —Apolos jêisi turã, i ee. Apolos que ngasẽ cote ra. Ae Jesús icua quia, ãquĩ mbaaquiату quiату tuchi.

²⁸ Apolos que judíos cheẽ siquisã tuchi ra. Judíos mbia mbaaquiату chooño mose. Jesús rĩ eã. Nyebe Apolos echeẽ ndiquisã. Dios cheẽ ngue esenei senei nguia ee ra. —Jesús rei Cristo. Ae jësaarõ arõ nguia, aque rei Jesús i tuchi que Dios cheẽ nenei ee ra.

19

Pablo que siqui Efésoo ra

¹ Sita ibate bate ite rĩ ngue Pablo si ra. Ngasẽ ngue Efeso cote ra. Apolos siqui mose Corinto. Jesús quiato mo je que Pablo ngasẽ Efésoo ra.

² Pablo que ñee ee ra. —Jê Jesús isi mose, ¿Espíritu Turã abe ique jeñiangui re re? i que Pablo ee ra. —Espíritu Turã ndese ureiranuate, i que mbia Pablo je ra.

³ Pablo que ñee ee ra. —¿Mbae riñ bautizar i jėje re? i que ra. —Juan ñee nñi ngue bautizar i ure je ra, i que Pablo je cote ra.

⁴ Pablo que ñee ee ra. —Juan ngue bautizar i mbia je ra. Mbiam hui mose huñcuã si. “Ae ra tu serui, aque jęcua jęc. Jesucristo chõ aque re”, i que Juan nda, i que Pablo ra.

⁵ Pablo cheẽ andu mose que bautizar i Jesús riñ cote ra.

⁶ Pablo que o chono earõ nda. Espiritu Turã ngue ique echianguire cote ra. Ucheemo ngue esaã saã nguia cote ra. Dios cheẽ ngue embuchecua checua quia mbia je cote ra.

⁷ Doce que ñquĩ nda. Jesús quiato.

⁸ Pablo que oso oso quia judíos chumunuasa ra. Tres meses. Siquicheã tuchi que equia Dios cheẽ nenei nenei nda. —Ererecua tuchi quiarei Dios. Jesús jęcua rã, i que Pablo quia mbia je ra.

⁹ Emo emo ngue Pablo cheẽ ñandu sereã nda. Echeẽ mumba mumba. Jesús riñ ñee icuã icuã mbei mbia ja je. Nyebe Pablo nyao nguia esi. Pablo que Jesús quiato curuchoi esi ra. Curuchoi que Tiranno chuchúaa ra. Huee que eriqui embaaquiato quiato cote ra.

¹⁰ Dos años ngue Pablo riqui huee ra. Nyebe mbia Asia jenda jirandu ja nguia Jesús rese. Judíos jirandu ja erese. Judíos eã abe no.

¹¹ Pablo que mbae saã saã tuchi quia Dios quirãcuã je ra. Mbiam mae sayã ngue esaã saã nguia ra.

¹² Mbiam rasi mbucherõ sacua ngue mbiam riqui tiru mbucha mbucha Pablo rese ra. Ñquĩ tiru que ecuruchoi choi quia mbiam rasi je cote ra. Ñquĩ tiru

ruruchoi mose, mbia rasi que nyerõ nyerõ nguia cote ra. Aba checuayã icuã abe que usẽ usẽ nguia mbia chiã si cote ra.

¹³ Judíos mo ngue ngata beite quia ra. Sucha tubiriã mbuchesea sea bei que equia ra. —Aba checuayã icuã mbusẽ aquiatute que ure ra, i que equia ra. —Jesús rĩ aba checuayã icuã nandembusẽ, i rei que nyue ra. Nyebe que ñee aba checuayã icuã mo je ra. —Jesús quirãcuã ni aico jembusẽ mbia si co. Ae Pablo senei senei nguia, i rei que judíos aba checuayã icuã je ra.

¹⁴ Sacerdote rerecua riirĩ abe que eĩ si ra. Siete eriirĩ. Esceva, i que sacerdote rerecua je ra. Judío que ae ra. Ae riirĩ ngue eĩ si rei no nda.

¹⁵ Ũquí ngue ñee ndei aba checuayã icuã je ra. Aba checuayã icuã ngue echeẽ mumba ra. —Jesús aicua. Pablo abe aicua. ¿Aba chõ jẽ nde? Jaëicuayãte se, i que aba checuayã icuã nda.

¹⁶ Aba checuayã nyireco que oo erese cote ra. Ucuu ucuu tuchi que ũquí ja rese cote ra. Ũquí siete rese. Aba checuayã icuã nyireco quirãcuã tuchi que esi ra. Aba checuayã nyireco que ũquí mbasi ja ra. Nyebe ũquí ndasi rasi uchã aba checuayã icuã si. Eirao eã ngu e nyoĩ uchã itaicuee rĩ nda.

¹⁷ Efeso, i que hue sucha tubiriã je ra. Hue jenda que jirandu ja erese ra. Judíos que jirandu ja erese ra. Judíos eã abe no. Nyebe hue jenda siquiche ja. Nyebe mbia ñee turã turã jate Jesús rĩ.

¹⁸ Jesús quiato mo ngue ngaẽ ngaẽ nguia ra. Eya eãte que huicua ndese ra. Nyebe huicua nenei nenei.

¹⁹ Mbia tubiriã ngue mbae icuã papel mbesa ji

curucuaẽ nda. Libros de brujería. Munua ja que huee ra. Ñquĩ ngue esei sei mbia ja résaa cote ra. Mba e isiquia ata tuchi raque que ñquĩ libros isiquia ra. Cincuenta mil plata.

²⁰ Mbia tubiriã ngue Dios cheẽ isi isi quia ra. Dios cheẽ irãtãte que mbia tea quia cote ra.

²¹ Aquere que Pablo ñee nda. —Taso Macedonia. Acaya abe. Aquere ra aso Jerusalén cote. Jerusalén osore ra aso Roma cote, i que ra.

²² Nguesenda nyeremo ngue emondo Macedonia nda. Timoteo. Erasto rese. Pablo que siquichõ are jiri huee ra. Asia.

Efeso jenda paama i ja Pablo je

²³ Aque mose que mbia paama i tuchi Jesús rĩ nda.

²⁴ Demetrio quia rei mbia mbũcuã icuã nyii. Dios mbuae chuchua que esaã saã nguia ra. Mbae rendi ãtã je que eriqui sucha ñetẽ naa naa nda. Sucha ñetẽ tubiriã ngue esaã saã nguia ra. Dios mbuae chucharã. Diana, i que Dios mbuae je ra. Demetrio que mbae isi tuchi quia sucha ñetẽ ndibishorõ nda. Eresenda tubiriãte que sucha ñetẽ naa naasa ra.

²⁵ Nguesenda ja que emunua nda. Dios mbuae chuchua raãsa que emunua ja ra. Ñee ngue ee ra. —Mbae nandesi turãte rei nguia nandechiao ribishorõ ã.

²⁶ Pablo riqui ñee ñee mbia je co. “Dios mbuae mbia chiao rei eicuãte”, i Pablo quia co. Mbia riqui echeẽ mumbayãte ã. Ajendachõ eã ñene. Efeso mĩ eã ñene. Asia jenda abe eriqui echeẽ andu ã.

27 Ñquĩ ñcuãte nande je. Nandechiao ra mbia isi isiã ñochĩ cote re. Mbia ra hui ja chõchĩ Diana chuchua si cote re. Diana abe si ra mbia hui chõchĩ nde. Nandererecua tuchi que Diana. Mbia chũcua tuchi que ae. Asia jenda chũcua tuchi que ae. ¡Mbia ra hui chõchĩ esi jẽ! ñ que Demetrio ra.

28 Demetrio resenda echeẽ andu mose que paama ite ra. —¡Diana quirãcuãte jẽ! ¡Efeso jenda rerecua quirãcuãte jẽ! ñ tuchi que mbia tasẽ tasẽ nda.

29 Hue jenda que paama ñ ja ra. Pare pare ñ tuchi. Pablo resenda nyeremo ngue eisi ra. Gayo. Aristarco rese. Macedonia jenda. Ñquĩ nyeremo ngue ecuruchoi mbia chumunuásaa ra.

30 —Taique se abe. Tacheẽ ñee mbia je, ñ rei que Pablo ra. Jesús quiato que Pablo siquisã nda.

31 Asia jenda rerecua mo abe que ucheẽ mondo Pablo je ra. —¡Ereiquechĩ nda nde jẽ! ñ Pablo je. Pablo quiato que ñquĩ nda.

32 Mbia que pare pare ñ tuchi ra. Tasẽ tasẽ ja que ra. Hue rĩ ja mbia ndua eãte. Mbae mii ndese ndua eã. Paama ñ chooño ja. Eaquiataũ ño ñmunua ñooño nguiã.

33 Mbia mo ngue mbae senei senei ja Alejandro je ra. Judíos que Alejandro mua mbia ite re cote ra. —Echeẽ mbia ja je, ñ que ee ra. Alejandro que o mee mbia je ra. —¡Jẽquiriri chõ jẽ! ñ rei ngue ee re. —Mbia je tacheẽ. ¶ nda paama iã judíos je, ñ rei ngue re.

34 —Judío chõ Alejandro riqui re, ñ ja que mbia ra. Nyebe mbia riqui tasẽ tasẽ mbeite re. Dos horas. —¡Diana quirãcuãte jẽ! ¡Efeso jenda rerecua

quirãcuãte jê! i tuchi que mbia tasê tasê nda.

³⁵ Secretario rei ererecua mo. Aque que mbia cheê siquisã cote ra. Ñee ngue ee cote ra. —Tacheê jêje, Efeso jenda. Efeso jenda chõ nande re. Diana ndei nandererecua. Nande rei Diana ndaarõsa. Diana naanguia ngue tu ibei si, aque raarõsa chõ nande re. Diana chuchua raarõsa abe chõ nande re. Mbia jirandu jate ũquí ndese.

³⁶ Emo eicuayã eãte. Nyebe jêquiriri chõ jê. jêaquiataũ jêsaã saã eã ño jê!

³⁷ Ae jêisi seru nae, ũquí mbae mbuquiachã eãte dios mbuae chuchúaa. Ũquí ñee icuã icuã eãte dios mbuae riĩ. Dios mbuae jenderecua riĩ.

³⁸ Demetrio ñee icuãse mose emo nii, sã esi nandererecua chuchúaa. Demetrio resenda ñee icuãse mose emo nii, sã echoi nandererecua chuchúaa. Huee chõ ererecua riqui nguiã mbia cheê andu. Sã echoi ja ererecua je. Sã ñee ñee ja nyue ererecua résaa. Mbae icuã nii.

³⁹ Mbae mo nii abe mose, jeñee mbia chumunua mose.

⁴⁰ Jesús quiato que nandeisi chooño chí nda. Nandechimbiicuã ñooño ño nguiã. Nandererecua ñee arõte nande je. Echeê nda nandesibishorõ eã, i que secretario ra.

⁴¹ Aquere que hui mbia si ra. Mbia mbui que cote ra.

20

Pablo nyo i Macedóniaa, Gréciaa abe

¹ Mbia quiriri mose que Pablo Jesús quiato munua nda. Embaaquiato quiatu jiri. —Co acua quia co, i que ee cote ra. Macedóniaa ngue echoi cote ra.

² Hue jenda sucha mbuchesea seate que echoi ra. Jesús quiato mundua ndua. Ngasẽ ngue Gréciaa cote ra.

³ Huee que eriqui are jiri ra. Tres nyasi. —Taso Siria ama ndisha rui, i rei que cote ra. Jirandu que judíos icuã ndese cote ra. —Nandeisi, i nda judíos quia Pablo riĩ nda. Nyebe Pablo ru nguiã nyebi si Macedonia.

⁴ ã ngue nyoĩ erese ra. Eata rete. Sópater. Berea jenda. Aristarco. Segundo abe. Tesalónica jenda rei ãquĩ. Gayo. Derbe jenda. Timoteo. Tíquico. Trófimo. Asia jenda rei ãquĩ.

⁵ ãquĩ ja rane nguia nyoĩ nguiã ure si. Troas que echi nguiã ureraarõ.

⁶ Fiesta de Pascua mose que urecu Filipos ra. Aquere que ureso ama ndisha rui cote ra. Cinco días que tu ure je ama ndisha ite re ra. Urecuasẽ namo ngue Troas cote ra. Ae ureraarõ arõ nguia, ãquĩ ngue uresiiti cote ra. Urecu are jiri que hue cote ra. Siete días.

Pablo nyoĩ Troas

⁷ Jesús quiato que ñumunua ja domingo mose cote ra. Mbichae sia sia nyue. Pablo que embaaquiatu quiatu quia ra. —Taso isamami, i que ra. Nyebe embaaquiatu quiatu itondiite mose chee.

⁸ Sucha ibátee que echi ñumunua nda. Eironguia ibate tuchi que ra. Ibate tuchi que echi ñumunua nda. Tata rendi tubiriã ngue etesae tuchi ra.

⁹ Mbia mo ngue chí ibate ra. Ventana tose. Etiarõ namo ngue ra. Eutico, i que ee ra. Uque que huĩ ngoi ibate ra. Pablo que ñee oco tuchi embeesi

esi ra. Eque que tu ngoi ibate si ra. Mano ndei que ra. Tambuchuruã, i rei que emo nda. Eraaque chõ eriqui reaẽ.

¹⁰ Pablo que nguichi u erea ra. Oo tuchi que erese ra. Quiaama ngue ra. — ¡Jẽsiquichechĩ nda jẽ! Manoãte, i que Pablo mbia je ra.

¹¹ Pablo que osoi nyui ra. Mbichae que echisia sia ra. U que ra. Mbia que embaaquiату quiatube ra. Eresaitõ ndabe chee. Oso que erecha cote ra.

¹² Ae ngoi nae, erasiã ño ngue mbia curuchoichĩ nguiã. Mbia ia tuchi que ngoi je rese cote ra.

Pablo nyoĩ Milétoo

¹³ Pablo que ñee nda. — Ibi rĩ taso se Asón. Hue si ra aso jendese cote. Ama ndisha rui, i que ra. Nyebe ure rane ureso nguiã ama ndisha rui.

¹⁴ Ae urecuasẽ nguiã Pablo je Asón cote. Pablo que oso urerese am a ndisha rui cote ra. Canoa naanguia ye. Urecuasẽ ngue Mitilene cote ra.

¹⁵ Hue si que ureso ra. Isamami ngue ejoõ acua mo urechucuã cote ra. Quío, i que hue ejoõ acua je ra. Isamami nongue que urecuasẽ Samos cote ra. Hue si que ureso Trogílioo ra. Huee que urequeneã urecua ra. Isamami ngue urecuasẽ Milétoo cote ra.

¹⁶ Pablo que quicoi asi Asia si ra. Nyebe uresoã Efésoo. — Tacuasẽ quicoi oso Jerusalén. Fiesta de Pentecostés taicusu oso ngasẽ, i que Pablo ra.

Pablo ñee Jesús quiato rerecua je, Efeso jenda je

¹⁷ Mileto si que Pablo emo mondo Efésoo ra. — Jenyu, i que ameĩ je ra. Jesús quiato rerecua je.

18 Ûquĩ ngue ngaẽ ee ra. Pablo que ñee ee ra. —Cosete que achu Asia ra. Seicuate raque se. Sechisaã jêicuate raque.

19 Dios cheẽ ngue asenei senei turã tuchi quia jêje. Secuasú que asaã saã eãte quia jêje. Acheseo tuchi que sequia mbia rese. Judíos que sembasi mbasi tuchi quia ra. “Tatiquia”, i rei que judíos quia seje ra.

20 Dios cheẽ ngue asenei senei mbeite quia jêje. Asiquicheã mbei que sequia erenei nenei jêje. Jembitirõ sacua. Jeñumunua nua mose. Jenyuchúaa ja abe que aico Dios cheẽ nenei nenei jêje.

21 Acheẽ tuchi que jêje. Judíos je. Judíos eã je ab e no. “jêicuã si jêhui rã! Jesucristo jêicua rã”, ae tuchi que sequia jêje.

22 Co aso quia Jerusalén co. Co Espíritu Turã sererao quia Jerusalén co. Mañi ño nda seje pee.

23 Co mii ño aicua nguiã. Espíritu Turã ngue ñee seje ra. Sucha mbuchesea sea mose que eriqui ñee ñee seje. Mbia icuãte ra seje. Sembasi rae. Sematã ndae. Setarõ ndae. Espíritu Turã ngue sembiirandu ra.

24 Sesiquicheãte ùquĩ si. Sã sei quia quiatu. “Dios turã esenei senei mbei quia mbia je”, i que Jesús seje ra. Aque mii ndese chõ aico nguiã ndu a co. Echeẽ mii ndese. I nda echeẽ amumba eã.

25 Dios nandererecua que asenei senei tuchi jêje. Jemae eã mbei ra serese cote. Aicuate se quia co.

26 Jemo siqui sereã mose Jesús rese, se eã ño cote re. Jê ño cote re. Jê ja je chõ ngue asenei senei ndesẽ.

27 Dios cheẽ ngue asenei senei jate jêje.

Asiquicheã mbei que sequia erenei nenei jêje. Dios cheẽ mo ngue atibo tibo eãte jêje.

28 ¡Jẽingo turã ño nyiese jê! ¡Jesús quiato abe jêteaquiato quia jê! Espíritu Turã ngue ñee jêje resê. “Jesús quiato rerecuarã jê”, i que Espíritu Turã jêje resê. Jesús quiato jêteaquiato quia jê. Ûquĩ ndibishorõ ngue Jesús nguqui mondo ra. Umano mose.

29 Seso mose ra emo ngaẽ ñee ñooño jêje. Tambiirĩ irĩ, i ra jêje. Eicuã ño ùquĩ nde. Nyacua rã sí.

30 Jendese ra emo ndiqui. Jesús quiato mbaaquiato icuã icuã. Jesús quiato mbiirĩ irĩ. “I nda Jesús quiato siqui nanderese”, i ra ùquĩ.

31 Jêteaquiato jê. Jaembaaquiato quiato tuchi que se. Tres años. Jê ja que jaembaaquiato quiato. Acheseo tuchi que sequia jendese.

32 Aico jendecha Dios je a. Aico jendecha Dios turã je a. ¡Dios cheẽ turã jemumbayã mbei quia jê! Dios cheẽ nda jembuquirãcuã. Dios cheẽ nda jemingo tuchi Jesús quiato rese.

33 Mbae isiquia que achosei chosei ãte quia mbia mbae aẽ. Mbía irao abe que achosei chiãte quia aẽ.

34 Seicuate rei que equia aẽ. Se sí chõ aquiẽ quiẽ nguiã icua. Seresenda mbaerã abe que aquiẽ quiẽ quia aẽ.

35 Jaembaaquiato quiato beite que se. “Jẽquie quiẽ”, ae beite que sequia jêje. “Mbaecha reã je mbae jemeẽ mee”, ae que sequia jêje. Jesús cheẽ ndese jendua. “Ae mbae meeño nguia emo je, eya tuchi chõ aque re. Ae eo jenda isi, aque quia eya tuchiã jiri”, i que Jesús nande je ra, i que Pablo

Efeso jenda je ra.

³⁶ Aquere que Pablo ngoi ngũĩã ndese ra. Ñee ngue Dios je ra. Ñquĩ ndes e ja.

³⁷ Mbia que nyese o ja Pablo rese ra. Quiaama ama ngue ra. Eritii que esiite it e ra.

³⁸ —Jemae iã nda serese cote, i que Pablo ee ra. Nyebe que eya eã tuchi ra. Pablo rese que echoi erasaa ra. Ama ndisha rimia ndese. Pablo so rese mae.

21

Pablo nyoĩ Jerusalén

¹ Urecuata que ñquĩ ndecha cote ra. Canoa naanguia ye que ureso cote ra. Cos que ureso ra. Isamami ngue ureso Rodas cote ra. Hue si que ureso Pátaraa cote ra.

² Huee que canoa mo chi ure je ra. Fenisia rĩ ngue esi quia ra. Aque ye que urea cote ra. Eye que ureso cote ra.

³ Chipre rese que uremae nda. Ejoõ acua. Ejii rĩ ngue ureso ra. Síriaa que ureso ra. Tiro que ure cu mbirĩ cote ra. Huee que canoa yenda jea jea ra.

⁴ Jesús quiato que urembirõ hue jenda ra. Si-ete días que ureico erese ra. Espíritu Turã ngue hue jenda mbucheẽ Pablo je ra. —¡Eresochĩ nda Jerusalén jẽ! i rei ngue Pablo je re.

⁵ Aquere que ureso cote ra. Jesús quiato que nyoĩ ja urerese ra. Ama nimia ndese. Eresebe echoi urerese. Nguiirĩ abe ruruchoi. Ama ndisha rimia ndes e que urecoi ja urenía ndese ra. Ñee ñee Dios je.

⁶ Urechiquiaama ama ja que cote ra. —Co urecua quia co, ure que ee ra. Canoa ye que ureso cote ra. Hue jenda que nyoꝑ nyebi uchuchúaa cote ra.

⁷ Tiro si que ureso cote ra. Ureso que Tolemaida ra. Huee que urecheẽ ñee Jesús quiato je ra. Ureitõ miꝑ ngue erese ra.

⁸ Isamami ngue ureso cote ra. Cesaréaa que urecuasẽ nda. Felipe chuchúaa que ureso ra. Ae que Jesús cheẽ nenei neneisa ra. Ae que mbaecha reã mbuquiaru sa ra. Diáconos, i que mbaecha reã mbu quiarusa je ra. Aque chuchúaa que urecu ra.

⁹ Cuatro que Felipe rucucha ra. Eruã ja. Dios cheẽ nenei neneisa ja que ãquã nda.

¹⁰ Huee urecu are jiri mose que emo ndu ra. Judea si. Agabo, i que ee ra. Dios cheẽ nenei neneisa que ae abe ra.

¹¹ Ae que tu ure je ra. Pablo numbicuasa que eisi ra. O que echucua eye ra. Hui abe que echucua ra. Pablo numbicuasa je. Ñee ngue cote ra. —Espíritu Turã ndiqui ñee ndeje a. “ƒ nda judíos ndecua pee Jerusalén. Nemeẽ nda judíos eã je cote”, i que Espíritu Turã nda, i que Agabo Pablo je ra.

¹² Ure eandu mose queurecheẽ Pablo je ra. Cesarea jenda abe que ñee ee ra. —¡Eresochĩ nda Jerusalén jẽ! ure ja rei ngue ee re.

¹³ Pablo que ñee ure je ra. —¿Mbaerã jẽingo nyeseo seo serese re? ¿Mbaerã jẽingo sembia eãte re? ¿Mbaete ere? Sã secua Jerusalén ae. Sã seiquia Jesús riĩ ae, i que Pablo ra.

¹⁴ Pablo que uresiquisã aroneate ra. Nyebe urecheẽ eã nguiã e e cote. —Sã Dios ae riqui ñee ñee ee no, ure chee que ra.

15 Ureico quiatu que cote ra. Ureso que Jerusalén cote ra.

16 Jesús quiato mo abe que nyoí urerese ra. Cesarea jenda. Chipre jenda mo ngue siqui Jerusalén nda. Masón, i que ee ra. Jesús quiato tuchi que ra. Cose tuchi que eriqui Jesús rese ra. Cesarea jenda que urererao Masón nyuchúaa ra. Huee que urecu erese ra.

Pablo oso Jacobo rea

17 Jesús quiato ia tuchi que urecuasẽ mose Jerusalén nda. Ureisi turã ngue ra.

18 Isamami ngue Pablo si Jacobo rea ra. Ure abe que ureso erese ra. Huee que amei ja chi ra. Jesús quiato rerecua.

19 Pablo que ñee ee ra. Mba e renei nenei ja ee. —Dios que siqui tuchi serese ra. Se echeẽ nenei nenei mose judíos eã je, i que Pablo Jesús quiato rerecua je ra.

20 Pablo cheẽ andu mose que ñee turã turã Dios je ra. Ñee ngue Pablo je cote ra. —Jesús quiato tubiriãte que judíos cote ra. “¡Moisés cheẽ ndui si chõ nandeico jẽ!” i tuchi que ñquĩ nguia ra.

21 Ñquĩ ndiqui ñee icuã icuã nderĩ ñquĩ. “Pablo que judíos ataque mbui Moisés cheẽ si ra”, i equia nderĩ ñquĩ. “‘Coche rei Moisés cheẽ jemumba. ¡Circuncisión jẽsaãchĩ jendiirĩ je jẽ! ¡Judíos ataque chisaã saã nda jẽsaãchĩ jẽ!’, i que Pablo quia judíos je ra”, i rei equia nderĩ ñquĩ.

22 ¿Mañi nande ra re? Jesús quiato ra ñmunua ja judíos. Jirandu mose ndereco mose a.

23 ¡ĩ ere jê! Mbia cuatro que siqui urerese ra. Ûquĩ ngue ñee Dios je ra. “Ã nda uresaã ndeje”, i que ùquĩ Dios je ra. Ûquĩ nda esaã ee cote.

24 Ûquĩ erao Dios chuchúaa. Ûquĩ na si esaã nde abe. Nembuturã sacuã. Mbae isiquia emondo ee Dios chuchúaa. Queñi ua sia cote. † ere quiatu. Mbia ra jirandu jate nderese. “Pablo abe riqui Moisés cheẽ mumbayã tuchichĩ nande rã si”, i ra nderĩ cote.

25 Judíos eã je que nandechẽ Jesús quiato je. Nandechẽ miñ ño ngue nandemondo ee. † nande chõ ngue ee. “Mbia soo mondo mondo mose dios mo je, ¡aque soo ra jêuchĩ jê! ¡Eruqui resebe ra soo jêuchĩ jê! ¡Mbae ruqui ra jêuchĩ jê! ¡Jeninisi rese rocoĩ nda jêingochĩ emo ndese jê! ¡Jendu rese rocoĩ nda jêingochĩ emo ndes e jê!” nande que judíos eã je, i que Jesús quiato rerecua Pablo je ra.

Soldados rerecua Pablo isi

26 Pablo que ùquĩ cuatro querao cote ra. Dios chuchúaa que ererao ra. Isamami ngue Pablo ñĩmbitirõ nda. Ûquĩ cuatro rese. Oso que ñee Dios chuchua rerecua je cote ra. —Aque mose ra mbae mo ureiquia Dios je cote, i que Pablo ee ra.

27 Siete días que echi huee ra. Judíos mo ngue mae Pablo rese cote ra. Asia jenda mo. Dios chuchúaa Pablo chĩ mose que judíos mae erese ra. Ûquĩ ngue mbia mbiçuã Pablo je ra. Oo que Pablo rese ra. Isi que ra.

28 Tasẽ tasẽ ngue ñee mbia je ra. —¡Israel jenda! Jenyu rã urerese. Pablo nandeisi rã. Ae quia oso oso beite nguiã ñee icuã icuã judíos rĩ. Moisés cheẽ

ni i abe quia eriqui nguiã ñee icuã icuã mbeite. Dios chuchua rĩ abe quia eriqui nguiã ñee icuã icuã mbeite. Judíos eã mo abete quia equeruchĩ nguiã Dios chuchúaa. Dios chuchua mbĩcuãte nyeresẽ, i que mbia paama i Pablo je ra.

²⁹ Pablo quia ñi siquichĩ nguiã Trófimo ndese. Pablo quia Trófimo querao abareãte nguiã Dios chuchúaa judíos je. Nyebe ngue mbia riqui nguiã ñee icuã icuã ee. Judíos eã nguia ñi ngue Trófimo nde. Efeso jenda quia ñi ngue Trófimo nde. Nyebe ngue mbia riqui nguiã ñee icuã icuã Pablo je.

³⁰ Hue jenda que ñimbĩcuã tuchi Pablo je ra. Oo ja que erese ra. Isi que ra. Mbutiriri que Dios chuchua si ra. Dios chuchua que ematã cote ra.

³¹ Pablo nda mbia iquia nguiã ña. Emo ngue oso ñee soldados rerecua je ra. —Mbia Pablo iquia serĩte quia pee, i que oso ee ra.

³² Soldados rerecua que soldados munua nda. Oficiales abe no. Nyoĩ asi que mbia icuã ndea cote ra. Mbia que Pablo iruã nua eã cote ra. Soldados rese mae mose.

³³ Ererecua que oso Pablo rea ra. Pablo isi que ra. —Echucua cadenas je, i que soldados je Pablo rĩnda. Ererecua que ñee mbia je cote ra. —¿Aba core? ¿Mbae icuã esaã jẽje re? i que mbia je ra.

³⁴ Hue rĩ ja mbia ñee eã ee. Mbia que ñee ata ata ee ra. Tasẽ tasẽte que ñee ee ra. Ñee ñooño ererecua je. —¿Mbae ra aba icua jeñee nde? i chee que ererecua mbia je ra. —Pablo jenya mbĩrĩ na cuartel, i que ererecua soldados je ra.

³⁵ Pablo ruruchoi que ra. Ngasẽ ngue eiquesa rurubi cote ra. Hue que mbia icuã icuã sí Pablo je

no nda. Nyebe soldados ecuruchoi nguiã sui cote.

³⁶ Mbia que tasẽ tasẽ ngaẽ nguia erui ra. — ¡Jẽiquia rei ae! i que mbia cuaẽ nguia erui ra.

Pablo ñee mbia cuabẽ je

³⁷ Pablo nda emingue nguiã soldados chuchúaa chã. Ae Pablo ñee ño nguiã ererecua je. —Tacheẽ na, i que ererecua je ra.

³⁸ Ererecua que ñee Pablo je cote ra. —¿Griego cheẽ ereicuate nde re? Egipto jenda ereico reĩ seje. Ae eicuã icuã ndiqui gobierno je, ¿ũquĩ nderecua eã nde re? ¿Nde mbia iquia iquiasa rerecua eã nde re? Cuatro mil mbia iquiasa. ¿Nde ererao eã turúquiaa re? i que ererecua Pablo je ra.

³⁹ Pablo que ñee ee ra. —Tei. Judío chõ se re. Tarso jenda chõ se re. Sucha tubiriã tuchi que Tarso de Cilíciaa ra. Tacheẽ na mbia je, aechĩ nguiã ndeje, i que Pablo ererecua je ra.

⁴⁰ —Eno. Echeẽ ee, i que ererecua ra. Eironguia ibate rese que Pablo ñi juã nda. O que emee mbia mbuquiriri ra. Mbia quiriri mose que ñee ee ra. Judíos cheẽ ngue esaã mbia je ra.

22

¹ —Seataque, seandu rã. “Eicuã”, jenyechĩ nguiã seje. Nyebe tacheẽ jẽje, i que Pablo ra.

² Pablo judíos cheẽ naa mose, mbia que quiriri ja tuchi cote ra. Pablo que ñee mbei mbia je ra.

³ —Judío chõ se re. Társoo que achaacuquia ra. Tarso de Cilicia. Aa que atiarõ nda. Jerusalén ngue atiarõ nda. Gamaliel que sembaaquiatusa ra. Nanderamei ndui si que sembaaquiату quiatu

ra. Erañ si. Dios cheẽ ngue amumba sereã tuchi ra. Sã jẽingo namo ã no.

⁴ Seicuã tuchi que eriqui Jesús quiato je nyii ra. Emo emo ngue aikuia chee ra. Emo emo ngue aru aru quia tarõ nda. Mbia ninisi abe que atarõ tarõ nguia ra.

⁵ Sacerdote rerecua que cartas mondo seje ra. Judíos rerecua abe que cartas mondo seje ra. Damáscoo nda aso nguiã ererao chã. Judíos je nda cartas arao nguiã ña. Hue jenda je. Damáscoo nda aso nguiã ña. Jesús quiato requia requia. Aa nda aru nguiã tarõ ña. Aa nda aru nguiã eiruã nua ña. Jenderecua ñquĩ icuate raque. Jeñee ee ae.

Aico uba Dios rese co cote, i Pablo

⁶ Acuasẽ nda Damáscoo chã nde. Tenda ibate que tata mo tu seresae ra. Ibate si que eru ra. Tata rendi que seresae tuchi ra. Sembua tuchi que ra.

⁷ Tata rendi rese mae mose que acoi oso íbii ra. Echeẽ mo ngue achandu ra. “Saulo, Saulo. ¿Mbaerã ndeicuãte riqui seje re?” i que seje ra.

⁸ “¿Aba nde re?” ae que ee ra. “Jesús rei se. Nazaret jenda. Ae je ndeicuãte riqui”, i que seje ra.

⁹ Seresenda que siquiche tuchi ra. Mae ndei ngue tata rese re. Echeẽ nguia echanuate nguiã.

¹⁰ “¿Mañi ae ra se re, Sererecua?” ae que se ra. “Dios que ndeirabo ra. Ehuã cote. Ecuasẽ oso cote. Damáscoo. Mbae riñ nda acheẽ ja ndeje huee cote”, i que Jesús seje ra.

¹¹ Tata rendi que seresa mungue ra. Sere-sayã. Nyebe seresenda sererao nguiã seo rese. Damáscoo.

12 Huee que emo ndiqu i ra. Ananías, i que ee ra. Moisé s cheẽ ngue emumbayã tuchi quia ra. Judíos hue jenda que ñee turã ja quia ee ra.

13 Ananías que tu serea ra. Ñee ngue seja ra. “Saulo, Jesús quiato ereico co cote. Emae cote”, i que seja ra. Seresa turã ngue cote ra. Amae ngue erese cote ra.

14 Ananías que ñee seja ra. “Nanderu rerecua que Dios ra. Dios que ndeisi cose ra. Ae Dios chosei quia, ñquĩ icua sacua ngue Dios ndeisi cose ra. Jesús turã ndese mae sacua ngue ndeisi cose ra. Jesús cheẽ andu sacua ngue ndeisi cose ra.

15 Dios cheẽ nda eresenei senei mbia ja je cote. Ae erechandu, ñquĩ nda eresenei senei mbia ja je cote. Ae rese eremae, ñquĩ nda eresenei senei mbia ja je cote.

16 ¿Mbaerã ereico chõte a re? Ehuã na. Sã Jesús quiato bautizar i ndeje. Echeẽ na Jesucristo je. Sã Dios ndeicua mbutiã”, i que Ananías seja ra.

Dios que atea cuu ra, i Pablo

17 Achube que Jerusalén nda. Aso que ñee Dios je ra. Dios chuchúaa. Huee que Jesús atea cuu ra.

18 Jesús que atea ra. Ñee ngue seja ra. “Eso asi Jerusalén si. A jenda ra ndecheẽ mumba mumbate, nde serenei nenei mose. Eso erecha” i que Jesús seja ra.

19 Acheẽ ngue Jesús je ra. “Sererecua, a jenda que seicuate nyii ra. Seicuate que eriqui nyii ra. Jesús quiato que asirõ sirõ nguia judíos chumunuasa si nyii ra. Atarõ tarõ ngue sequia ra. Airuã nua ngue sequia nyii ra.

20 Mbia Esteban iquia mose, seyate que ùquĩ mose ra. Huee que aico ra. Eiquiasa irao que asaarõ nda”, ae que Jesús je cuu ra.

21 Jesús que ñee seje ra. “Eso. Taremondo isho. Secheẽ nda eresenei seneite judíos eã je”, i que Jesús seje ra, i que Pablo mbia je ra.

22 Judíos eã ñii ñee mose que mbia nyiibute cote ra. Pablo cheẽ andu sereã cote. —¡Pablo nandeiquia rei jẽ! ¶ nda eriquiã cote, i que judíos tasẽ tasẽ nda.

23 Mbia paama i ja Pablo je. Tasẽ tasẽ. Huiirao mbaaba aba. Ibi tuba ara ara mombo mombo ibate.

24 Soldados rerecua que ñee cote ra. —Pablo jendao matã. ¡Nandeiruã nua jẽ! ¶ nda ñee, i que ererecua ra. —¿Mbaerã mbia ñee icuã icuã ndeje re? i Pablo je.

25 Soldados que Pablo chucua ra. Iruã nua nda eña nde. Pablo que ñee capitán je cote ra. —¿Mbaerã nda seiruã nua nde? Romano ño se resẽ. Mbae icuã asaã eãte resẽ, i que ra.

26 Capitán ngue oso ererecua mbiirandu cote ra. Pablo cheẽ nguire. —¡Ereiruã nuachĩ nda jẽ! Romano ño ae re, i que capitán nda.

27 Ererecua que oso ñee Pablo je cote ra. ¿Romano nde re? i que ee ra. Ae, i que ee ra.

28 Ererecua que ñee mbe ee ra. —Mbae isiquia que amondo tuchi mbia je ra. “Romano” i nonde seje, i que ererecua Pablo je ra. Pablo que ñee ee ra. —Romano mbei chõ se re. Sechiacuquia mosenda bei, i que ra.

29 Pablo iruã nua eã ngue cote ra. Mbia que hui esi cote ra. Mbia siquiche ja tuchi que cote ra.

—Pablo nandechucuachĩ. Romano ño eriqui re, i que mbia cote ra. Ererecua abe que siquiche tuchi cote ra. Pablo o cuare.

Ererecua ñu munua Pablo cheẽ andu

³⁰ —¿Mbaerã judíos paama i Pablo je re? i que soldados rerecua ra. Isamami ngue ererecua ataque munua cote ra. Sacerdote rerecua ja. Amei ererecua ja. Pablo que ecuruchoi ererecua achõ je cote ra. Ũquĩ ererecua ñee sacuaã ee.

23

¹ Pablo que mae huĩ ererecua ja rese ra. Ñee ngue ee ra. —Seresenda, mbae turã ndese aico bei co. Namu abe. Nyebe sesiquicheã mbei riqui Dios si co, i que Pablo ra.

² Ananías, i sacerdote rerecua je. Aque que ñee Pablo ji jenda je ra. —Pablo churu rese jengua, i que ra.

³ Pablo que ñee ee cote ra. —Dios ra ucuanderese jẽ. Ndeturã eresaã ñooñochoĩ nguiã. “¡Moisés cheẽ nda jemumbachĩ jẽ!” ere rei que ure je. ¿Mbaerã ereico echeẽ mumba mumba nde re? “Jengua Pablo churu rese”, ere chõchĩ nguiã serĩ. Moisés cheẽ mumba, i que Pablo ee ra.

⁴ Pablo cheẽ andusa que ñee asite ee ra. —¿Mbaerã erecheẽ icuã sacerdote rerecua je re? Dios emingo rei a resẽ, i que Pablo je ra.

⁵ Pablo que ñee ee ra. —Sacerdote rerecua eã eriqui reĩ nguiã seje. † nda acheẽ eãte erĩ. Aicuayãte quia ñi se re. “Jenderecua rĩ jẽingochĩ nguiã ñee icuã”, i rei que Dios ñee nande je resẽ, i que Pablo ra.

⁶ Hue rĩ ja ererecua ndua eã. Fariseos, i que ererecua ataque je ra. Saduceos, i que eataque je no nda. Nyebe Pablo ñee nguiã ee. —Seresenda, se rei fariseo. Seru ja rei fariseos no. “Mbia mano je ra quera si”, ae quiatu nguiã co. Ûquĩ je chõ mbia riqui nguiã paama i seje. Ûquĩ je chõ ngue sereru nguiã jêje, i que Pablo ererecua je ra.

⁷ Pablo cheẽ nguire que ererecua ñee icuã icuã nyue ra. Saduceos que ñee icuã icuã fariseos je ra. Fariseos abe que ñee icuã icuã saduceos je no nda.

⁸ Saduceos que ñee nguia ra. —Mbia raaque ra quera si eã. Angeles eã ibatenda. Mbia aĩ abe eã, i que saduceos quia ra. Fariseos que echeẽ sobeishĩ nda. —Eraaque ra quera si. Angeles siqui ã ndesẽ. Mbia aĩ abe siqui ã ndesẽ, i que fariseos ra. Nyebe ererecua ñee icuã icuã nguiã nyue.

⁹ Tasẽ tasẽ tuchi que nyue ra. Fariseos mo ngue juã ñee nda. Ûquĩ ndei embesasa. Ñee ngue Pablo rĩĩ nda. —Pablo que mbae icuã saã eãte quia. Emo aĩ ñee ee reae. Angel mo ñee ee re no ae. Nyebe nandeico turã ee no. Ûquĩ mose ra nandeico turã Dios je abe, i que fariseos ra.

¹⁰ Mbia que ñe e icuã icuã mbei chõchĩ nguiã nyue. Soldados rerecua ireĩte que eriqui ra. Mbia que Pablo iquia serĩte quia ee ra. Nyebe ñee soldados je. —Jẽso Pablo rea. Jendao rã jenyuchúaa, i que ererecua soldados je ra.

¹¹ Isa que Jesús ru ñee Pablo je ra. —Eresiquiche techĩ nda, Pablo. Serenei nenei ngue se a, eĩ ere si ra oso serenei nenei Roma, i que Jesús Pablo je ra.

Pablo nandeiquia, i rei mbia

¹² Isamami ngue judíos ñee ja nyue ra. —¡Pablo nandeiquia jê! i ja nyue. Mbae mo nda nandeu eã mbei, Pablo iquiayã mbei mose. Nandeyu eã mbei ra Pablo iquiayã mbei mose. Chã Dios nandembasi, Pablo iquiayã mose, i tuch i que judíos ñee nyue ra.

¹³ Ae Pablo iquia serĩte quia, ũquĩ cuabête que ra. Cuarenta que ra.

¹⁴ Ũquĩ ngue nyoĩ ja ñee mbia rerecua je ra. Sacerdote rerecua je abe no. —Mbae mo nda ureu eã mbei, Pablo iquiayã mbei mose. Chã Dios urembasi, Pablo iquiayã mose.

¹⁵ “¡Pablo embu ure je!” jenyê soldados rerecua je. “Pablo rese uremae na”, jenyê soldados rerecua mbiĩrĩ irĩ. Ñeenda cúa ra urechiquitirõ erese. Pablo ra ureiquia chã, i rei que judíos ra.

¹⁶ Pablo nongue riiĩ ngue jirandu erese ra. Aque que oso Pablo mbiirandu ra. Soldados chuchúaa. —¡Mbia ra nyiquitirõ tirõ nderese jê! ¡Ndeiquiachĩ nda jê! i que Pablo je ra.

¹⁷ Nyebe Pablo ñee soldado mo je ra. —Senongue riiĩ erao ndererecua je. Ñee nda ndererecua je chã, i que Pablo ra.

¹⁸ Nyebe ererao nguiã nguerecua je. —Pablo que acuanĩndu mbu ra. Mbae i chõ nda ndeje, i nguerecua je.

¹⁹ Ererecua que acuanĩndu querao eo rese ra. Pe jiri que eñi ñee ee ra. —¿Mbae ere u ñee seje re? i que ererecua ra.

²⁰ Acuanĩndu que ñee ererecua je cote ra. — Judíos ra ñee ndeje. “Pablo embu ererecua chumunua mose. Ererecua ra Pablo cheẽ ñandu”, i ra

nembirĩ irĩ.

²¹ Ñee ñooño nda ndeje. ¡Echeẽ nda eremumbayãchĩ jẽ! Judíos cuabẽ nda nyiquitirõ tirõ erese. Cuarenta. “Mbae mo nda nandeu eã mbei Pablo iquiayã mbei mose. Nandeyu eã mbei ra Pablo iquiayã mbei mose”, i tuchi judíos, i que acuanindu ererecua mbiirandu ra.

²² Soldados rerecua que ñee acuanindu je ra. — ¡Equiriri chõ oso! ¡Erecheẽchĩ nda emo je jẽ! i que ee ra.

Pablo mondo ererecua Félix je

²³ Ererecua que ñee ererecua ataque mo je cote ra. —Sã soldados icoquiato. Sã echoi Cesarea itondáruu. Sã doscientos choi ibi rĩ. Sã setenta choi ticuasuo ato. Sã doscientos choi ira racuatirõ ji rerecua. Cesarea ra jẽso itondaru, i que soldados rerecua ñee nda.

²⁴ —¡Ticuasuo jẽisi mua Pablo rendacuã jẽ! ¡Pablo jendao turã nguia jẽ! Jendao turã ererecua Félix je, i que soldados rerecua ra.

²⁵ Embesa ji que emondo Félix je ra. I ngue carta mbesa ra:

²⁶ —Se rei Claudio Lisias. Co ambesa quia ndeje co, Félix. Mbia rerecua tuchi quiarei nde.

²⁷ Co amondo quia ndeje co. Pablo, i equia ee. Judíos eisichĩ neaẽ. “Nandeiquia”, i rei ereaẽ. Se chõ ngue asiquisã nguia. Romano ndei ae. Nyebe mbia asiquisã nguia esi.

²⁸ Judíos rerecua chumunua mose que Pablo arao ee ra. “¿Mbaerã mbia icuat e riqui Pablo je re?” ae rei ngue ñee ererecua je re.

²⁹ “Pablo nandetarõ”, i rei que judíos quia ra. “Pablo nandeiquia”, i rei que judíos quia ra. Pablo

siquiã ndaque mbae icuã ndese. Judíos cose ndare cheẽ nguire chõ nguie judíos paama i Pablo je ra.

³⁰ Airandu que erese ra. “Judíos ra Pablo iquia”, i que mbia mo ñee seje ra. Nyebe aico nguiã Pablo mondo ndeje aque. Ae eicuã icuãte riqui Pablo je, ãquĩ je que acheẽ nda. “Jẽso quia ñee Félix je”, ae chõ nguie ee ra. Hasta luego. I nguie carta mbesa ra.

³¹ Soldados que Pablo curuchoi isa ra. Nguerecua cheẽ nguire. Ngasẽ nguie Antípatris ra.

³² Soldados que nyoĩ ibi rĩ, ãquĩ nguie ngaẽ nyebi isamami nda. Ae nyoĩ ticuasú ato, ãquĩ nguie nyoĩ beĩ ngasẽ Pablo ruruchoi ra.

³³ Ngasẽ nguie Cesaréaa ra. Soldados rerecua chimbesa que emondo mbia rerecua je ra. Pablo abe que emondo mbia rerecua je ra.

³⁴ Mbia rerecua que mae huĩ carta echimbesa rese ra. —¿Ma jenda nde re? i que Pablo je cote ra. —Cilicia jenda rei se, i que Pablo ee ra.

³⁵ —Ae ñee icuã icuã nguia ndeje, ãquĩ ngasẽ mose ra ndecheẽ achandu ja, i que ererecua Pablo je ra. —Pablo jẽteaquiatu tuchi Herodes chuchúaa, i que soldados je cote ra.

24

Judíos ererecua mbĩcuãse Pablo rĩ

¹ Cinco días mose que sacerdote rerecua ngasẽ Cesaréaa cote ra. Ananías, i equia sacerdote rerecua je. Ererecua ataque mó nguie ngasẽ erese ra. Tértulo abe que ngasẽ erese ra. Abogado rei Tértulo. Ngasẽ nguie ecuaẽ ñee ñooño Félix je ra. Pablo rĩ.

² Soldados que Pablo curucuaẽ ererecua chumunua mose ra. Tértulo que ñee icuã tuchi Pablo riĩ cote ra. Ererecua nda embiicuã nguiã Pablo riĩcharã ña. Ñee ngue ererecua je ra. —Ndeturãte eriqui ure je co, Urererecua. Ndeaquiatute eriqui ur e je co. Urembiate equia co.

³ Nyebe “iaanye” ure bei nguiã ndeje co, Félix.

⁴ Ureandu mbirĩ na. Urecheẽ oco eã nda ndeje nye.

⁵ Pablo quiarei siqui chooñoa judíos je. Judíos mbuchesea sea ja. Embiicuã icuã uchue. Nazarenos, i que judíos ataque mo je ra. Ñquĩ nderecua rei Pablo.

⁶ Pablo que Dios chuchua mbiicuã serĩte rei ra. Nyebe ureisi nguiã. Urerao rei que judíos rerecua chumunua mose ra.

⁷ Lisias tu chõchĩ soldados rurucuaẽ cote. Ueriquisã. Pablo rirõ icuã ureo si.

⁸ “Jeñee icuãse mose Pablo riĩ, jeñee ño oso Félix je”, i que Lisias ure je ra. Echeẽ Pablo je no. Ereirandu ra Pablo rese cote. Eicuã ndese, i rei que Tértulo Félix je ra.

⁹ —Ae beite, i ja judíos Tértulo cheẽ mose. Ñee icuã icuã ja Pablo riĩ.

Pablo ñee ererecua Félix je

¹⁰ Ererecua que ñoomee Pablo je cote ra. —Nde echeẽ seje cote, i chõ ñoomee nguiã ee. Pablo que ñee ee cote ra. —Urererecua ima nde. Ndeaquiatute. Nyebe sebite riqui nguiã secheẽ mose ndeje. Ñ ngue ñee ñooño nguia serĩ nda. Echeẽ tasibishorõ ndeje.

¹¹ Namó jiri que aso Jerusalén nda. Doce días. Acheẽ ñee ngue oso Dios je ra. Echeẽ ñee mbia je ae. Sã mbia nembiirandu ae. “Ae beite” i ra mbia ndeje.

¹² Emo je que aico ñee icuã icuã eãte Dios chuchúaa ra. Mbia que ambucheẽ icuã eã nguia nyue ra. Judíos chumunuásaa que aico eã mbia mbicuã icuã nda. Mbia chuchua ite re abe que aico eã mbia mbicuã icuã no nda.

¹³ ã ñee ñooño ño nguã serĩ. ã mae ãte seicuã mo ndese resẽ.

¹⁴ Aque mii ndese chõ aico resẽ. Dios cheẽ yasu rui bei chõ aico nguã co. Dios cheẽ yasu quiarei eicuã eã. Dios rei ureru rerecua bei. Co aico Dios icua co. Co aico Moisés cheẽ icua co no. Co aico Dios cheẽ mbuchecuasa chimbesa icua co no.

¹⁵ Co aico Dios icua ãquĩ na si co. Mbia raaque ra quera si no. ãquĩ aicuate. Mbia icuã nda quera si. Mbia turã na si. Quera ja chõ ndae.

¹⁶ Nyebe aico Dios cheẽ ndui bei co. Nyebe sechiã cuaãcuã i eã Dios si. Mbia si abe.

¹⁷ Cosete que aso a si ra. Muchos años. A achube a cote. Mbae mee mee sacuã mbaecha reã je. Seresenda je. Dios je abe mbae mee.

¹⁸ Achimbuturã ngue Dios chuchúaa ra. Mbia eãsa. Mbia ambicuã eã. Judíos Asia jenda que mae serese ra. Dios chuchúaa.

¹⁹ Sã ãquĩ ngaẽ serenei ndeje. Seicuã mose, sã ãquĩ ngaẽ ñee ndeje.

²⁰ Sã ã abe ñee ndeje. Seruruchoi rei que judíos rerecua chumunua mose ra. Mbae i ãte que seje ra. “Mbae icuã ngue eresaã nda”, i eã ngue ererecua seje ra.

²¹ “Mbia mano je ra quera si, ae chõ ndei nguã

co. Ñquĩ je chõ ngue sereru nguiã jẽje”, ae que ererecua je ra. Ñquĩ i equia seje reae, i que Pablo Félix je ra. Félix rei ererecua.

²² —Emo mose ra acheẽ ndeje, i que Félix Pablo je ra. Félix jirandu tuchi rei Jesús chĩmbaaquiatsu rese reaẽ. —Sã soldados rerecua ru rã. Huee quia nda acheẽ nguiã cote. Mañi ño nda aba ndeje cote, i que ererecua Pablo je ra.

²³ Félix que ñee capitán je cote ra. —Pablo jẽteaquiatsu bei jẽ. Jẽhui jẽhui jiri esi. Sã equiatsu ngaẽ ngaẽ erea. Mbae mondo mondo ee, i que Félix ra.

²⁴ Emo mos e jiri que Félix ngasembe Cesaréaa ra. Eresebe que eru ra. Drusila, i que eninisi je ra. Judía rei eninisi. —Pablo jendu rã. Pablo cheẽ tachandu rã. Jesucristo rĩ tachandu, i que Félix ra.

²⁵ Pablo que tu ñee ee ra. —Sã mbia siqui turã Jesús rã si. Sã mbia ñĩmbirãcuã mbae icuã si. Dios ra mbia icuã mbuchao, embasi sacuã, i tuchi que Pablo Félix je ra. Félix chiã ngue cuaãcuã i Pablo cheẽ mose ra. Nyebe ñee Pablo je. —Eso cote. Serecohĩ mose ra acheembe ndeje, i que Félix Pablo je ra.

²⁶ —Pablo ra mbae isiquia mondo chee seje. Se embui sacuã, i rei que Félix ra. Nyebe Félix “echu” i i bei nguiã Pablo je.

²⁷ Eĩ mbei que Félix quia ra. Dos años. Aquere que Félix ererecua eã cote ra. Porcio Festo que esiquicharõ nda. Félix que Pablo tarõ mbei mĩ nda. —I nda judíos paama iã seje, i que ra.

25

Pablo ñee ererecua Festo je

¹ Festo que ngasẽ Cesaréaa cote ra. Félix rendaque re, mbia rerecuarã. Tres días mose que esi Jerusalén cote ra.

² Huee que sacerdote rerecua ñee icuã ja Pablo riĩ nda. Judíos rerecua abe ñee icuã ja Pablo riĩ. Festo je ñee ñee Pablo riĩ.

³ —Urembia jiri rã. Pablo eru Jerusalén, i ja rei que sacerdote rerecua Festo je ra. Iquia nda eña nde. Ñeenda cúaa.

⁴ —Pablo tarõ ji ñi Cesarea pee. Aruã nda se. Namu jiri ra aso pee, i que Festo ra.

⁵ —Sã jenderecua abe nyoĩ serese Cesaréaa. ¿Mbae jenye quia Pablo je re? ¿Mbae icuã esaã nde? Nyao pee teñee seje, i que Festo ra.

⁶ Festo que siqui mbirĩ Jerusalén nda. Ocho o diez días. Hue si que eru nyebi Cesaréaa ra. Isamami ngue esi mbia chumunuásaa ra. Ae que mbia rerecua cote ra. Ngoi que huee ra. —Pablo jendu rã. Echeẽ tachandu cote, i que mbia je cote ra.

⁷ Pablo que ique cote ra. Judíos Jerusalén jenda que ñee icuã icuã Pablo riĩ nda. Maende rocoĩ mbae icuã naa mose. Ñee ñooño eriĩ.

⁸ Pablo que ñee echeẽ mose ra. Judíos cheẽ ngue esibishorõ nda. —Mbae icuã mo asaã eãte resẽ. Judíos chimbesa amumbayãte resẽ. Romanos nderecua cheẽ amumbayãte no ndesẽ. Dios chuchua abe ambicua eãte no ndesẽ, i que Pablo ra.

⁹ —¿Ndeso sereãte Jerusalén nde? Mañi ae ra se quia ndeje hue reae, i rei que Festo Pablo je ra. —Í nda judíos paama iã seje. Judíos tambia jiri, i que equia ndua ra.

10 Pablo que ñee ee ra. —Romanos nderecua raque jẽ. Aico raque jẽsaa a. Jẽ nguiatu jeñee seje. ã jẽingo raque seicuate ã. Mbae icuã mo asaã eãte judíos je resẽ.

11 Se mbae icuã naa tuchi mose, ¿sei quia se jẽ! Judíos ñee ñooño mose seriĩ, ¿mbaerã nda semondobe judíos je re? Semondo aroneate ee. Ererecua tuchi je semondo rã. Sã ae quia ñee seje, i que Pablo Festo je ra.

12 Festo que ñee nyecuayã cuayã nguesenda je ra. Aquere que ñee Pablo je cote ra. —“Semondo ererecua tuchi je”, ere que seje. Taremondo ee cote, i que Festo Pablo je ra.

Pablo cheẽ tachandu, i Agripa

13 Aquere que Agripa si Cesaréaa ra. Ererecua rei ae. Berenice rese que esi ra. Festo rea.

14 Huee que itõ mocoĩte ra. Festo que Agripa mbiirandu ja Pablo riĩ nda. —A emo tarõ ji ñi a. Félix que etarõ miĩ nda.

15 Seso mose Jerusalén, sacerdote rerecua ñee tuchi seje. “Pablo eiquia”, i rei ngue seje re. Judíos rerecua abe ñee icuã icuã tuchi Pablo riĩ.

16 Acheẽ ndei ngue ee re. “Tei. Mañi ae ra mbia mo iquiachõ nde. Mbia eicuã nenei eã mose seje. Ae ñee icuã nguia eriĩ, sã ũquí ngaẽ ñee ee. Sã ñee nguia nyue sésaa”, ae que ee ra.

17 Judíos que ngaẽ a cote ra. “Isamami jeñee tachandu Pablo je”, ae que ee ra. “Pablo jendu rã”, ae que isamami serimba je cote ra.

18 Pablo ucuayãsa que juã ja rei cote ra. Ñee icuã tuchi reĩ nda Pablo riĩ seje. Pablo chisaã icuã mo

ngue embuchecuayã ñochĩ nguiã seje. “Mbia ra Pablo mbiicuã tuchichĩ nde”, aechĩ ngue se re.

¹⁹ “Judíos rã eã ño Pablo. Judío ndua rã eã ño Pablo riqui nguiã ndua”, i chõ ngue judíos ñee ñee seje ra. Jesús, i que emo je ra. Judíos que ñee icuã icuã tuchi Jesús rĩ nda. “ ‘Jesús que quera si manonde ra’, i que Pablo judíos je ra”, i que Festo Agripa je ra.

²⁰ —“¿Mañi ae ra se re?” aete que se ra. Nyebe que acheẽ ee ra. “¿Ndeso sereãte Jerusalén nde? Huee quia nandechẽ”, ae rei que ee ra.

²¹ “Sã ererecua tuchi ñee seje. Semondo ee Roma”, i que Pablo seje ra. “Eno. Aremondo je nda ee re”, ae que ee ra. Nyebe ngue atarõ mbeite mii nguiã, i que Festo Agripa je ra.

²² Agripa que ñee ee ra. —Se abe nda aque cheẽ achandu rã ña, i que Festo je ra. —Eno. Isamami nda echeẽ erechandu cote, i que Festo ra.

²³ Isamami ngue Agripa huirao turã mingue ra. Berenice rese. Ererecua irao. Ererecua ataque chumunua mose que echoi ique ra. Soldados rerecua que chi ja huee ra. Mbia rerecua mo abe que chi ra. —Pablo jendu cote, i que Festo mbia je cote ra.

²⁴ Festo que ñee cote ra. —Tacheẽ ndeje, Agripa. Jẽ abe je tacheẽ, mbia rerecua. A eriqui a cote. Pablo, i equia ee. Ae rĩ judíos riqui ñee mbeite seje. “Eiquia”, i bei seje. Jerusalén jenda abe ñee mbei erĩ. Cesarea jenda rã. “Sã mano”, i bei seje.

²⁵ ¿Mbae rĩ nda aba eiquia re? Mbae icuã mo esaã eãte resẽ. Ae quiarei ñee. “Semondo rã ererecua tuchi je”, i que Pablo seje ra. Nyebe tamondo ee.

²⁶ ¿Mbae i ra aba embesa mondo ee re? Mbae icuã ngue esaã eãte. Nyebe Pablo aru nguiã jêje a. Ndeje chõ ngue aru nguiã, Agripa. Echeẽ ee. † nda eicuã erembuchecua. † nda eicuã ambesa mondo ererecua tuchi je.

²⁷ ¿Ma nda aba etarõi mondochõ nde? Eicuã mbesa iriã mose, i que Festo Agripa je ra.

26

Pablo ñee ererecua Agripa je

¹ Agripa que ñee Pablo je ra. —¿Mbae i mbia quia ndeje re? Nde quia echeẽ cote, i Agripa. Pablo que o sui ñee ee ra.

² —Secheẽse rete ndeje, Sererecua. Judíos que ñee icuã tuchi quia serñ nda, Sererecua.

³ Nde quiarei ureicuada tuchi. Judíos icuada tuchi nde. Urecheẽ icuã icuã ereicuate nde. Nyebe nderoseñ nguiatu rã secheẽ andu.

⁴ Judíos maesate raque se, señetẽ mosenda bei. Serecua quti. Jerusalén abe.

⁵ Se rei fariseo. Setiarõ namo mosendachõ ndei fariseo se. Judíos seicuate raque. Fariseos achõ ño ureramei ñee mumbayã mbei.

⁶ “Mbia raaque ra ambuquera si”, i que Dios ureramei je cose ra. Dios ra ucheẽ nyabiã. Nyebe “ae bei” ae nguiã ee. Ñquĩ nñ ño judíos riqui nguiã secuayã ã. Ñquĩ nñ ño mbia riqui nguiã ñimbicua seje ã.

⁷ “Mbia raaque ra ambuquera si”, i que Dios ra. “Ae bei”, i ja Israel jenda quia ee ã. Nyebe Israel jenda riqui bei nguiã echeẽ ndu si ã. “Mbia raaque ra Dios mbuquera si”, ae sequia se abe co. Ñquĩ je chõ judíos icuã icuã ndiqui nguiã seje, Agripa.

8 ¿Jē abe je Dios mbia raaque mbuquera aroneate re?

Seicuã tuchi Jesús quiato je nyii, i Pablo

9 Se abe que seicuã icuãse rete riqui Jesús quiato je cose ra. Nazaret jenda chō Jesús re.

10 Seicuã icuãte que ee Jerusalén nda. Sacerdote rerecua que ñee seje ra. Nyebe ngue aico nguiã Jesús quiato tarō tarō mbeite cose. Sacerdote rerecua cheē nguire. Jesús quiato iquia iquia mose, “coche rei” ae que sequia ra.

11 Jesús quiato que airuã nua tuchi quia ra. “Ɔ nda hui Jesús si”, ae rei que sequia ra. Sucha tubiriã ngue ambuchesea sea quia ra. Jesús quiato je seicuã sacuã. Judíos chumunuasa mbuchesea sea. Paama ae tuchi que sequia Jesús quiato je nyii ra. Isho tuchi que aico oso oso Jesús quiato requia ra. Seicuã tuchi sacuã ee.

Aico uba Dios rese co cote, i Pablo

12 Emo mose ngue aso rei nguiã Damáscoo. Sacerdote rerecua semondo mose.

13 Tacheē tuchi ndeje, Sererecua. Tenda nandeite re mose que tata mo tu seresae ra. Ibate si que seresae ra. Seresenda abe resae. Tata rendi que ureresae tuchi chĩ nguiã tenda si.

14 Tata rendi rese ma e mose que urecoi íbii ra. Echeē mo ngue achandu ra. Hebreo cheē. “Saulo, Saulo, ¿mbaerã ndeicuãte riqui seje re? Nde sí chō erechimbasi mbasi nguiã aque. Ticuasu rã tuchi quiarei nde aba cheē mumba mose. Sã ticuasu riqui nambacua mbuti no. Sã eriqui hui mbaba ira racua echĩ no. Ũquĩ na tuchi quiarei nde”, i que seje ra.

15 “¿Aba nde re?” ae que ee ra. “Jesús rei se. Ae je ndeicuãte riqui”, i que seje ra.

16 “Ehuã na. Aico nyecua ndeje a. Serenei nenei sacua mbia je. ‘Jesús rese que amae nda’, ere bei quia mbia je. Mbae mo abe ra ambuchecua ndeje. Ũquĩ abe teresenei senei mbia je.

17 Judíos eã je taremondo. Secheẽ nenei nenei sacua. Ũquĩ o taisi eicuã icua mose ndeje. Judíos o abe taisi eicuã icua mose ndeje no.

18 Taremondo judíos eã je. Terembaaquiatu quiatu. † nda eriquiã mbae icua ndese. † nda eriqui mbae turã ndese. † nda eriquiã aba mbĩrĩ irĩsa rui. † nda eriqui Dios rui. † nda Dios icua. † nda eicuã ambutiã esi. † nda Dios ũquĩ ngue recoe umbaerã”, i que Jesús seje ra.

Pablo Dios cheẽ senei tuchi Agripa je

19 Ibatenda cheẽ ngue amumbayã nda, Agripa.

20 Dios cheẽ ngue asenei senei tuchi mbia je ra. Mbia Damasco jenda je. Jerusalén jenda je abe no. Judea rurubinda je abe no. Judíos eã je abe no. “Jẽicuã si jẽhui chõ jẽ! Dios icha rui jẽingo. Jẽingo turã. ‘Dios icha rui eriqui’, i nda mbia jẽje chã”, ae que ee ra. Embaaquiatu quiatu.

21 Nyebe judíos seisi nguiã Dios chuchúaa. Nyebe eriqui nguiã “nandeiquia” i seje.

22 Dios que serea quiatu bei quia ra. Namó abe. Nyebe aico echeẽ nenei nenei mbei mbia ja je. Mbaecha je. Mbaecha reã je abe. Moisés cheẽ ndui si aico ñee ñee mbia je co. Dios cheẽ mbuchecua rui si aico ñee ñee mbia je co.

23 † ngue Dios cheẽ mbuchecua embesa cose ra: “Mbia ra Cristo mbasi mbasi. Aquere ra mbia

eiquia. Ae rane nda quera si mbia raaque si. Ae ra mbia mbiirandu ngueco mose uquera riñ. Judíos mbiirandu. Judíos eã ab e mbii randu”, i que Dios cheẽ mbuchecuasa mbia je cose ra, i que Pablo Agripa je ra.

²⁴ Festo que ñee Pablo je cote ra. —Erequiachã ño nguiã co, Pablo. Embesai rese mae tuchire erequiachãte equia co, Pablo, i que Festo tasẽ Pablo je ra.

²⁵ —Aquiachã eãte se resẽ, Festo. Acheẽ nyecuate raque jẽje. Dios cheẽ tuchi chõ asenei nguiã jẽje co.

²⁶ A Agripa riqui raque a. Nandererecua tuchi. Echeẽ ee. Ae riñ aico ñee jẽje, ãquĩ ngue Agripa icua tuchi ra. Nyebe sesiquiche eãte riqui nguiã ñee ee. Secheẽ icua jate equia co. Jesús que ñee nyecuayã eã mbia je ra. Jesús mbae saã nyecuayã eã, i que Pablo ra.

²⁷ —¿Dios cheẽ mbuchecuasa cheẽ ndebite re, Agripa? Ndebite que ra, i que Pablo ee ra.

²⁸ —“Jesús quiato ra nde cote”, ¿erechĩ equia seje re? i que Agripa Pablo je ra.

²⁹ Pablo que ñee ee ra. —Nde miñ eã. Seandusa ja. A jengu ja a. Jesús quiatorã na jẽ, se rã si, aechĩ nguiã jẽje. Jengasa ra chi eã nguiã, se rã si, i que Pablo ra.

³⁰ Pablo ñeende que ererecua juã cote ra. Agripa. Festo abe. Berenice abe. Ae chi ngoi erese, ãquĩ abe que juã nda.

³¹ Nyoĩ que pe jiri cote ra. Ñee ñee nyue. — Pablo mbae icuã saã eã tuchi chõ nguia re. Eiquia aroneate quia eriqui re. Etarõ abe aroneate quia eriqui re, i que erecua nyue ra.

³² Agripa que ñee Festo je ra. —“Semondo rã ererecua tuchi je”, i chõchĩ Pablo. ĩnda aa chõ nandehui esi, ñee eã mose. “Semondo rã pe ererecua tuchi je”, iã mose, i que Agripa ra.

27

Pablo mondo Roma quiti

¹ —Pablo tamondo Italia, i que ererecua ra. — Jëisi suruchoi, i que soldados rerecua mo je ra. Julio, i que soldados rerecua je ra. Augusto rimba, i que ñquĩ soldados je ra. Emo abe que ecuruchoi isi ra. Se abe que aso erese ra. Lucas rei se.

² Aristarco abe que oso urerese ra. Macedonia jenda rei ae. Tesalónica, i sucha tubiriã je. Ureique ja que canoa cuasu ye ra. Adramitio jenda rei canoa. Asia quiti que urecuata ra. Sucha mbuchesea sea sacuã hue jenda.

³ Isamami ngue urecuasẽ Sidón cote ra. Julio turãte que Pablo je ra. Ecuatasa que eriqui ra. Nyebe Pablo si uquiato rea. Equiatio que eteaquiatu ra.

⁴ Urecuata si que ama ndui ra. Quiririã ngue ureriquisã nda. Canoa mbucuatayã. Nyebe ejoõ acua mo uresichã nguiã. Eibichi que ureso quia cot e ra. —Ĩnda quiririã nandembutiba eã, ure que ra. Chipre, i que ejoõ je ra.

⁵ Cilicia que urechucuã cote ra. Panfilia abe que urechucuã nda. Urecuasẽ ngue Mira cote ra. Licia, i que ibi je ra.

⁶ Huee que soldados rerecua canoa cuasu nongue tea ra. Alejandría jenda rei canoa. —Oso ra Itáliaa, i que ure je ra. —Aque ye jëingue, i que ure je ra. Ae ureso nguiã eye cote.

⁷ Ureitôte que oso quia ra. Ureque atate que ama ndisha rasa ra. Urecuasẽ nyee que Gnído ra. Quiririã mbeite que ureruba quiti ra. Nyebe ejoõ acua mo uresichã nguiã. Creta, i que ejoõ je ra. Salmón ngue urechucua nda.

⁸ Ejoõ acua que uremama jiri ra. Quiririã icuã icuã ngue ure je ra. Buenos Puertos que urecuasẽ cote ra. Lasea, i que hue rurubinda je ra. Sucha tubiriãte que ra.

⁹ Ureitõ mocoite que huee ra. Quiririã tuchite chee que ra. Aba ireite que quiririã cote ra. Ama mose. Nyebe que Pablo ñee mbia je ra.

¹⁰ —Nandecuata i i mose ra canoa ñimi nande je. Mbae ra ñimi ja canoa yenda. ¡Nande abe ra nandemanochĩ jẽ! i que Pablo ee ra.

¹¹ Soldados rerecua que Pablo cheẽ mumba ra. Canoanya cheẽ mumbayã. —Nyao rei, i que soldados rerecua ra.

¹² —Canoa ndua icuãte a. Quiririã aronea. Nyao rei a si. Ma nandecuasẽ ãte Fenice. Huee nda nandecu are jiri nguiã. Huee que quiririã eã jiri. Nyao huee, i que ureataque ra. Fenice rei sucha tubiriã. Ejoõ acua jenda.

Quiririã mbia iquia serĩ

¹³ Quiririã ngue uba cote ra. Ichu chooño jiri que cote ra. —Nandecuatasa jirichĩ cote, i que ureataque ra. Canoa que embucuata cote ra. Ejoõ acua ibi que ureso quia ra.

14 Urecuata ramo mose que quiririã icuã tu ure je ra. Ejoõ acua quiti que eru ra. Noreste, i que aque quiririã je ra.

15 Quiririã ngue canoa mbucuatayã ureruba quiti ra. —Sã quiririã ae nanderuruchebi serao, ure chee que ra.

16 Ejoõ quitera quiti que ureso ra. Ejoõ ngue quiririã nyoote ure si ra. Clauda, i que ejoõ je ra. Canoa ñetẽ ngue urembuti serao quia ra. Canoa cuasu riita rese. Ejoõ quitera quiti que canoa ñetẽ urechuchã canoa cuasu ye cote ra. Eusite raque.

17 Canoa ñetẽ ngue urechuchã canoa cuasu ye ra. Canoa cuasu que echucua chucua ra. —Quiririã nda embuquiatachĩ nande je re, i que ra. Mbia siquiche tuchi que ra. —¡Eriiri iri quiti ra nyaochĩ jê! Nandejaã ndae, i que nyue ra. Nyebe que tiru canoa aronda mbuquichi cote ra. —Sã canoa ae si quia nandererao surucuata, i que nyue ra.

18 Isamami abe que quiririã icuã icuã mbeite ra. Nyebe mbia mbae mombo mombo nguiã ii. Canoa yenda. Emumbebi sacuã.

19 Aquere que ureitõ si no nda. Isamami ngue mbae uremombo mombo ja cote ra. Canoa mumbebi tuchi cote.

20 Ureitõ mocoĩ mocoĩ tuchi ama ndisha riite re. Itõ nguicoi bei que ure je ra. Quiririã mbei. Pã i bei. Tenda checuayã mbei que ra. Nyasi tata abe checuayã bei que ra. —Nandecuaseã mbeichĩ nda ibi je re. Ama ndisha riite re ra nandemanochĩ nde, ure chee que ra.

21 Mbae que ureu eã mocoĩ mocoĩ nda. Nyebe que Pablo juã ñee mbia je ra. Canoa yenda je. —

Seresenda, secheẽ ngue jemumbachĩ nda. Secheẽ aba mumbayã mbichĩ. Crétaa nandecuchõ mbichĩ. † nda canoa yenda nandemomboãte ii. Mbae mbuquiachã nondechĩ.

²² ¡Jeñimbirãcuã ño jẽ! Nande mo nda mano eã. Canoa nda quiachã. Nande quiatu ra nandequiachãyã.

²³ Dios rimba rei se. Dios que ángel mo mbu ñee seje isa ra.

²⁴ “¡Eresiquichechĩ nda jẽ, Pablo! Eremano eã ndae. Erecuasẽ nyee r a ererecua Roma jenda je. Nderĩ nda nderesenda mo manoã. Dios ra eteaquiatsu ja,” i que ibatenda seje ra.

²⁵ Seresenda, ¡jeñimbirãcuã ño jẽ! Dios aicua tuchite quia co. Dios ra ucheẽ nyabiã nande je. Angel cheẽ nguire ra nandemanoã.

²⁶ Quiririã nda nandemondo ejoõ acua mo ndese, i que Pablo ra.

²⁷ Ureitõ mocoĩ mocoĩte que ama ndisha riite re ra. Catorce días. Quiririã ngue urerurucuata chõte quia ra. Adria, i que ama ndisha je ra. —Ama nimia nanderubite rei reae, i que canoa yenda ra. Itondiite mose.

²⁸ Ama ndiite que embuchecha ra. ¿Ecuatuchi ere? i que nyue ra. Treinta y seis metros. Pe jiri que embuchecha si no nda. Veintisiete metros cote.

²⁹ —¡Canoa nda cua ichĩ sita je jẽ! ¡Quiatachĩ nda jẽ! i que mbia nyue ra. Nyebe mbae usi mondo mondo nguiã ii canoa ndiquisã sacua. Mbae usi cuatro. Anclas, i que ñquĩ je ra. Ae ecuasa chi nguiã canoa ndese embutiba. —Quiatuchu, nyaashĩ, i tuchi que equia ra.

³⁰ —Nandechã nyecuayã, i que canoanya rimba ra. Nyebe canoa ñetẽ mbuquichi mondo ii. —Mbae usi urechucua mondo ii. Urechucua canoa ai rese, i que urembĩĩĩ irĩ nda. —Nandechã nyecuayã, i chõ mbei que equia nyue ra.

³¹ Pablo que ñee soldados je ra. Ererecua abe je. —Ã chichõ eã mose canoa ye, jeñĩĩmi ja rae. Ama nda jẽiquia, i que Pablo ra.

³² Ae soldados canoa ñetẽ sã nyisia nguiã. Emondo ii. Hui esi cote.

³³ Nyaashĩ namo mose que Pablo ñee ja mbia je ra. —Mbae mo jẽu jiri cote. Jeniãcuã mocoĩ mocoĩte que. Mbae mo ngue jẽuãte catorce días. Jengueãte que catorce días no.

³⁴ Mbae mo jẽu rã cote ae. † na jẽquirãcuã jiri. Mbae mo nda jeĩ eã jẽje. Jemo nda mano eã, i que Pablo ee ra.

³⁵ Aquere que Pablo mbichae sirõ nda. Iaanye, i que Dios je ra. Mbia resa rae. Nyisia que ra. U que cote ra.

³⁶ Pablo cheẽ ngue mbae oseĩ uquia mbia je ra. Mbia ja que mbae u cote ra.

³⁷ Urecuabẽte que canoa yenda ra. Doscientos setenta y seis que ure ra.

³⁸ Mbia ja que mbae u tuchi ra. Quiata a raanguia que emombo mombo ii cote ra. Canoa mumbebi sacuã.

Canoa jaã

³⁹ Ureachashĩ ngue cote ra. Ibi rese que uremae cote ra. —A ureicuayãte, i que mbia ibi je ra. Eicoĩnda rese que uremae nda. Ama nimia turã. —Nyao nguichi huee. Eicoĩnda, i rei que ererecua ra.

⁴⁰ Anclas sã ngue echisia sia ra. Anclas recha beĩ ii. Canoa mbuchaa chaasa que embuquiata ra. Tiru icoi que embuchesecobe quiririã je ra. Canoa ngue ngata ama nimia turã nguiti cote ra.

⁴¹ Iaãcuã eicoinda que canoa jaã nda. Eriquiraa eãsaa. Canoa ai que jaã tuchi ra. I rebera tubiriã ngue ra. Canoa ndiita mbaaba aba. Eriita que nyiquiso ra. Quiata que ra.

⁴² Soldados que ñee cote ra. —Ã ecuasa riqui ã nae, jã nandequia ja jê! ĩ nda echoi eã ita. Oso chee eã, i rei ngue soldados re.

⁴³ Soldados rerecua que Pablo iquia sereã nda. Nyebe ñee nguiã soldados je. —iEcuasa mo nda jêiquiachĩ jê! i que soldados je ra. Ererecua que ñe e mbia je cote ra. —Eita aquiatu jêso ii. Jêso usẽ ama nimia ndese.

⁴⁴ Eita aquiatuã, jêso mbebi ira rese, i que soldados rerecua ure je cote ra. Eĩ ure ja que usẽ ama nimia ndese cote ra.

28

Ngasẽ ejoõ ácuua Máltaa

¹ Uresẽ ja que ama nimia ndese ra. —Malta, i que a je ra. Ejoõ acua je, i que hue jenda ure je ra.

² Hue jenda turãte que ure je ra. Tata que emendi ure je ra. Urechee sacuã. Tiquindiiseĩte que eriqui ure je ra.

³ Pablo que nyea queru mbuchuuta ra. Nyea mbucha mose que mbeĩ usẽ asi Pablo echi ra. Mbeĩ que Pablo o shiu ra.

⁴ Eo resebe tuchi que eñi nda. Nyebe hue jenda ñee ñee nyue. —Mbia iquia iquiasa Pablo reae. Oso

chee que ama ndisha si no. A mbei riqui eshiu a no. Mano nda cote reae. Huñicuã mose, i rei que hue jenda nyue ra.

⁵ Pablo que mbei mbaba tátaa ra. Erasiã mbei que Pablo je ra.

⁶ Mbia que mae nguiatu Pablo rese ra. —Ma eruru. Embusiate rei rae. Mano ndae, i rei que ra. Mbia que mae nguiatute rei u nguiã erese. Erasiã mbeite que ee ra. Nyebe mbia ucheẽ mbuchebi nguiã. —Dios mo ndei Pablo, i que mbia cote ra.

⁷ Hue robeichõ ngue ererecua mbae ibi ra. Ejoõ acua rerecua. Publio, i que ererecua je ra. Urererao que uchuchúaa ra. Urembuquiaru turãte que ra. —Jẽitõ mocoĩ jiri, i que ure je ra. Tres días que ureitõ erese ra.

⁸ Publio ru rasite que ra. Eracute que ra. Eruushi ruquite que ra. Pablo que oso erea ra. O que echono earõ nda. Ñee ngue Dios je ra. Nyerõ ngue cote ra.

⁹ Aquere que mbia rasi ngaẽ ngaẽ ja Pablo je cote ra. Ejoõ jenda ja. Dios que embucherõ ja ra.

¹⁰ Mbia que mbae mee mee tuchi ure je ra. Urecuata mose que mbae chuchã nyuchã tuchi canoa ye ra. Urechurã.

Pablo ngasẽ Rómaa

¹¹ Ejoõ acua que urecu bei ra. Tres meses. Canoa cuasu mo abe que chi beite aque rĩ nda. Alejandría jenda rei aque canoa. Dios Nyeremo, i que aque canoa je ra. Aque canoa ye que ureso cote ra.

¹² Siracusa, i que sucha tubiriã mo je ra. Huee que urecuasẽ nda. Huee que ureitõ mocoĩ nda. Tres días.

13 Hue si que ureso siquiibi cot e ra. Urecuasẽ ngue Regio ra. Huee que ureitõ nda. Isamami ngue quiririã ureichu urequite quitu ra. Canoa maña turã. Co miã ngue ureque ama ndiite re ra. Urecuasẽ ngue Puteoli ra. Huee que urequichi bei canoa si cote ra.

14 Jesús quiato mo ngue uretea huee ra. — Jenguchõ na urerese, i que ure je ra. Ae urecuchõ nguiã una semana erese. Aquere que ureso Roma nguiti cote ra. Ibi rĩ.

15 Jesús quiato que jirandu urerese cote ra. Roma jenda. Nyebe ecuaẽ nguiã urerobeishĩ. Foro de Apio, huee que urerobeishĩ nda. Tres Tabernas, hue abe que urerobeishĩ ishĩ nda. —Iaanye, i que Pablo mae mose Jesús quiato rese ra. Pablo ia tuchi erobeishĩ mose.

16 Urecuasẽ ngue Roma cote ra. Sucha tubiriã tuchi que Roma nda. Soldados rerecua que ecuasa mondo ja mbia icuã ndaarõsa je cote ra. Pablo mbuchao que ra. —Ndechuchua chõ eico nde, i que ee ra. Soldado miã ngue Pablo reaquiato bei quia ra.

Pablo Dios cheẽ senei senei Rómaa

17 Urecuasẽ namo jiri mose que Pablo judíos rerecua munua j a ra. Roma jenda. Pablo que ñee ee ra. —Seresenda, mbae icuã ngue asaã eãte judíos je ra. Nanderamei ñee abe que amumba eãte ra. Judíos que semeeño Romanos je ra. Jerusalén seico mose.

18 Romanos ngue ñee tuchi seje ra. “Nan-dehui esi”, i rei ngue serĩ cote re. “¿Mbaerã nda

nandeiquia re? Mbae icuã mo ngue esaã eãte”, i que serĩĩ nda.

19 “Jẽhuichĩ nda esi jẽ!” i bei que judíos quia ra. Romanos je. Judíos quia ñi hui sereãte nguiã sesi. “Semondo ererecua tuchi je”, ae chee que se ra. Ererecua saa ra acheẽ icuã eã ndei judíos rĩĩ.

20 Nyebe “Jenyu. Tamae jendese. Tacheẽ jẽje”, ae que jẽje ra. Mbia mano je ra quera si, nande chõ ndaque equia co. Ñquĩ je chõ secuasa riqui nguiã co, i que Pablo judíos je ra.

21 Judíos rerecua que ñee Pablo je ra. —Jerusalén jenda que ucheẽ mbesa eãte imbu ure je ra. Ae ngaẽ ngaẽ nguia hue si, ñquĩ abe que ñee icuã eãte quia nderĩĩ nda.

22 Ndecheẽ urechandu rã. Mangu chooño eã mbia ñee icuã icuã jeni. Jesús quiato rĩĩ. Nyebe echeẽ ure je, i que Roma jenda Pablo je ra.

23 —Aque mose ra urechu ndecheẽ andu, i que judíos Pablo je ra. Aque mose que ecuaẽ jate cote ra. Pablo chuchúaa. Isamamimbe. Pablo que embaaquiato quiato tuchi ra. Tenda mondo chee. Jesús rĩĩ ngue eriqui ñee ñee mbia je ra. Moisés chimbese que esenei senei ee ra. Dios cheẽ mbuchecuada chimbese abe que esenei senei ee ra. † nda mbia Jesús icua. —Dios quiarei ererecua tuchi, i tuchi que Pablo judíos je ra.

24 Emo emo ngue Jesús isi ra. Pablo cheẽ mose judíos je. Eataque que Pablo cheẽ isiteã teã nda. Ichõĩño nei equia ee reaẽ.

25 Pablo cheẽ ndui ja eã ngue ra. —Nyao rei erecha, i que eataque ra. Nyebe Pablo ñee ee. —Espíritu Turã ngue Isaías mbucheẽ turã nander-

amei je cose ra. Ëĩ ngue ñee nda:

²⁶ Eso rã ñee judíos je: “Secheẽ nda jeñandu rei nguiã.

Jeñandu eã naanguia rae.

Jemae ndei nda erese re.

Jemae eã naanguia ra erese.

²⁷ Jeñia ãtãte.

Aba cheẽ mumba mumba.

Jendesa jemungue munguete.

Secheẽ jêicua sereãte.

Jemba sereãte seicha rui.

Nyebe aico nguiã jembucheroãte”, i que Dios ra, ere ee,

i que Isaías chimbesa ra, i que Pablo ra.

²⁸ Pablo que ñee mbei ra. —Tacheẽ jêje, judíos.

Judíos eã je ra Dios cheẽ uresenei senei cote. Ñquĩ

nguia ra eya tuchi erese. † nda Dios erirõ eicuã si, i

que Pablo ra.

²⁹ Pablo cheẽ niĩ ngue judíos choi guiã ñee icuã icuã nyue ra.

³⁰ Dos años ngue Pablo riqui huee ra. Roma. Mbae

isiquia que emondo mondo tuchuacha je ra. Huee

eico mose. Pablo iate que eriqui ra. Mbia nyoĩ nyoĩ

mose erea.

³¹ Mbia mo ngue Pablo cheẽ siquisã eãte ra. Je-

sucristo riĩ ngue eriqui ñee ñee mbia je ra. —Dios

ra mbia rerecua tuchi, i que equia mbia je ra. —

¿Mbaerã ereico ñee Jesús riĩ nde? i eã ngue emo

Pablo je ra.

Mbia Cheë
New Testament in Sirionó (BL:srq:Sirionó)

copyright © 1977 Wycliffe Bible Translators, Inc.

Language: Sirionó

Translation by: Wycliffe Bible Translators, Inc.

Sirionó [srq], Bolivia

Copyright Information

© 1977, Liga Bíblica Mundial del Hogar. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sirionó

© 1977, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
eb2687f2-4654-5d43-8ec2-3ee35e8a435e